



Malo Tuto'atasi o Samoa

LIPOTI A LE PULE MA SU'ETUSI SILI I LE FONO AOAO FAITULAFONO

**Lipoti i luga o Galuega a le
Ofisa Su'etusi**

Iulai 2009 – Iuni 2010

TELEFONI: 27751
FESI: 24167
IMELI: info@audit.gov.ws
UPEGA
TAFAILAGI: www.audit.gov.ws

Pusa Melli 13
APIA, SAMOA



*Fa'amolemole e fa'atoai uma mataupu i
le Pule ma Suetusi Sili*

OFISA SU'ETUSI

30 Aperila 2012

Afioga La'aulialemalietoa Leuatea Polataivao Fosi
Fofoga Fetalai o le Maota
Fono Aoao Faitulafono
Malo Tuto'atasi o Samoa

Lau Afioga i le Fofoga Fetalai.

Lipoti i le Palemene – Lipoti i Luga o Galuega a le Ofisa Su'etusi o Samoa – Iulai 2009 tau ia Iuni 2010

E tusa ai ma le Fuaiupu 99 o le Tulafono Fa'avae o le Malo Tuto'atasi o Samoa 1960 ma le Vaega 10, Tulafono o le Ofisa Su'etusi 1961, ou te tu'uina atu ai ma lo'u fa'aaloalo lava i lau Afioga mo le taua'aina atu i le Fono Aoao Faitulafono o Samoa i totonu o le i si fonotaga a le Palemene soso'o ai, la'u Lipoti i Luga o Galuega a le Ofisa Su'etusi mo le vaitau mai le aso 1 Iulai 2009 e tau i le 30 Iuni 2010.

Ma le agaga fa'aaloalo.

C. Afele
Fuimaono Papali'i C.G. Afele
PULE MA SU'ETUSI SILI

Upu Tomua

O lenei Lipoti o lo'o ta'atia mai ai ia galuega ale Ofisa Su'etusi sa fa'atino mai ia Iulai 2009 seia o'o atu i le fa'aiuga o Iuni 2010. O lo'o lipotia ai fo'i ma fa'aletonu na a'afia ai meatotino pei o ta'avale afi ma seleni.

O le vaitau Iulai 2009 – Iuni 2010, sa fa'aauauina ai le polokalame fa'amalosia a le Ofisa Su'etusi lea sa amatalia ia Oketopa 2008. E o'o mai i le iuga o Iuni 2010 ua tele ona fa'amae'a lenei galuega. O ia galuega fa'aleleia sa aofia ai tusi taiala ma metotia fou fa'asu'etusi ma ni isi tomai fou e aofia ai le su'ega o le fa'atinoga o galuega ma su'ega o le a'afiaga o le siosiomaga i atina'e fa'a'apea ma fa'avae fa'atekonolosi o fa'amatalaga.

O vaega o le polokalame sa totoe mai i le aso 30 o Iuni 2010 e aofia ai suiga i le pulega o le aufaigaluega fa'atasi ai ma le iloiloga o tulafono o lo'o fa'atonutonu ai le Ofisa Su'etusi. O ia suiga e aofia ai le toe fa'atulagaina o le aufaigaluega ina ia fa'aopoopo ni avanoa fou mo tomai fou sa fausia i le polokalame atia'e fa'atasi ai ma le iloiloga o tulafono uma e a'afia ai le galuega a le Ofisa Su'etusi.

O le Lipoti fa'aletausaga e so'oso'o ai a le Ofisa Su'etusi e mo le vaitau Iulai 2010 ia Iuni 2011 ma o le a tu'uina atu i le Fofoga Fetalai o le Maota ia Iuni 2012.


Fuimaono Papali'i C. G. Afele
PULE MA SU'ETUSI SILI

1. Tulaga ma Galuega a le Ofisa

O le Pule ma Su'etusi Sili, o le Ofisa Su'etusi lava lea e tusa ai ma le Vaega 2 o le Tulafono Fa'atonutonu o le Su'ega o Tusi 1976.

O le mau tau'ave a le Ofisa Su'etusi, o le fa'amautinoaina lea o le pulega lelei, manino ma le mafai ona tali atu i le tu'uina atu lea o auaunaga fa'asu'etusi tuto'atasi, fa'apolofesa ma i si su'esu'ega fa'asu'etusi talafeagai ai, e tau'aveina mo galuega fa'atino i Matagaluega ma Fa'alapotopotoga Tumaoti a le Malo, e auala atu i ana lipoti i le Palemene i mataupu e maua mai i su'ega o tusi.

O le masani ma le autu o le galuega a le Ofisa Su'etusi sa iai lea i le su'ega o fa'amatalaga o tupe a le Malo, Matagaluega ma Fa'alapotopotoga Tumaoti. O le taimi nei ua iai foi se malosiaga a le Ofisa e fa'atino ai su'ega o galuega fa'atino ma su'esu'ega fa'apitoa i lalo o le Tulafono o Fa'alapotopotoga a le Malo (Galuega Fa'atino ma le Mafai ona Tali atu) 2001 ma ua amata nei ona aga'i atugaluega i lea tulaga.

O le matafaioi ma galuega a le Ofisa Su'etusi o lo'o fa'atulaga mai i le Fa'avae o le Malo o Samoa 1960, Tulafono o le Ofisa Su'etusi 1961, Tulafono Fa'atonutonu Fa'asu'etusi 1976, Tulafono o le Pulega o Tupe a le Malo 2001, le Tulafono o Fa'alapotopotoga a le Malo (Galuega Fa'atino ma le Mafai ona Tali atu) 2001 ma le tele o Tulafono na fausia ai Matagaluega ma Fa'alapotopotoga Tumaoti a le Malo.

2. Pulega ma Fuafuaga

2.1 Auivi o le Fa'atulagaga

2.1.1 Auivi o le Fa'atulagaga o le Ofisa

O le auivi o le fa'atulagaga sa iai i le Amataga ma le fa'aiuga o le vaitau o le Lipoti e lei suia fa'atusa i le auivi sa iai i le fa'aiuga o le tausaga fa'aletupe 30 Iuni 2009.

E pei lava ona folasia muamua, o lenei auivi o le a suia i le tausaga fa'aletupe Iulai 2010 ia Iuni 2011 pe a fa'amae'a uma polokalame fa'aleleia.

2.1.2 Pulega o le Ofisa

O le taupulega a le Pule ma Su'etusi Sili mo le puleaina o le Ofisa e aofia ai le Sui Pule, Pule Lagolago e toa lua, Su'etusi Fa'atonu e toa lima, Su'etusi Fa'avae e toa fa ma Su'etusi Sinia e toa fa. O lenei taupulega e fa'atasi i le lua vaiaso ma usuia a latou fonotaga mo le fa'atonutonuina o le Ofisa Su'etusi.

2.2 Fuafuaga Autasi

Sa fa'aauau pea ona tuliloa e le Ofisa Su'etusi ia fuafuaga autasi ma manulauti e pei ona fuafuaina i le Fuafuaga Autasi mo Iulai 2009 ia Iuni 2012. Ma o ia tulaga sa tuliloaina i lalo o fa'amalu e pei ona taua i lalo.

Fa'amalu mo le tuliloaina o Fuafuaga Autasi



2.3 Fuafuaga Fa'aletausaga

O lo'o i ai se fuafuaga fa'aletausaga mo le 2009/2010, o lo'o fa'atula'i atu ai galuega fa'apitoa ma fuafuaga mamao e tatau ona fa'amae'aina mo nofoaga autu ta'itasi o taunu'uga taua i totonu o le fuafuaga autasi.

O Fuafuaga Mamao Taua i totonu o le fuafuaga autasi o le 2009/2010 e aofia ai:

- Fa'aleleia o faiga fa'avae ma feua'iga fa'ale-Ofisa;
- Fa'atinoga o faiga fa'atino ma alauea (hardware - mea faigaluega anagata tau-komepiuta) fou tau-fa'amatalaga fa'atekonolosi;
- Fa'aulufale mai o metotia fou i le faiga o su'ega o fa'amatalaga tautupe;
- Atina'eina o le mafai e fa'afueina ai su'egatusi tau-fa'atinoga, su'egatusi tau-si'osi'omaga, ma su'ega o tusi tau-fa'amatalaga fa'atekonolosi;
- Fa'aleleia o le auivi o le atina'e fa'apolofesa o le aufaigaluega.

E o'o mai i le fa'aiuga o le vaitau o le lipoti, ua mae'a fa'atino fuafuaga ua taua i luga.

3. Aufaigaluega ma i si Puna'oa

E taua le pulea lelei o le aufaigaluega ina ia mafai ai ona taofi ma si'itia tomai ma le olaga galue o le aufaigaluega mo le ausia o galuega fa'atino.

3.1 Numela o le Aufaigaluega

E le'i i ai se suiga i le numela o le aufaigaluega i le aso 30 Iuni 2010 fa'atusa i le aso 30 Iuni 2009.

3.2 Pulega ma le Atina'e o le Aufaigaluega

O galuega atina'e mo le aufaigaluega i le vaitau o le Lipoti e aofia ai:

<i>Atina'e</i>	<i>Aso/Taimi</i>	<i>Aufaigaluega sa au'ai</i>
Tali atu a le Fa'amasinoga o Solitulafono i Faiga Pi'opi'o – JICA and UNAFEI – Iapani	Iulai 2009	Fuimaono Camillo Afele
Polokalame fa'avaomalo a le CPA – Ausetalia	Aukuso 2009	Terence Su'a
Su'ega o Fa'alapotopotoga a le Malo Fa'apisinisi – ICISA India	Setema 2009	Heti Meleisea
Su'ega o le Fa'atinoga o Galuega – ICISA India	Oketopa 2009	Vaipou Levi Nofoaiga
Su'ega o Fa'amatalaga Fa'atekonolosi – ICISA India	Mati 2010	Ruta Matatumua
Fonotaga o su'ega i a'afiaga o le siosiomaga - ACAG Ausetalia	Aperila 2010	Tamaseu Leni Warren and Dennis Chan Tung
Polokalame fa'aleaoga ma galuega fa'avaitaimi – Ofisa Su'etusi a le Iunaite Setete o Amerika	Aperila – Iulai 2010	Fuimaono Camillo Afele
Su'ega felagolagoma'i o galuega fa'atino - Fiti	Me 2010	Sina Palamo-Iosefo and Dennis Chan Tung
Aoaoga i su'ega o galuega fa'atino – Ausetalia	Iuni 2010	Violet Roebeck-Fasavalu and David Pereira
Aoaoga i Su'ega fa'alotoifale ma suiga i fa'atauga o oloa ma galuega fa'atino - Toga	Iuni 2010	Lillian Waterhouse-Hytongue and Terence Su'a
Aoaoga a le Fa'alapotopotoga Su'etusi a le Pasefika	Iuni 2010	Sina Palamo-Iosefo and Violet Roebeck-Fasavalu

4. Fa'amatalaga o Tupe Fa'aletausaga

O le folasaga o lo'o i lalo ua ta'atia atu ai tupe maua ma tupe fa'aalu a le Ofisa mo le tausaga na fa'aiuina i le aso 30 Iuni 2010.

Ofisa Su'etusi
Fa'amatalaga o Tupe Maua ma Tupe Alu mo le tausaga na fa'aiuina i le aso 30 Iuni 2010

<i>Meata'itasi</i>	<i>Fuafua 2009/2010 \$</i>	<i>Fa'atinoga 2009/2010 \$</i>	<i>Fa'atinoga 2008/2009 \$</i>
Galuega Fa'atino Tasi – Lipoti ma auunaga i le Palemene ma le fa'amaoniaga o pepa mo le totogi o tupe a le Malo			
Totogi o le Aufaigaluega	221,370	221,111	221,143
Tupe totogi mo oloa ma galuega mo le fa'agaoioiga	71,612	71,085	74,585
Tupe totogi mo Aseta ma Galuega Tetele	3,000	0	0
Saofaga mo auunaga lautele	93,131	86,957	0
Aofa'iga mo le Galuega Fa'atino Tasi	\$389,113	\$379,153	\$295,728
Galuega Fa'atino Lua – Su'ega o Fa'amatalaga o Tupe Fa'ale Kuata ma le Fa'aletausaga ma le pasiaina o siaki i aso taitasi			
Totogi o le Aufaigaluega	266,766	266,638	274,150
Tupe totogi mo oloa ma galuega mo le fa'agaoioiga	19,137	18,520	10,193
Tupe totogi mo Aseta ma Galuega Tetele	1,000	0	0
Saofaga mo auunaga lautele	93,131	86,957	0
Aofa'iga mo le Galuega Fa'atino Lua	\$380,034	\$372,115	\$284,343
Galuega Fa'atino Tolu – Su'ega o Matagaluega			
Totogi o le Aufaigaluega	333,436	332,594	270,404
Tupe totogi mo oloa ma galuega mo le fa'agaoioiga	112,579	112,417	148,120
Tupe totogi mo Aseta ma Galuega Tetele	0	0	0
Saofaga mo auunaga lautele	93,131	86,957	0
Aofa'iga	\$539,146	\$531,968	\$418,524
Toesea Tupe Maua mai Pili o Galuega Su'etusi	83,600	94,550	67,741
Aofa'iga mo le Galuega Fa'atino Tolu	\$455,546	\$437,418	\$350,783
Galuega Fa'atino Fa – Su'ega o Fa'alapotopotoga Tumaoti			
Totogi o le Aufaigaluega	632,550	630,632	679,474
Tupe totogi mo oloa ma galuega mo le fa'agaoioiga	40,797	28,647	36,790
Tupe totogi mo Aseta ma Galuega Tetele	88,000	74,597	0
Saofaga mo auunaga lautele	93,131	86,957	0
Aofa'iga	\$854,478	\$820,833	\$716,264
Toesea Tupe Maua mai Pili o Galuega Su'etusi	248,047	164,872	295,023
Aofa'iga mo le Galuega Fa'atino Fa	\$606,431	\$655,961	\$421,241
Auunaga Lautele			
Totogi o le Aufaigaluega	228,384	218,991	189,773
Tupe totogi mo oloa ma galuega mo le fa'agaoioiga	119,140	118,743	116,283
Saofaga mo auunaga lautele	25,000	10,093	0
Aofa'iga mo auunaga lautele	372,524	347,828	306,056
Aofa'iga mo galuega fa'atino uma	\$2,535,295	\$2,451,898	2,020,915
Tupe totogi e fai ma Sui o le Malo			
Fono Fa'avaomalo a Ofisa Su'etusi	5,000	1,958	4,976
Fa'alapotopotoga Su'etusi a le Pasefika	600	0	143
Fa'alapotopotoga Su'etusi a le Lalolagi	1,584	1,475	0
Asosi Su'etusi a Atunuu o le Pasefika	1,200	998	0
Totogi o lisi ma fale	212,848	213,540	195,045
Lafoga o le VAGST	77,507	18,014	290,395
Aofa'iga o tupe totogi e fai ma Sui o le Malo	\$235,986	\$235,985	\$490,559
Aofa'iga Aoao Tetele	\$2,771,281	\$2,687,883	\$2,511,474

Fa'amatalaga Fa'aopoopo

1. O aofa'iga uma o lo'o fa'aailoa i le unite o le tala pito lata ane.
2. O le fa'amatalaga o lo'o saunia i luga o le fa'avae e amanaia ai na o tupe ua maua ma tupe ua fa'aalu. O aitalafu uma ma isi aseta i le aso 30 o Iuni 2010 e le o amanaia ina.
3. O tupe fuafua o seleni ia sa fa'atatauina.
4. O fa'amanuiaga o le aufaigaluega e aofia ai totogi masani fa'aletausaga, o saofaga a le Ofisa i Fa'aputuga Tupe e pei o le NPF ma isi.
5. O tupe totogi mo le galuea'ina o le Ofisa e aofia ai totogi mo fa'afouga ma le fa'aleleia o meatotino fa'atasi ma alauni ma pasese mo Malaga.
6. O tupe maua i pili o galuega su'etusi e maua mai lea i le su'ega o Fa'alapotopotoga Tumaoti ma Poloketi mo Polokalame Atina'e a le Malo.

Fa'amatalaga mo Eseesega Tetele

O mafuaaga mo eseeseega tetele o lo'o fa'ata'atia atu i lalo.

Eseesega mai Tala Fuafua ma Tupe Fa'atatau

1. O le aofa'iga i tupe maua i pili e \$259,422 sa pa'u lea i le aofa'iga e \$72,225 po'o le 22% fa'atua i tupe fa'atatau na mafua lea i le tuai ona tu'u i totonu e le Matagaluega o Tupe o isi lisiti i totonu o fa'amaumauga.
2. Sa mafai ona taofia e le Ofisa ana tupe fa'aalu i lalo o tupe fa'atatau

Eseesega mai le Tausaga Talu ai 2008/2009

1. O tupe maua sa pa'u ona o le tuai o le fa'amauiina i tusi o tupe moni sa aoina lea na fa'atupulaia i vaitau o le suega.
2. Fa'atusa atu i le tausaga talu ai sa si'itia tupe fa'aalu ona o le si'itia o le numela o le aufaigaluega.

5. Sini o Fa'atinoga a le Ofisa ma Taunu'uga

Sa aofia i pepa o le tala fuafua po'o le tala fa'ata'au o le tupe ia ni fua po'o fa'ailo mo galuega fa'atino a le Ofisa. O ia fa'ailo fa'atasi ai ma taunuuga mo le tausaga 2009/2010 o lo'o folasia i lalo:

Galuega Fa'atino 1: LIPOTI MA AUAUANAGA I LE PALEMENE MA LE FA'AMAONIGA O PEPA MO LE TOTOGIINA O TUPE A LE MALO

Fa'ailo o Fa'atinoga:

Galuega:	Aofa'iga:	Taunuuga:
Saunia o le Lipoti i le Palemene.	Tasi le Lipoti mo le vaitaimi Iulai 2008 – Iuni 2009	Na saunia ma tauaaina le Lipoti mo le tausaga Iulai 2008 – Iuni 2009 e pei ona fuafuaina.
Auai i fonotaga a le Palemene ma ana Komiti mo Tala Fa'ata'au o Tupe fa'atasi ma Lipoti Fa'aletausaga a Matagaluega ma Fa'alapotopotoga Tumaoti	Fonotaga Uma pe a mo'omia.	Sa auai le Ofisa i Fonotaga Uma.
Fa'amaonia o pepa mo le totogi ina o tupe a le Malo.	Tasi le pepa fa'amaonia mo le tala fa'ata'au o le tupe mo 2009/2010 ma nisi pe a mo'omia.	Sa maua atu le taunuuga o le galuega a le Ofisa e fua i luga o le aofa'iga sa fuafuaina.

Galuega Fa'atino 2: SU'EGA O FA'AMATALAGA O TUPE FA'ALE KUATA MA FA'ALE TAUSAGA MA LE PASIAINA O SIAKI I ASO TAITASI.

Fa'ailo o Fa'atinoga:

Galuega:	Aofa'iga:	Taunuuga:
Su'ega o Fa'amatalaga o Tupe Fa'ale Kuata.	Tolu (3) Fa'amatalaga o Tupe Fa'ale Kuata e tatau ona su'eina.	Sa ausia Fa'amatalaga o Tupe Fa'ale Kuata e lua (2). O le Kuata mulimuli sa fa'ama'e'a ia Iulai 2010.
Su'ega o Fa'amatalaga o Tupe Fa'ale Tausaga.	E tatau ona su'eina Fa'amatalaga o Tupe mo tausaga 2007/2008 ma le 2008/2009 pe afai e tuuina mai e le Matagaluega o Tupe.	Sa ausia e le Ofisa le su'eina o Fa'amatalaga mo tausaga 2006/2007 ma le 2007/2008. E lei mafai le tausaga 2008/2009 ona o le ogaoga o eseesega i fa'amauga a le Matagaluega o Tupe. E iai le fa'amoemoe o le a fa'ama'e'a le tausaga 2008/2009 i se taimi o Me 2012.
Su'ega ma le pasiaina o siaki i aso taitasi.	E tusa ma le selau (100) siaki e pasia i aso taitasi.	Sa ausia galuega fuafuaina e tusa ma le 95% o le vaitaimi o le Lipoti.

Galuega Fa'atino 3: SU'EGA O MATAGALUEGA

Fa'aילו o Fa'atinoga:

Galuega:	Aofa'iga:	Taunuuaga:
Su'ega o Matagaluega	Fuafua le su'ega o Matagaluega e luasefulu (20) e aofia ai ma Ofisa Fa'ale Fa'avae seia paia le tausaga fa'aletupe 2008/2009.	Taga'i ane i le vaega o le Lipoti i su'ega o Matagaluega.
Su'ega o Polokalame ma Poloketi a Matagaluega e fa'atupe 1 tupe nono ma tupe fa'a mcaalofa.	E sefulufa (14) su'ega e ao ona fa'atino i tausaga taitasi pe afai e fa'atumu uma avanoa. Fuafua e tatau ona ausia le sefululua (12) su'ega i le tausaga 2009/2010 tusa lava poo le a le numela o le aufaigaluega fa'alagolago i luga o le saunia o fa'amatalaga o tupe.	Taga'i ane i le vaega o le Lipoti i su'ega o Poloketi.
Su'ega o Ofisa a le Malo i Atunuu Maaao e pei o Fiti, Aukilani, Ueligitone, Kanepera, Peleseuma ma Niu loka i lalo o le Matagaluega a le Va i Fafo.	Fuafua le su'ega o Ofisa uma e ono (6) i totonu ole tausaga 2009/2010.	Taga'i ane i le vaega o le Lipoti i su'ega o Ofisa a le Malo i Atunuu i Fafo.
Su'ega fa'avaitaimi ma fa'ate'ite'i	E luasefulu (20) Matagaluega, sefulu (10) Poloketi, ono (6) Ofisa i Fafo. Fuafua i luga o le numela le fa'atinoina o siaki poo su'ega fa'apenei e le i lalo ifo ma le tasi mo vaega ua taua.	E le'i mafai ona ausia fuafuaga ona sa ave le fa'amuumua i su'ega fa'ale tausaga.

Galuega Fa'atino 4: SU'EGA O FA'ALAPOTOPOTOGA A LE MALO**Fa'ailo o Fa'atinoga:**

Galuega:	Aofa'iga:	Taunuuga:
Su'ega o Fa'alapotopotoga Tumaoti – Fa'atino e le Ofisa Su'etusi	E luasefulu (20) Fa'alapotopotoga a le Malo e su'eina e le Ofisa Su'etusi. E fa'alagolago nei su'ega i le saunia o fa'amatalaga ma tu'uina mai i le Ofisa Su'etusi. E luasefulu su'ega ua fuafua mo le tausaga 2009/2010 tusa lava poo le a le numela o le afaigaluega.	Taga'i ane i le vaega o le Lipoti i su'ega o Fa'alapotopotoga Tumaoti.
Su'ega o Fa'alapotopotoga Tumaoti – Fa'atino Su'etusi Tumaoti	E sefuluono (16) Fa'alapotopotoga a le Malo e su'eina e Su'etusi Tumaoti. E fa'alagolago nei su'ega i le saunia o fa'amatalaga ma tu'uina atu i Su'etusi Tumaoti. E toe iloilo e le Ofisa Su'etusi galuega a le Su'etusi Tumaoti. E sefuluono (16) su'ega ua fuafua mo le tausaga 2009/2010.	Taga'i ane i le vaega o le Lipoti i su'ega o Fa'alapotopotoga Tumaoti.
Su'ega fa'avaitaimi ma fa'ate'ite'i	E tolusefuluono (36) Fa'alapotopotoga a le Malo. Fuafua i luga o le numela le fa'atinoina o siaki poo su'ega fa'apenei e le i lalo ifo ma le tasi mo Fa'alapotopotoga taitasi.	E lei mafai ona ausia fuafuaga ona sa ave le fa'amamua i su'ega fa'ale tausaga.

6. Su'ega ma isi Galuega

O lo'o otooto atu i lalo le aofa'iga o su'ega ma isi galuega sa fa'atino i le tausaga fa'aletupe 2009/2010.

Su'ega fa'aiuina i le tausaga 2009/2010

<i>Ituaiga Su'ega</i>	<i>Aofa'iga</i>
Fa'amatalaga Fa'aletausaga o Tupe a le Malo	2
Fa'amatalaga Fa'ale kuata o Tupe a le Malo	2
Matagaluega	16
Fa'alapotopotoga Tumaoti	26
Ofisa i Atunuu i Fafo	4
Poloketi Fa'atupe i Tupe Nono ma Fa'ameaalofa mai Fafo	9

7. Fa'amatalaga Fa'aletausaga o Tupe a le Malo

E mana'omia e le Tulafono o le Pulega o Tupe a le Malo 2001 le Matagaluega o Tupe e fa'ata'atia le Fa'amatalaga o Tupe po'o se Lipoti Fa'aletausaga i luga o le fegasoloaiga o tupe a le Malo. O lenei Lipoti po'o le Fa'amatalaga o Tupe e aofia uma ai Matagaluega.

I lalo lava o lenei Tulafono e mo'omia le tu'uina atu e le Matagaluega o Tupe Fa'amatalaga o Tupe i le Pule ma Su'etusi Sili mo le su'eina i totonu o le fa (4) masina talu ona mae'a tausaga fa'aletupe. I le mae'a ai o le galuega a le Pule ma Su'etusi Sili, e mo'omia le tu'uina atu o lana lipoti ma le manatu fa'asu'etusi i luga o ia Fa'amatalaga ma Lipoti i totonu o le ono (6) masina talu ona mae'a tausaga fa'aletupe.

Ao fa'agasolo le tausaga o lo'o lipotia, sa fa'amae'aina lipoti ma manatu fa'asu'etusi mo fa'amatalaga i tausaga sa fa'aiuina i le 30 Iuni 2007 ma le 30 Iuni 2008.

O le manatu fa'asu'etusi sa tu'uina atu o ni manatu le tautaulia peitai sa iai nai mataupu fa'amamafa ona o tulaga i le le atoa o Fa'amatalaga e pei ona aiaia e le Tulafono o le Pulega o Tupe a le Malo 2001.

E taua tele le saunia o Fa'amatalaga o Tupe a le Malo ma su'eina i se taimi vave ina ia mafai ai ona tuliloaina le tali mai o le Malo ma ana Matagaluega i ana fa'agaoioiga fa'aletupe.

O le ata o lo'o ta'atia atu i lalo ua otooto mai ai le taunuuga o le saunia ma le su'ega o Fa'amatalaga o Tupe a le Malo.

<i>Tausaga Fa'aletupe</i>	<i>Aso Tu'uina mo le Su'eina</i>		<i>Aso o le Manatu Fa'asu'etusi</i>	
	<i>Aiaiga o le Tulafono</i>	<i>Aso Tauaaoina</i>	<i>Aiaiga o le Tulafono</i>	<i>Aso Tauaaoina</i>
2005/2006	1 Novema 2006	10 Oketopa 2007	1 Ianuari 2007	25 Setema 2008
2006/2007	1 Novema 2007	11 Setema 2008	1 Ianuari 2008	16 Novema 2009
2007/2008	1 Novema 2008	24 Setema 2009	1 Ianuari 2009	24 Iuni 2010
2008/2009	1 Novema 2009	19 Tesema 2009	1 Ianuari 2010	Fa'agasolo i le taimi nei
2009/2010	1 Novema 2010	29 Oketopa 2010	1 Ianuari 2011	Fa'agasolo i le taimi nei
2010/2011	1 Novema 2011	26 Oketopa 2011	1 Ianuari 2012	Fa'agasolo i le taimi nei

O le tuai ona fa'amae'a Fa'amatalaga o Tupe a le Malo o se fa'afitauli ua leva peitai o lo'o taumafai le Ofisa Su'etusi ma le Matagaluega o Tupe e foia lea fa'afitauli mo le taimi muamua i le Fa'amatalaga o Tupe mo le Tausaga Fa'aletupe 2011/2012.

O lo'o otooto atu i lalo mataupu sa laga i su'ega o tausaga fa'aletupe na fa'ai'uina i le Aso 30 Iuni 2007 ma le Aso 30 Iuni 2008.

Fa'amatalaga o Tupe a le Malo

Fa'amatalaga tautupe na su'eina: 30 Iuni 2007

Manatu Fa'asu'etusi: Manatu le tautaulia ma le mataupu fa'amamafa

Otootoga o Mataupu Laga:

1. Sa ausia tupe fa'asili e maualuga atu i le tulaga sa fuafuaina.
2. Sa fa'aauau pea ona aga'i i lalo aitalafu talu mai le tausaga 2004 a'o si'itia pea tupe maua mo le tologi o aitalafu.
3. Sa si'itia tupe maua fa'atusa i le tausaga na fa'ai'uina i le Aso 30 Iuni 2006 , peita'i e le'i ausia tupe maua sa fuafuaina.
4. Sa si'itia foi tupe fa'aalu fa'atusa i le tausaga na fa'ai'uina i le Aso 30 Iuni 2006 peita'i sa tausisia lava tupe fuafua po'o tupe fa'ataau.
5. E iai tupe fa'aalu sa le tausisia ia tupe fa'ataau ma sa fa'amanatu i le Matagaluega o Tupe le tulaga o matafaioi i lalo o le vaega 13 o le Tulafono mo le Pulega o Tupe a le Malo 2001 e fa'asino i tulaga fa'apenei.
6. Sa toe fa'amanatu i le Matagaluega o Tupe le tulaga fa'aletonu i le saunia lea o iloiloga ma fa'apaleniga masani i teugatupe uma a le Malo. O ia iloiloga ma fa'apaleniga e taua tele mo le mataituina o le fegasoloa'i o tupe maua, tupe alu ma paleni o teugatupe. O le fa'aauau pea o ia tulaga fa'aletonu o le a tula'i mai ai nisi fa'aletonu ogaoga i le puipuiga o tupe a le Malo.
7. Sa fa'aalia atugaluga i le tulaga i tupe fa'ameaalofa mai fafo ua sili atu lona fa'aogaina mai le tapula'a e tatau ai, fa'atasi ai ma polokalame ua le toe fa'agaoioia.
8. Sa tu'uina i le Matagaluega o Tupe le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Matagaluega:
 - Ua matauina nei e le Matagaluega o Tupe mataupu mai le numela 1 tau i le 5 e pei ona fa'atulaga atu i luga;
 - E tusa ai ma le mataupu numela 6, ua mae'a ona tautalagia lea tulaga i le tausaga fa'aletupe 2009, 2010 ma le 2011. Ua mae'a nei ona fa'aleleia teugatupe i faletupe, ma fa'apaleni i aso taitasi talatautupe tetele, i le fesoasoani na maua;
 - E tusa ai ma le mataupu numela 7, ua mae'a ona tautalagia i le tausaga fa'aletupe o le 2009 ma le 2010.

Fa'amatalaga o Tupe a le Malo

Fa'amatalaga tautupe na su'eina: 30 Iuni 2008

Manatu Fa'asu'etusi: Manatu le tautaulia ma le mataupu fa'amamafa

Otootoga o Mataupu Laga:

1. Sa taunuu ia le tulaga o tupe a le Malo i se tupe pa'u e ui sa fuafuaina se tupe fa'asili.
2. Sa aga'i i luga i le limaselau miliona tala mo le taimi muamua ia le aitalafu a le Malo e ui sa fa'atumauiina le lava o tupe maua mo le totogia o aitalafu.
3. Sa si'itia tupe maua fa'atusa i le tausaga na fa'ai'uina i le Aso 30 Iuni 2007, peita'i e lei ausia tupe maua sa fuafuaina.
4. Sa si'itia foi tupe fa'aalu fa'atusa i le tausaga na fa'ai'uina i le Aso 30 Iuni 2007 peita'i sa tausiona lava tupe fuafua po'o tupe fa'atatau.
5. E iai tupe fa'aalu sa le tausiona ia tupe fa'atatau ma sa fa'amanatu i le Matagaluega o Tupe le tulaga o matafaioi i lalo o le vaega 13 o le Tulafono mo le Pulega o Tupe a le Malo 2001 e fa'asino i tulaga fa'apenei.
6. Sa toe fa'amanatu i le Matagaluega o Tupe le tulaga fa'aletonu i le saunia lea o iloiloga ma fa'apaleniga masani i teugatupe uma a le Malo. O ia iloiloga ma fa'apaleniga e taua tele mo le mataituina o le fegasoloa'i o tupe maua, tupe alu ma paleni o teugatupe. Sa matauina le aga'i atu o ecesega i se tulaga fa'aletonu ogaoga ma fa'atula'i mai ai se popolega i le iai po'o le leai foi o puipuiga tatau fa'atasi ai ma le fa'atuatuaina o ia puipuiga e avefa'avae e fa'alagolago iai le saunia o Lipoti ma Fa'amatalaga Tau Tupe.
7. Sa fa'aalia atugaluga i le tulaga i tupe fa'ameaalofa mai fafo ua sili atu lona fa'aaogaina mai le tapula'a e tatau ai, fa'atasi ai ma polokalame ua le toe fa'agaioia.
8. Sa tu'uina i le Matagaluega o Tupe le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Matagaluega:
 - E le'i ausia tupe maua e pei ona lipotia;
 - Ua mae'a ona fa'amaui nonogatupe mai le Malo o Saina i totonu o Tala Tautupe a le Malo ae le o atagia ai le fale;
 - Sa le ausia tupe fa'atatau mo tiute ma lafoga;
 - Sa malosia le mata'ituina o tupe fa'aalu;
 - Ua matauina le vaega sa laga i le numela 5;
 - E tusa ai ma le mataupu numela 6, ua mae'a ona tautalagia lea tulaga i le tausaga fa'aletupe 2009, 2010 ma le 2011. Ua mae'a nei ona fa'aleleia teugatupe i faletupe, ma fa'apaleni i aso taitasi talatautupe tetele, i le fesoasoani na maua;
 - E tusa ai ma le mataupu numela 7, ua mae'a ona tautalagia i le tausaga fa'aletupe o le 2009 ma le 2010.

8. Matagaluega

O Matagaluega e le mana'omia le latou tu'uina mai o ni fa'amatalaga tautupe fa'aletausaga e su'eina. O feuia'iga fa'aletupe uma a Matagaluega ua aofa'atasi i totonu o Fa'amatalaga o Tupe a le Malo Fa'aletausaga e saunia e le Matagaluega o Tupe.

Ona o lena, e leai ai se manatu fa'asu'etusi e faia mo se Matagaluega i ana feuia'iga fa'aletupe.

Ae, ua faia e le Ofisa Su'etusi su'ega fa'aletausaga o fefa'ataua'iga ma faiga-fa'atino a Matagaluega ina ia mautinoa ai:

- O fefa'ataua'iga e sa'o ma aloa'ia;
- E atoatoa faiga-fa'atino o puipuiga fa'alotoifale o galuea'ina ai;
- Tausisia tulafono e fitoitonu i ai ma tulafono fa'atonutonu mo fefa'ataua'iga tautupe.

I le tausaga 2009/2010, e sefuluono (16) galuega sa fa'aiuina.

8.1 Mataupu na Maua i Su'ega ma Fautuaga i Matagaluega Ta'itasi

I le mae'a ai o su'ega ta'itasi, e tu'uina atu e le Ofisa Su'etusi se tusi fa'apulega i le Matagaluega e fa'ailoa atu ai mataupu na maua i le su'ega, fa'atasi ai ma fautuaga mo le fa'aleleia.

O lo'o oto'oto atu i lalo mataupu na maua i su'ega, ma aofia i mataupu na maua i tusi-fa'apulega na taua'aoina atu i Matagaluega ta'itasi na su'eina i le tausaga 2009/2010. O se oto'otoga fo'i o tali na maua mai Matagaluega ta'itasi na su'eina, pe a fai na taua'aoina mai i le Ofisa, o lo'o aofia ai fo'i i le lipoti.

E pei lava ona atagia i oto'otoga o mataupu na maua ma taua'aoina i Matagaluega, o le tele lava o tulaga na laga e fitoitonu lava i fa'aletonu o puipuiga fa'alotoifale, aemaise ai lava i totonu o vaega nei o le fa'alisitiga o tupe, totogi o le aufaigaluega ma aseta tumau.

O le lautele o puipuiga o fa'aletonu na matauina, ua atagia mai ai le mana'omia e le tele o Matagaluega o le ave o le fa'amamafa i le fa'aleleia o faiga-fa'atino autu ma feuia'iga lelei e fa'aaogaina mo le pulega ma le va'aiga o latou fa'atinoga.

Ofisa o le Fono Aoao Faitulafono

Vaitau Aofia i le Su'ega: 1 Iulai 2007 tau 30 Iuni 2008

Otootoga o Mataupu na Maua i le Su'ega:

1. E leai se fefa'apaleniaga e le Ofisa o le Fono ana fa'amaumaga o Tupe maua ma fa'amaumaga ma le Matagaluega o Tupe. O tupe maua e tataua lava ona fa'apaleni so'o, ina ia mautinoa ai o lo'o puipuia tupe maua a le Matagaluega.
2. E le'i iai ni fa'amaumaga o livi a le aufaigaluega togiaso. E o'o foi i le aufaigaluega tumau sa le atoatoa fa'amaumaga o livi. E fa'amaonia lea tulaga i le fa'amauina o aso toesea e pei ona iai i Api Saini i totonu o fa'amaumaga o livi.
3. Sa matauina le leai o se tausisia o tupe fa'atatau i pili o telefoni.

4. Sa tu'uina i le Ofisa le avanoa e aumai ai ni fa'amalamalamaga atili ma ni fa'aopopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Ofisa:
 - Sa faigata ia matou le fa'atinoga o le fefa'apaleniaina ona o le lava o le aufaigaluega. Ua matou talosagaina le Matagaluega o Tupe mo ni tagata faigaluega fa'aopopo e tau mai lava i tala fa'atautu tautupe i le tausaga nei ae ua latou tolopoina mo le i si tala fa'atautu o le tupe;
 - Ua fa'aleleia nei pepa o paleni tau aso malolo;
 - O tupe fa'aalu fa'asili i luga o telefoni e pei ona lipotia, e tupu pea i tausaga ta'itasi fa'aletupe. O matou fuafuaga fa'atautu mo nei tupe fa'aalu sa fa'avae lava i luga o tupe fa'aalu moni lava i tausaga ta'itasi, peita'i e aumai a tupe ua fa'amaonia, e itiiti lava.

Matagaluega o Fa'atoaga ma Faigafaiva

Vaitau Aofia i le su'ega: 1 Iulai 2007 tau 30 Iulai 2008

Otootoga o Mataupu Na Maua i le Su'ega:

1. E lei ausia e le Matagaluega ana Tupe Maua Fuafuaina.
2. Sa matauina le telegese o le fa'alisitiina o tupe mai le siakiina o Tuaoi Fa'avaomalo. O nisi o tupe na aoina e le i fa'alisitia lava.
3. Sa tumau pea le le'i mafai ona aoina o aitalafu tu'ua mai tausaga ua mavae. Sa tautino e le Matagaluega o le a taumafai atili e foia lenei fa'afitauli.
4. Sa matauina ni tupe na totogi sese i ovataimi i se tasi o le aufaigaluega i le aofa'iga e \$2,527 Tala.
5. O nisi o tupe na foai mai i Atunu'i fafo e le ui mai i le Matagaluega o Tupe. E le'i iai ni fa'amaumauga mo tupe fa'ameaalofa aemaise ai le poloketi o Lago Fa'atamaia Fuala'au'aina. Sa le mafai ona fa'amautu aofa'iga o tupe foai na to'ai taunuu sa'o i le Matagaluega ona o le leai o ni fa'amaumauga.
6. Sa matauina fa'aletonu i le tuliloaina o tupe ma meatotino leiloa e afua mai i fa'alavelave tau taavale. O le tau o le toe fa'aleleiga o se tasi o taavale lavea e tusa ma le \$5,280 Tala sa totogi e le Matagaluega. Ua fa'amavae le aveta'avale ma malaga atu i Niu Sila ae augapiu ma se tupe na totogiina. O le isi ta'avale sa iai se tau mo lipea e \$345 Tala ma sa iai le fuafuaga e toe fa'aola le \$60 Tala e le avetaavale e ala i le toesea mai o le ta'i luasefulu (\$20) mai lona totogi. Sa fa'amutalia le auaunaga a le avetaavale o na o fa'aletonu i lana auaunaga.
7. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopopoga e tusa ai ma galuega fa'aleleia fa'agasolo a'o le i lolomia le Lipoti peita'i e o'o mai i le taimi mo le lolomiga o le Lipoti e le'i fa'aogaina lava lea avanoa.

Matagaluega o Feso'ota'iga, ma Fa'amatalaga Fa'atekonolosi

Vaitau Aofia i le Su'ega: 1 Iulai 2008 tau 30 Iuni 2009

Oto'otoga o Mataupu na Maua i le Su'ega:

1. Sa matauina le tusia fa'alua o tupe maua ona o le leai o se fa'apaleniga ma se fefa'aso'otaiga o fa'amaumauga a le Matagaluega ma le Matagaluega o Tupe.
2. Sa matauina le fa'aogaina ese Kamupani fa'asalalau o fale o le Matagaluega mo le teuina o nisi o aseta e aunoa ma se totogi. O lo'o fuafua nei le Matagaluega e fa'atino lenei tulaga i se faiga fa'a lisi.
3. E lei atoatoa fa'amaumauga a le Matagaluega e mataitu ai le Poloketi o le Fa'amatalaga, Feso'otaiga ma Fa'atekonolosi (ICT) ae sa fa'alagolago lava i le Matagaluega o Tupe.
4. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti peita'i e o'o mai i le taimi mo le lolomiga o le Lipoti e le'i fa'aaogaina lava lea avanoa.

Matagaluega o le Va i Fafu ma Fefa'ataua'iga

Vaitau e Aofia i le Su'ega 1 Iulai 2007 tau 30 Iuni 2008

Oto'otoga o Mataupu Na Maua i le Su'ega:

1. Sa matauina ia ni tupe fa'aalu e sili atu ma le \$100,000 i tupe sa fa'atatauina.
2. E tele se tupe na aoina mai le fa'amaoniga o pepa fa'atulafonoina. Peitai sa leai se tusi lisiti fa'apitoa mo ia tupe maua ae sa tuuina sa'o i le Matagaluega o Tupe.
3. O se tasi o alagatupe e maua mai i le igoa mo le initaneti o le .ws. Mai le iloiloga o tupemaua mai le igoa aoao, ua matauina ai e le Ofisa Su'etusi e le'i feutaga'i le Matagaluega ma le Kamupani Computer Services Limited (CSL) e tusa ai ma totogipau mo le fa (4) masina mai ia Setema tau ia Tesema 2007 e le'i maua mai. E le gata i lea, o totogipau fo'i o Oketopa tau ia Tesema 2006 ma Mati 2007 o le tausaga fa'aletupe na fa'ai'uina i le aso 30 Iuni 2007 sa laga fo'i e le Ofisa Su'etusi i le su'ega talu ai, ae foliga mai e le o lava se galuega a le Matagaluega o faia i ai e aoina mai ai nei tupemaua ua leva ona fa'amalumalu mai.
4. Ua matauina fo'i e le Ofisa Su'etusi e fa'apea o le konekalate i le va o le Malo e ala atu i lenei Matagaluega ma le Kamupani Computer Services Limited (CSL), ua leva ona tataua ona toe iloilo. Ua fautuaina ai ina ia vave faia loa se iloiloga o lea konekalate.
5. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti peita'i e o'o mai i le taimi mo le lolomiga o le Lipoti e le'i fa'aaogaina lava lea avanoa.

Matagaluega o Leoleo ma Falepuipui

Vaitau e Aofia i le Su'ega: 1 Iulai 2007 tau 30 Iuni 2008

Oto'otoga o Mataupu na Maua i le Su'ega:

1. Sa matauina tulaga nei i puipuiga fa'alotoifale ma puipuiga fa'atausi tusi:

- E le i fa'atinoa lava e le Matagaluega ni fefa'apalenia'iga o ana Tusi-fa'amau o Tupefa'aalu;
- E lei fa'aatoatoaina faila fa'apitoa mo tagata faigaluega;
- O nisi o aseta o loo i le Lesitala i lalo o vaega eseese, na asiasia ae le o maua i nofoaga e tataua ona i ai. E i ai fo'i aseta na fa'atauina, peita'i e le o fa'amauina i totonu o le Lesitala o Aseta a le Matagaluega;
- E i ai aseta o lo'o fa'amauina i totonu o le Lesitala o Aseta Tumau ua soloia, peita'i o ia aseta e le tutusa ma fa'amaumauga o aseta ua soloia o lo'o faila ma teuina e le Matagaluega;
- O tupe fa'aalu a le Matagaluega mo le Telefoni, Eletise ma le Vai e sili atu nai lo tupe na fuafuaina i le tausaga;
- Sa matauina le so'ona fa'aaoga o telefoni feavea'i. O le tele o telefoni na fai e sili atu ma le sefulu (10) minute a'o nisi e sili atu ma le itula le umi;
- E le o faia e le Matagaluega se lesitala lelei e mata'ituina ai vala'au i atunu'u mamao.

2. O nisi o mataupu e aofia ai le:

- E le o tausia e le Matagaluega se Lesitala o E Fa'ataua Au'upega ma Ututau mo le puipuia ma le mata'ituina o au'upega;
- E lei fo'i se Lesitala o fa'amau ai o a au'upega ma o le a le tele o ia au'upega i o latou ituaiga ma faiga ua fa'amaonia ma tatala atu ai i le atunu'u. E fa'apena fo'i le lei o se lesitala, o a fo'i au'upega ua toe fa'afo'i ma o a au'upega ua fa'atama'ia;
- Sa matauina e le Ofisa Su'etusi le le lava o avanoa e teu ai taumafa tu'uaisa mo le falepuipui, ma o le taunu'uga o lenei fa'aletonu, o oka mo le sapaalai o taumafa tu'uaisa, e fai ona ave atu lea, peita'i o le paleni o mea e le mafai ona ofi i avanoa i le falepuipui e teu i aisa a kamupani na fa'atau mai ai, ma fa'asolosolo atu ai lea ona sapaalai atu i le falepuipui i le manaomia mai;
- O fa'amaumauga fo'i o le fa'atauga o taumafa mo le Falepuipui i Tafaigata e le lelei, ma e manaomia ai se fa'aleleiga vave o ia fa'amaumauga, ina ia mafai ai ona fai se faitauga maioio, po'o a taumafa ua fa'atau ma maua, poo a taumafa ua ave ese atu, ma po'o a fo'i oloa o taumafa o totoe.

3. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o lei lolomia le Lipoti. O lo'o fa'agasolo atu i lalo tali na tu'uina mai e le Matagaluega:

- O le fesoasoani mai a le Faufautua Fa'apitoa i lalo o le poloketi a Leoleo o Ausetalia ua mafai ai nei ona faufau se lesitala mo tupe totogi ua i ai le malosiaga ma le fa'amamafa i le fa'apaleniga i masina taitasi petai e lei mae'a

lea tapenaga i le taimi sa fa'atino ai le su'ega. Ua talia le fautuaga a le Su'etusi ma ua faia nei fa'apaleniga o tupe totogi i masina taitasi;

- O le tulaga sa laga i faila fa'apitoa mo tagata faigaluega ma fa'amaumauga mo livi ua talia mo le toe fa'aleleia;
- Ua fa'amauina tulaga toe fia fa'aleleia i aseta ma lesitala ina ia fa'amautinoa le iai pea o aseta i nofoaga ua fa'asino iai;
- O lesitala uma o aseta ua ta'atia lelei nei i le tulaga e tataua ona iai e aofia ai ma le lesitala o le tusiesea o aseta;
- O le fa'asiliga o tupe fa'aalu mai tupe fa'atatau i pili o eletise, telefoni ma le vai ua afua mai lea i pili tuua mai tausaga ua mavae;
- Ua fa'amauina e le Matagaluega le tulaga o le soona fa'aaoga o le telefoni ma fa'aaloa atu ai le fa'aleleia o lea tulaga. Sa fa'agasolo su'esu'ega ma toesea ai mai totogi o latou na a'afia seleni a le Matagaluega sa alu i le totogigaina o ia telefoni. Ua fa'amauina foi le fa'atula'i lea o se lesitala mo telefoni i atunu'u mamao;
- O le fautuaga i se lesitala mo au'upega ma e fa'ataua au'upega ma ututau ua mae'a fa'atino i le 2009. O le Lesitala o latou e Fa'ataua Au'upega ma Ututau ua mae'a ona fa'aleleia.
- I tausaga ua mavae sa fa'asoa mea tausami i vaiaso taitasi peitai o le taimi nei ua fa'asoa i le masina ma mo'omia ai le fa'ateleina o avanoa ma aisa mo oloa tu'uaisa. Ua fa'amauina le fautuaga a le Su'etusi ma o le a talosagaina lea tulaga i se tala fa'atatau o le tupe lata mai.

Matagaluega o le Palemia ma le Kapeneta

Vaitau e Aofia i le Su'ega: 1 Iulai 2007 tau 30 Iuni 2008

Oto'otoga o Mataupu Na Maua i le Su'ega:

1. E i ai le talitonuga sa i ai le fa'atamala i le tausia o tusi ma fa'amaumauga mo tusifolau. O fa'ataitaiga e fa'apenei:
 - E le o fa'amauina i le Lesitala le mauaina o tusifolau fou mai le kamupani e lolomia tusifolau;
 - E leai foi ni pepa o fa'amaumauga o le va'a na aumai ai le fa'atauga fou o tusifolau, sei fa'amaonia ai le aofa'iga ua taua'aina i le Ofisa i le fa'asologa numela T251001 – T280000 i le taimi o le faitauga o tusifolau;
 - O Tusifolau NumelaT238900 – T238999 e lei fa'amauina i le Lesitala, ae na matauina sa tatalaina mai le Ofisa o le Konesula i Aukilani;
 - O Tusifolau NumelaT239000 – T239999 sa fa'amauina i le Lesitala sa i le Ofisa o Femalaga'iga i Apia, peitai e le o Apia a'o Aukilani na tatala i ai;
 - E tolusefulu tasi (31) pepa o femalaga'iga ua fa'aleagaina, o lo'o misi, ua le mafai ona tu'uina ifo i le Ofisa Su'etusi mo lana iloiloga i le taimi o le su'ega;
 - O le Ofisa o Femalaga'iga e leai se Lesitala o tausia e fa'amauina ai tusifolau e maua mai le Ofisa o le latou Pule aemaise ai fo'i tusifolau e ave atu i ai mai le

Ofisa o Femalagaa'iga, ma e leai se femolimaua'i o ni fa'amaumaga i le va o Ofisa ia e lua.

2. O mataupu nei sa matauina i puipuiga fa'alotoifale ma puipuiga fa'a tausi tusi:

- E tolu (3) tusi lisiti numela (3134, 3789 & 4197) e ta'i 200 lau lisiti i le tusi, na leiloa mai le Vaega o Auaunaga Autasi i lalo o le Ofisa o Femalagaa'iga mo le tausaga 2007/2008. O nisi o laulisiti mai le Tusi 3134 na maua ua fa'alisiti i lisiti autu ae o le tele o ia laulisiti ua le mafai ona maua;
- Na matauina mai su'esu'ega, e \$1,450 le aofa'i o siaki ua le taulia, te'ena e leai se tupe, o lo'o tau'ave mai e lei toe fa'aolaina lava e i latou e ou siaki, ma o lea aofa'iga e le i fa'amauina e le Matagaluega i ana aitalafu po'o tupemaua;
- O le Talatautupe o Aitalafu a le Matagaluega e le mafai ona fa'amaonia atoatoa. O le aofa'iga o aitalafu totogi mai mo le vaitau o le su'ega e pei ona tu'uina mai e \$136,208, e aofia ai le \$117,374 o aitalafu totogi mai Savai'i ma le \$18,834 mai le Ofisa o Femalagaa'iga mo aitalafu tau femalagaa'iga. O le lisi fo'i o aitalafu totogi mai e le atoatoa fo'i, ona o le tele o pepa o aitalafu totogi mai e pei ona i ai i le tusi fa'amau o Tupemaua a le Matagaluega o Tupe;
- E leai ni fefa'apalenia'iga o fa'amaumaga mo tupe alu mo le fa'agaoioiga sa faia e le Matagaluega ma le Matagaluega o Tupe;
- E \$13,331 le aofa'i o siaki sa totogi i e sa fa'atau mai ai oloa e aunoa ma ni fa'amaumaga fa'amaonia e lagolagoina ai e tusa ai ma lomiga mai fa'amaumaga a le Matagaluega o Tupe, ma e \$16,374 le aofa'i o pepa totogi o aitalafu e le'i totogia lava;
- E le sainia le Api saina e nisi o le aufaigaluega i le tele o vaega o le Matagaluega e iloa ai pe na faigaluega pe na malolo ma e fa'apea fo'i ona le o tusia i pepa o aso malolo, ma o fa'amanuiaga la o aso malolo e le mafai ona fa'amautuina;
- E i ai tagata faigaluega sa tusia i le Api Saina e malolo e aunoa ma se totogi i nisi o aso, peita'i o nei aso malolo e le totogia, e le i fa'atinoa lava le toesea o totogi;
- E i ai aseta fa'apei o seti komepiuta, laulau o komepiuta, pu'eata o fa'amaumaga, o masini e tolu e sefe ai le motusia fa'afuase'i o le eletise, nofoa tau-ofisa ma pusa tusi na va'aia ma matauina o lo'o i ai i le Ofisa, ae e le o lesitalaina nei aseta i le Lesitala o Aseta. E tatau ona i ai i le Lesitala o Aseta ia fa'amaumaga e pei o le aso na fa'atau ai, o lona tau, o le fa'anumeraina o aseta, o e na fa'atau mai ai, o le nofoaga o i ai ma le vaega o lo'o fa'amatu'u atu i ai;
- O le tele o tusi oka penisini (TY76) e le o lelei ona fa'atumu, i le aofa'iga o lita ma le tau i tala e le o tusia ai, e le gata i lea, o nei tusi oka penisini o loo sainia e le aufaigaluega e le fa'atagaina ona saini ai;
- Ua maua e le Ofisa Su'etusi e fa'apea, o le ta'avale lesitalaina MPMC 14 na aumai mai le Fono Faitulafono, e le o fa'amauina i le Lesitala o Aseta;
- O le ta'avale Nissan patrol 4WD lesitalaina MPMC 01 sa a'afia i se fa'alavelave ia Novema 2006, ma sa va'aia e le Ofisa Su'etusi o lo'o tu pea i le faleta'avale a le Inisinia i le taimi o le suega. Sa laga e le Ofisa Su'etusi le mataupu lea i le su'ega talu ai, ma fautuaina ai le Matagaluega ina ia fai se fuafuaga i le e tatau ona pau i ai le totogiga o le lipeaina o lea ta'avale. Peita'i e o'o mai i le aso, e leai lava se galuega ua fai i ai e le Matagaluega;

- O lo'o fa'atali pea se fa'aiuga a le Matagaluega mo le tulaga o le taavale tuai o le Mercedes Benz Sedan o lo'o i ai pea i le lesitala o aseta a le Matagaluega o se aseta a le Malo.
3. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o lei lolomia le Lipoti peita'i e o'o mai i le taimi mo le lolomiga o le Lipoti e le'i fa'aaogaina lava lea avanoa.

Matagaluega o Soifua Maloloina

Vaitau Aofia i le Su'ega:

1 Iulai 2007 tau 30 Iuni 2008

Oototoga O Mataupu na Maua i le Su'ega

1. O mataupu ua taua i lalo sa matauina i puipuiga fa'alotoifale ma puipuiga fa'a tausi tusi:
- E le'i faia e le Matagaluega ni tusi fa'amaui lagolago (tusilima pe fa'akomepiuta) mo ana tupefa'aalu, tupemaua, atoa ai ma totogi o le aufaigaluega, peita'i ua tautu lava i le tusi fa'amaui a le Matagaluega o Tupe mo fa'amaumauga o tupe fa'aalu ma tupe maua. E le gata i lea, e le mafai fo'i ona faia ni fefa'apalenia'iga e aumai ai se malamalamaga manino pe o le a tupe fa'aalu ma tupe maua a le Matagaluega i luga o nei fa'amaumauga;
 - O faila fa'apitoa mo tagata faigaluega, pepa o aso malolo, ma api saina e le mae'a ona fa'amaumauina, ma o nisi fo'i o nei faila ma pepa o aso malolo ua leiloa, fa'apei o Vaega o Tama'ita'i tausima'i o le Soifua Lautele ma le Siosiomaga;
 - O aso malolo fo'i na ave e nisi tagata faigaluega e lei si'ia ma tusia i totonu o latou pepa o aso malolo;
 - E le lelei le tausiga o le Lesitala o Aseta. O nisi aseta ua le lesitalaina ma tusia i totonu o le Lesitala, ae o nisi ua lesitala peita'i ua le mafai ona maua le mea o i ai, ae o nisi fo'i ua foliga mai ua leiloa. O aseta fo'i ua soloia ua le mafai ona fa'amaonia i le su'ega o faia nei, ona e leai ni pepa fa'amaumau o le soloia o maua;
 - O se Talatautupe Fa'apitoa o le Fale o le Soifua Maloloina na fa'atuina e fa'auala ai le fausia o se falefou Faleapi o Tama'ita'i Tausi-soifua, i lalo o le paketi 2007/2008 i se tau atoa e \$250,000. Na fa'atuai le poloketi ona o le tau sa'iliga ma le fa'amaopoopoga o tauofoga. Mai le iloiloga sa faia e le Ofisa Su'etusi o lenei Talatautupe, e \$235,500 le aofa'i o le tau fa'a-konekalate na malilie i ai mo le fausia o le fale lea. O le mea moni e 72% o le tau ua uma ona totogi i le konekalate, peita'i, e lei taitai lava ona taulatalata i se mae'a le fausia o lenei fale, ma o le mea moni ua taofi le fausia o le fale, ae o le tele o le galuega e le'i mae'a;

2. O talatautupe masani ua so'ona fa'aalu lava e le Matagaluega pe a fa'atusatusa atu i talafa'atatau o le tausaga 2007/2008 e pei ona fa'aalia i lalo:

Talatautupe	Fa'aalu \$	Paketi \$	Eseesega		Manatu
			\$	%	
Alauni 740100	243,065	130,592	(112,473)	86%	Ova Fa'aalu
Apitaga & Meaai 740200	77,399	22,325	(55,074)	247%	Ova Fa'aalu
Tusifolau & malaga 740300	10,045	2,000	(8,045)	402%	Ova Fa'aalu
Pasese Malaga 740400	138,411	77,555	(60,856)	78%	Ova Fa'aalu
Tiute Uta 746300	2,204	900	(1,304)	145%	Ova Fa'aalu
Taumafataga 749200	135,742	5,000	(130,742)	2615%	Ova Fa'aalu
Lisi o Meatotino 749300	32,045	8,000	(24,045)	301%	Ova Fa'aalu
Taligamalo i Afiafi & Aoauli 761100	42,250	6,000	(36,250)	604%	Ova Fa'aalu
Meaalofa a le Minisita 767100	7,695	5,000	(2,695)	54%	Ova Fa'aalu

3. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o lei lolomia le Lipoti. O lo'o fa'agasolo atu i lalo tali na tu'uina mai e le Matagaluega:

- E talia le tulaga o fa'apaleniga e tataua ona fai ma ua galue nei le Matagaluega i le fa'aleleia o ia tulaga;
- E talia le tulaga i faila fa'apitoa mo tagata faigaluega, pepa o aso malolo, ma api saina e le mae'a ona fa'amaumauina ma ua galue nei le Matagaluega i le fa'aleleia o ia tulaga;
- E talia le tulaga i le fa'amauina o livi i fa'amaumauga o livi ma ua galue nei le matagaluega i le fa'aleleia o lea tulaga;
- E talia le tulaga toe fia fa'aleleia i aseta ma lesitala ma fa'aailoa ai le maea o lea tulaga;
- O atugaluga sa matauina e le Matagaluega i le fauga o le faleapi o tama'ita'i tausi-soifua ua fa'aailoa mai ua fo'ia i le tausaga 2010 lea fa'afitauli sa alia'e mai;
- Ua fa'amauina atugaluga i fa'asiliga o tupe fa'aalu mai tupe fa'atatau ma e tautino atu ai o le tele o ia fa'asiliga e patino i malaga ma fa'aafe. O Malaga nei e tataua lava ona fa'aoga mo le aotauina o le afaigaluega ma sa fa'amaonia uma e le Kapeneta. O tupe fa'aalu mo fa'aafe e aofia ai asiasiga a konesale malaga mai fa'apea ai ma le - totogiga o aitalafu tuua mai tausaga ua mavae.

Matagaluega o Punaoa Fa'alēnatula & Siosiomaga

Vaitau Aofia i le Su'ega: 1 Iulai 2007 tau 30 Iuni 2008

Oto'otoga o Mataupu na Maua i le Su'ega:

1. O mataupu nei sa matauina i puipuiga fa'atausi tusi ma puipuiga fa'alotoifale:
 - O tupe fa'alisiti i le Nofoaga o Otaota i Tafaigata e alu aso fa'atoa taunu'u i le Ofisa autu mo le fa'alisitiga i le tusi lisiti autu. O le tuai ona teu i faletupe e mai le ta'i tasi (1) i le tolu (3) aso, ma ua fai ma masani;
 - E leai se Lesitala e fa'amaui ai tupe-fa'aalu i fa'atauga o oloa, o mea tau i le Ofisa po'o isi oloa vave fa'aaoga i vaega nei:
 - Vaega o le PUMA
 - Vaega o le Folesi
 - Vaega o le Tusi fa'afanua
 - Vaega e Va'aia Eleele.
 - E leai lava se puipuiga i le fa'aaogaina o telefoni. Ua so'ona fa'aaoga telefoni fe'avea'i, lea e sili atu i le tolusefulu (30) minute e fa'aaoga ai. E tele lava fo'i se tupe fa'aalu mo le totogiga o initaneti, ae leai se fa'amaumaga o faia ma faila e fa'amaonia ai le auaunaga tautupe fa'aalu.
2. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o lei lolomia le Lipoti. O lo'o fa'agasolo atu i lalo tali na tu'uina mai e le Matagaluega:
 - E i ai le manatu o le lape i tupe fa'alisiti i le Nofoaga o Otaota i Tafaigata e mafua ona o le utiuti o avanoa tau ta'avale peitai ua i ai nei se suiga i lea tulaga;
 - O le lesitala autu mo tupe fa'aalu i fa'atauga o oloa, o mea tau i le Ofisa po'o isi oloa vave fa'aaoga sa tausia ma teuina e le vaega o Tupe peitai o le a fa'atino le fautuaga i le fesootai atu lea i vaega e pei ona taua i le mo'omia ai o a latou lesitala o oloa vave fa'aaoga ia;
 - I le taimi nei ua taofia uma laina ona toe vili ai ni telefoni feavea'i ma telefoni mo nu'u mamao vagana le laina e tasi o lo'o fa'aaoga e le Pulega ma le laina a le Pule ma le Ofisa o le Minisita.

Matagaluega o Fa'amasinoga ma Pulega o Fa'amasinoga

Vaitau Aofia i le Su'ega: 1 Iuly 2007 to 30 Iune 2008

Oto'otoga o Mataupu Na Maua i le Su'ega:

1. O mataupu nei sa matauina i puipuiga fa'atausi tusi ma puipuiga fa'aloto i fale:
 - O lisiti o fa'aliliuga o tamaiti ma fa'amasinoga o fa'aipoipoga tatala, ua le mafai ona fa'afeso'ota'i ma totogi pau moni o lo'o i totonu o faila e tatau ona totogi mo mataupu ia e i lisiti. O se su'esu'ega fa'apitoa a le Ofisa Su'etusi na faia mo le mataupu lea, ma ua i aao o Leoleo lea mataupu;

- Na matauina e le Ofisa Su'etusi e le o atoatoa ona tausī le Lesitala o Aseta, ona e le lesitalaina ma fa'amauiina uma ai aseta;
- O nisi aseta e le fa'ailogaina ma tusia e iloa ai o ni aseta a le Matagaluega;
- O nisi aseta ua soloia ae na maua lava o lo'o i le lotoa o le Matagaluega;
- I le itu i aseta, i le ma'ea ai o le suega sa tali mai ai le Matagaluega o le a taga'i i se faiga mo le mata'ituina ma le pulea o aseta ina ia fa'amauiina ai le lesitalaina o aseta fou uma ae le'i fa'aaogaina ma mafai ai ona foia le fa'afitauli e pei ona lipotia. Sa fa'aaopopo mai fo'i le Matagaluega ma o le tausia o le faia pea o le lesitala o aseta o se tasi lea o tulaga e ao ona tilotilo iai i le fauga o se faiga fou mo le mata'ituina ma le pulea o aseta;
- O pepa-fa'apipi'i tau-tulaga o ata tifaga (rating stickers) na faitauina o i ai i le Ofisa, ae e le o tusia i totonu o le Lesitala o pepa fa'apipi'i tau-tulaga o ata tifaga ua taunu'u;
- Sa atugalū le Ofisa Su'etusi i le leai o se puipuga i le mata'ituina o pepa fa'apipi'i, ona e aunoa ma se fa'apaleniga o faia e le vaega o tupe a le Matagaluega, e fa'amauiina ai le numela o pepa fa'apipi'i ua ave i le Vaega o Pasi Ata, ma le aofa'iga tonu o pepa fa'apipi'i ua tatalaina e le Vaega o Pasi Ata i le lautele o le atunu'u;
- O le mataupu i pepa fa'apipi'i tau-tulaga o ata tifaga, sa fa'apea mai le Matagaluega ina ua mae'a le suega ua taga'i nei le vaega o tupe i le fausia o se isi pepa mo le tufaina o pepa fa'apipi'i e fa'amauiina ai le feso'ota'i o pepa fa'apipi'i sa mana'omia ma pepa fa'apipi'i na tu'uina atu;
- E valu (8) tusi oka penisini (TY76) ua leiloa, ma ua le mafai lava ona maua mai mo le fa'amaoniga e le su'etusi;
- Mo le ono (6) masina mulimuli o le tausaga, e le i tausia e le Matagaluega tapula'a fa'atulagaina o penisini mo ta'avale taitasi e \$5,000 e tusa ai ma le Fa'ai'uga a le Kapeneta FK(8)Fa'apitoa 06. Mai le sefulu (10) ta'avale a le Matagaluega na iloiloaina, e taufai sili lava i le ta'i \$1,743 a le ta'avale i le ono (6) masina mulimuli o le tausaga;
- I le tulaga i le penisini ma tusi oka penisini, sa fa'apea mai le Matagaluega ina ua mae'a le suega o le a fa'ata'atia puipuga mo penisini ma le fa'aaogaina o Ta'avale e ala lea i le taofia uma o Tusi Oka i le vaega o Tupe ae le o le tatala tele atu i ta'avale uma. Sa fa'aaopopo mai ai fo'i le Matagaluega sa latou fuafuaga mo le fa'aaopopoga o tupe fa'atatau mo penisini o lo'o iai nei mai le \$5,000 i le ta'avale i le tausaga i le \$8,000.

2. I le tulaga o tusi saisi, sa matauina vaivaiga nei:

- E pei ona laga i lipoti a le Ofisa Su'etusi talu ai, e le o tausia lava e le Matagaluega tu'utu'uga i le Tulafono o Fa'asologa o Soligatulafono 1972, e tusa ai ma tusi-saisai o fa'asalaga. E matua'i tele lava le fa'atuai i totonu o le faiga o

tusi-saisai lea e mai i le ono (6) i le valu (8) masina i le 2007/2008 ma e i luga atu fo'i o le luasefuluvalu (28) aso o lo'o aumai e le Fa'amasinoga e totagi atu ai;

- E matua'i maoa'e lava le aofa'iga o Tusi-saisai tu'ua o i totonu o le vaitau o loo su'eina nei. O tusi-saisai e fa'apea ua leva, e le mafai ona toe tulituliloaina ma e ono le toe aoina mai, e toe aveina i le Fa'amasinoga mo se fa'atagaga e soloia ai pe a talafeagai, ia po'o le sailia o se manatu o le Loia Sili mo le fa'ama'apeina o nei tusi-saisai ua loa ona tu'ua;
- O le tali mai a le Matagaluega ina ua mae'a le suega sa fa'apea mai ai o lo'o galulue punoua'i mo le fa'aitiitia o le lisi tele o tusi-saisai tuua. Mo le tausaga 2009/2010 sa latou fa'atulaga ai ni sini po'o manulauti mo le kiliaina o nei tusi-saisai tuua e pei o le:
 - Aoina o le 75% o tusi-saisai tuua;
 - Vaai i le tulaga o le fa'aleaogaina o tusi-saisai tuua o le a le mafai ona aoina;
 - Fa'atulagana mo le aoina o tusi-saisai mai le 2005 i le 2009 i Nu'u mo le fa'afaigofieina o le aoina.

3. I le tulaga o matafai oi tau pasi ata a le Matagaluega sa matauina vaivaiga nei:

- Sa le tausisia e Faleolua fa'atau ata tifaga tu'utu'uga o le Tulafono o Puipuiga o Ata 1978. E ivaselau tolusefulutolu (933) ata e le atoatoa, e fa'apea na le pasia mo le fa'alauiloaina atu i luga o fata mo le lisiina atu pe fa'aune atu fo'i i le atunu'u;
- Sa i ai ata e lua na fa'asaina, ae sa lisiina atu ma fa'aune atu e se tasi o faleolua fa'atau ata i le atunu'u;
- O se tasi o faleolua fa'atauata sa lisiina atu ma faia se pisinisi e fa'auneina atu ai ata mo le atunuu'u, peita'i o lea faleolua e lei laiseneina e faia lea ituaiga pisinisi, ona na te lei umia se laisene fai-pisinisi, ia po'o se laisene mai le Matagaluega o Fa'amasinoga o le pasi-ata fa'atulafonoina;
- I le fa'aiuga o le suega sa fa'apea mai ai le Matagaluega o lo'o tapena suiga i le Tulafono Autu ma tu'uina atu i le Ofisa o le Loia Sili. O lenei suiga ole a umia ai e le Matagaluega le malosia e mafai ai ona pu'e ma taofia fa'aletulafono Ata. Sa fa'aaopopo mai le Matagaluega o lenei malosia ole a mafai ai ona (i) siaki e le Afaigaluega po'o fa'atulaga lelei Ata (Video & DVD); (ii) e le o fa'atagaina ona matamataina Ata Fa'asaina e latou e le i ausia tausaga fa'atagaina; (iii) e le o fa'atagaina le nono atu i le Mamalu o le Atunuu o Ata e le i fa'atulagaina (unclassified films, videos & DVDs) ma (iv) taofia le tatalaina o pisinisi e leai ni laisene. O le vaega mulimuli o le tali mai a le Matagaluega i lenei mataupu sa fa'apea ai o lenei malosia ole a vave ai ona fa'atino tulaga e tataua ona fai pe a le usitaia tulafono ma faiga fa'avae.

4. O se fale fou mo le Matagaluega i Tuasivi sa tu'uofu, ma e fitu (7) ofo na maua mo lea fale. Ma o le ofo na malo e \$486,512 le tau, e aofia ai le lafoga o oloa ma galuega fa'atino

ma isi tiute ma lafoga uma e fitoitonu i ai. E i ai fesuaiga na faia i le aofa'iga atoa e \$529,232.50. O le fa'asiliga o le tau mai le tau o le konekalate e 9%, peita'i o le fausaga o le fale e le lelei, o nisi vaega o le fale ua mavaevae ma ta'eta'ei. Sa fa'apea mai le Matagaluega i le fa'aiuga o le suega, o le Konekarate sa malo i le Tauofoga sa filifilia lava e le Komiti o Tauofoga ma e laititi lava se sao o le Matagaluega i lea fa'aiuga. Sa fa'aaopopo mai ai fo'i ma le Matagaluega o lo'o tapena mo lipa i se taimi lata mai.

5. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o lei lolomia le Lipoti peita'i e o'o mai i le taimi mo le lolomiga o le Lipoti e le'i fa'aaogaina lava lea avanoa.

Matagaluega o Tupemaua

Vaitau e Aofia i le Su'ega:

1 Iulai 2007 tau 30 Iulai 2008

Otootoga o Mataupu na Maua i le Su'ega:

1. Sa matauina mo le tausaga fa'ai'uina 30 Iuni 2008, o nisi o tupemaua fuafuaina mo le Ofisa o Tiute sa maulalo lava le ausia i le fa'atusatusa atu i le Paketi o tupemaua e ono aoina mo le tausaga. O Tiute mai Oloa mai fafo sa pa'u i le \$19.8 miliona tala (31% o tupemaua fuafua); Lafoga i luga o oloa ma galuega fa'atino (VAGST) mai Oloa mai fafo sa pa'u i le \$13.5 miliona tala (12% o tupemaua fuafuaina); Pulega ma le Fa'amalosia o Tua'oi sa pa'u i le \$922,000 (52% o tupemaua fuafuaina) ma Pulega o le Ava malosia sa pa'u i le \$213,000 (53% o tupe fuafuaina).
2. O mataupu o lo'o taua i lalo sa matauina i puipuiga fa'atausi tusi ma puipuiga fa'alotoifale:
 - Sa matauina e fa'apea, o nisi o fuainumela o paketi i le lipoti o le Matagaluega o tupe e ese'ese mai tala-fa'atatau na fuafuaina. O se fa'ata'ita'iga, o fuainumela na pasia o le paketi mo le tausiga o faiga fa'atino ASYCUDA e \$47,767, fa'atusa i le lipoti o le Matagaluega o Tupe, o le fuainumela fuafuaina i le paketi e \$92,145. Sa fautuaina lava le Matagaluega ina ia mautinoa o tala-fa'atatau na fa'amaonia i le paketi ia atagia i le lipoti o le Matagaluega o Tupe, e fo'ia ai le fa'asili o tupe-fa'aalu ona o le le sa'o o le faiga o fuainumela o paketi;
 - O le lisi o aitalafu na maua mai le vaega Aoina Aitalafu a le Matagaluega o Tupemaua e le atoatoa, ona e le o aofia ai aitalafu a Savai'i. Sa i ai se fa'aletonu i feso'ota'iga a Apia ma Salelologa, ma o le tele o fa'amaumauga a Salelologa, e lei lelei ona fa'amaopopo ma tusia i totonu o Faiga-fa'atino Mata'ituina o Tupemaua (RMS) e le Ofisa i Apia;
 - I totonu o Auaunaga tau-Tiute, na maua ai e le Ofisa Su'etusi ia siaki a tagata na tala i le Talitupe, ma o ia siaki e le i o'o lava i le Faletupe ma e \$20,400 le aofa'i. E le i maua ni tupe-fa'aitiitia o teugatupe i aso ia na sui ai siaki, ona sa fa'afetaui le faiga o teugatupe ma taimi na sui ai siaki;
 - Na fa'aalia le atugaluga o le Ofisa Su'etusi i le matauina e \$908,059.23 le aofa'i o tupe, ua saisaitia i siaki ua le taulia talu mai le 2004. Na fautuaina e le Ofisa Su'etusi le Matagaluega, ina ia fa'ataua le faiga o ni auala fuafua lelei, mo le aoina mai o nei tupe a le Malo ua leva ona tu'uta'ape;
 - I se va'aiga fa'atausitusi, sa tatau i le Matagaluega ona tausia se talatautupe i le tusi fa'amau autu lea e tatau ona aofia uma ai paleni tauave mai o aitalafu a le tagata aitalafu. O lea talatautupe i tusi-fa'amau, e tatau ona tu'u uma i ai fefa'ataua'iga e fa'atatau i tupe e ono maua mai, ma e tatau fo'i ona i ai ni tusi-

Lipoti o Galuega a le Ofisa Su'etusi, 1 Iulai 2009 i le 30 Iuni 2010

fa'amau lagolago o aitalafu, lea e tatau ona aofia ai fefa'ataua'iga uma e fa'ataua lava i tagata aitalafu ta'ito'atasi ia;

- E leai se feso'ota'iga i le va o le ASYCUDA ma fa'amaumaga-teufola lea e fa'amau ai fa'amatalaga o talatautupe tolopo, ma o le taunu'uga o lea mea, so'o se totogi lava e fai aga'i i talatautupe tolopo ia, e le otometi ona tusia lea totogiga. Sa fautuaina e le Ofisa Su'etusi le pulega ina ia sailia se auala e fa'amauina ma mata'ituina ai ia talatautupe, ina ia sa'o paleni tauave o nei talatautupe tolopo;
- E i ai tagata faigaluega e ave aso malolo e pei ona tusia i le api saina ae le tusia aso malolo i totonu o pepa aso malolo, e ta'u mai ai e le fefa'apalenia ia fa'amaumaga, e le gata i lea o fa'amatalaga o aso malolo e ave e tusa ai ma le api saina, e le tutusa ma fa'amatalaga o lo'o i pepa aso malolo. Ae o le Vaega o Auaunaga tau-Tiute, e leai lava ni tala'aga o aso malolo ua faia e le Matagaluega mo le tausaga fa'aletupe o su'eina nei;
- I le iloiloga o totogi o le aufaigaluega, na matauina ai e fa'apea e \$11,584 se alauni o tiute maua na totogi atu i le Failautusi o le Komiti Fa'atonu o Ava-malolosi, e ui lava ina sa te'ena e le Komisi o le Aufaigaluega a le Malo le talosaga a le Matagaluega e tau'ave ai e le Failautusi le tulaga o le sui Tausitusi Taiulu. Sa fautuaina e le Ofisa Su'etusi le Matagaluega, ina ia tautusia tulafono fa'atonutonu o le fa'afaigaluegaina, e pei ona fa'atu atu e le Komisi o Galuega a le Malo;
- Na matauina mai le iloiloga o totogi o le aufaigaluega e fa'apea e i ai nisi o le aufaigaluega ua totogi i totogi maua na totogi atu nai lo totogi na fa'amaonia e tusa ai ma pepa fa'amaonia - TY15 o lo'o faila i latou faila taitoatasi. O le manatu o le Ofisa Su'etusi e le tupu sea mea pe ana mata'alia le va'aiga ma le saunia o le Ty15 mai le amataga;
- O le fa'apaleniga fa'alemasina o tupe i le faletupe mo le tausaga atoa o le 2007/2008 mo le Talatautupe Fuafuaga Fa'apitoa Tupe-fa'afo'i o Lafoga o Tupemaua, fa'atoa fa'atino ia Aokuso 2008, ma ua matua le fetau lava ona o le tausaga fa'aletupe ua mae'a ma fa'auma. O fefa'apalenia'iga e tatau ona faia i masina taitasi e iloa ai sese ma tupe so'ona tala ma tele ai fua totogi-pau fa'aopoopo a faletupe;
- O totogi-pau mo tupe fa'aaitalafu i teugatupe tau-siaki i faletupe, e lei soalaupulea ma siaki toe-fa'afo'i, e \$30,474.23 le aofa'i. O nei fa'aaitalafu i teugatupe tau-siaki, e le i soalaupulea, ma e mafua mai i le vaivai o le vaega e va'aia tupe i le faiga o fefa'apalenia'iga o teugatupe i masina taitasi;
- E i ai siaki e totogi i le Matagaluega e \$10,756.77 na maua o le la lava e ta'atitia ai i le Ofisa mo se vaitau umi e aunoa ma se fa'alisitiga ma teu i teugatupe talafeagai. O nei siaki e mo laisene o pisinisi ma lafoga mo totogi (PAYE) a le autogi lafoga na toesea mai latou lafoga toe-fa'afo'i, ae o le paleni e totoe e toe totogi ia te i latou;
- Mai le iloiloga a le Ofisa Su'etusi o le Talatautupe o TiuteTotogi, na matauina ai le paleni e \$24,816.15 e lei fa'apalenia i le aso 30 Iuni 2008, ma o lea lava paleni le fa'apalenia, na tauave tau i le 30 Aperila 2009. E i ai teugatupe e \$11,000 i le 2006 e le o fa'aalia, ma tupe o lisiti e \$20,000 na fa'alisiti ia Aperila 2009 e lei teua i le faletupe. O le talatautupe lenei, e tatau lava ona fa'apaleni lelei

ta'imasina ina ia vave iloa ai lisiti o lo'o i tua e le i teua ma vave fai i ai se galuega fa'alelei;

- Na matauina e le Ofisa Su'etusi e fa'apea o tupe totogi mo oloa fa'aulufale mai i le aofa'iga e \$221,298.42 e le i toe fa'afo'ia se'ia tau mai i le 30 Aperila 2009, e le tutusa ma le aofa'iga e \$201,476.42 o lo'o fa'aalia i le paleni o lo'o i Tusi o Tupe o Oloa Fa'aulufale mai – o se eseese e \$19,822. O nei tupe mo oloa fa'aulufale mai e alu i tua ia Iulai 2002 se'ia tau mai ia Mati 2009. E faigata ona fa'avasega lenai tuai pe a fa'atusatusa i faiga ua fa'ata'atia ma sa tataua ona uia;
 - E matauina e leai ni pepa o fa'amaumauga o saunia e lagolagoina ai tupe toe-fa'afo'i mo e na faia teuga-tupe. O nei pepa o fa'amaumauga o le a maua mai ai fa'amatalaga o nei tupe toe-fa'afo'i, ina ia manino ai le fa'ama'apeina o teuga-tupe na fai. E fautuaina e le Ofisa Su'etusi le Matagaluega ina ia saunia lelei pepa totogi e lagolagoina ai tupe toe-fa'afo'i, e iloa ai le na faia le teugatupe, teugatupe toe-fa'afo'i, ma ia toalu ni saina e fa'agaoioia ai le teugatupe o le Talataupe o Tupetausi Fa'apitoa;
 - Mai le asiasiga na fai o Upolu, e tusa ma le 90% o pisinisi na asiasia e le i faia a latou Fa'amatalaga o Lafoga e tusa ai ma le Vaega 4, Tulafono o Lafoga o Tupemaua 1974. O le tele a o le Au Faioloa lautele e fa'apea, latou te le o manino lava i Tala'aga o Lafoga;
 - E toalu (2) le Au Faioloa i Upolu na ta'u mai i le matou Au Asiasi e fa'apea, mo le tausaga 2009, e \$440 (ta'i \$220) na totogi i nisi o le au faigaluega a le Matagaluega ia Ianuari 2009, ae o'o mai i le taimi o le matou asiasiga e le i maua atu lava ia lisiti ma laisene;
 - Sa matauina le vaivai o le galuega a le Vaega o Tupe a le Matagaluega o faia e tulituliloaina ai aitalafu o tiute tolopo. O nisi o le au-aitalafu nei, e le i faia lava se totogiga mo le tolu (3) tausaga talu ona tatala latou talataupe i le Matagaluega;
 - E leai se Tusi Ta'iala o le Tausiga o Tusi a le Matagaluega mo le fa'atonutonuina o le aufaigaluega i le fa'atinoga o latou tiute;
 - E leai se lipoti tautupe mo fonotaga a le pulega i masina ta'itasi. O le fa'amatalaga a le Pule Lagolago mo Tupe sa iai, e leai se lipoti na saunia ona e leai lava ni fonotaga a le pulega na faia.
3. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o lei lolomia le Lipoti peita'i e o'o mai i le taimi mo le lolomiga o le Lipoti e le'i fa'aogaina lava lea avanoa.

Matagaluega o Galuega, Fela'ua'iga ma Atina'e Tetele

Vaitau e Aofia i le Su'ega:

1 Iulai 2007 tau 30 Iuni 2008

Otootoga o Mataupu Na Maua i le Su'ega:

1. O mataupu o lo'o taua i lalo sa matauina i puipuiga fa'atausi tusi ma puipuiga fa'alotoifale:

- Sa matauina le vaivai o puipuiga i luga o le aoina o lisi ma togi-pau a e mau-totogi, ma o le taunu'uga o se tasi o le au mau-totogi ua alu ese ma Samoa e le i totogia mai le \$8,720 o aitalafu tu'ua o le mau-totogi;

- Na fa'amutaina e ala i le fa'amavae se tasi o le afaigaluega i le aso 30 o Aperila 2008 peita'i na maua lava lona totogi e o'o i le aso 01 o Iuni 2008 ma tula'i mai ai se aitalafu i le Malo i le \$733.34;
 - E leai se Api Saini e fa'amaui ai le auai i galuega, ina ia fa'amaonia ai ia totogi ma fa'amanuiaga aemaise ai le iloilogia o galuega fa'atino i le vaega e i ai Komiti Fa'atonu o Fela'ua'iga, Vaega o Va'alele Savili, Vaega o Fale ma le Vaega o Auala;
 - E tele ni aseta taugata na fa'atupeina i le paketi a le Matagaluega ua leiloa mai nofoaga sa tataua ona i ai. O nisi o nei meatotino e i ai masini talavalava, pusa aisa, ogaumu, nofoa ta'avili ma kapeneta o faila, masini-pu'eata, laulau-'ai, ma nofoa ma nisi aseta e pei ona i ai i Fa'amatalaga fa'aopoopo, ae le i lipotia mai lava e le au-asiasi a le Komiti o Fale. E leai ni fa'amaumauga o nei aseta o ta'ua i Minute o fonotaga a le Komiti Fa'atonutonu o Fale.
2. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o lei lolomia le Lipoti. O lo'o fa'agasolo atu i lalo tali na tu'uina mai e le Matagaluega.
- O taumafaiga a le Matagaluega e avea ai ma sui o le Komiti o Fale a le Malo mo le toe fa'aolaina mai o le \$8,720.00 o aitalafu tuua mai le na nofoia le fale ua le manuia ona ua malaga i atunu'u mamao le o lo'o a'afia. Matou te manatu e talafeagai le talosagaina o leLoia Sili ina ia uia ala fa'aletulafono aga'i i le o lo'o a'afia pe a toetaliu mai i fanua;
 - I lo matou manatu o le totogi fa'asili e \$733.34 e mana'omia se fa'amalamalamaga mai le Matagaluega o Tupe talu ai ona o fa'amaumauga talafeagai mo lona fa'amavaega e afua mai le aso 30 Aperila 2008 sa mua'i tu'uina atu i le Matagaluega o Tupe, ma o lona totogi ma fa'amanuiaga o lona fa'amavaega sa totogi i le Aso 6 Me 2008. A mae'a loa totogi fa'ai'u ma fa'amanuiaga o le fa'amavaega na faia, o le taofia o ni isi totogi fa'aopoopo, e tataua lava ona fa'atino e le Vaega Fai Totogi o le Matagaluega o Tupe;
 - Ua i ai se faiga fou mo api saini. Talu mai Iulai 2009 o tagata faigaluega uma a le Matagaluega ua moomia le saini i le api saini e tasi fa'atua i le faiga tuai lea e tofua le vaega ma le latou api saini. O le Vaega o Auaunaga Lautele ua gafa nei ma le mataituina o le api saini. O fa'amanatu ua maea fa'alauiloa e ala i le feau fa'alotoifale ma ua faitauina uma le le auai i le galuega e aunoa ma se fa'anoi o aso malolo e le totogia;
 - O le fautuaga i aseta ma lesitala o aseta ua fa'amaui ma talia mo le fa'aleleia. Ua i ai nei se faiga fa'avae mo aseta ma o aseta sa lipotia le leiloloa ua maua nei sa fa'aaoga i isi nofoaga e ese mai nofoaga masani e aunoa ma se fa'amauiina.

Matagaluega o Tina ma Tamaita'i, Atina'e o Nu'u ma Afioaga ma Agafeso'ota'i

Vaitau e Aofia i le Su'ega:

1 Iulai 2007 tau 30 Iuni 2008

Otootoga o Mataupu Na Maua i le Su'ega:

1. O mataupu o lo'o taua i lalo sa matauina i puipuiga fa'atausi tusi ma puipuiga fa'alotoifale:
 - O tupemaua uma lava a le Matagaluega e aoina i Savai'i, sa fa'alisitia i tusi lisiti lagolago e tausia e le Vaega o Tina i Savai'i, ma aumai ai i le Ofisa i Apia mo le fa'alisitia i lisiti-autu ma teuina i faletupe. O lea faiga ua fai ma mafua'aga o le tuai na'ua ona fa'alisiti i lisiti-tumau ma tuai ai fo'i ona teuina i faletupe;
 - O Talatautupe o Tupe-Ono Totogi mai a le Matagaluega e \$1,505,403 mo le tausaga o lo'o su'eina ua fa'ateleina i le \$436,969 talu mai le tausaga talu ai. O le tele o nei aitalafu tu'ua e mafua mai i aitalafu i le falelomitusi e lei totogia, ma e ono le toe-totogia lava;
 - E tele naua le fa'atupulai'a o Tupefa'aalu i Taumafa mo le tausaga 2007/2008. O tupe na fa'atauaina mo tupe fa'aalu e \$9,000 peita'i o le tupe na fa'aalu e \$42,674 i totonu o le 2008 e tusa ma le 375% le fa'asili o tupe-fa'aalu;
 - O le Lesitala o Aseta tumau e le atoatoa. E i ai ni aseta na matou va'aia ae le o tusia i totonu o le Lesitala o Aseta a le Matagaluega, o nisi fo'i e le o i ai i nofoaga e tatau ona i ai;
 - E tele na'ua aseta sa maua ua le o iai, ma ua le mafai e le Matagaluega ona maua pe o fea ua fai i ai nei aseta;
 - E maoa'e le fa'aaogaina o telefoni fe'avea'i. O ni i si o vala'au sa faia i totonu o nei telefoni feavea'i e sili atu i le tolusefulu (30) minute i le vala'au, ma se tasi o vala'au maoa'e e latalata i le lua (2) itula o fai.
2. O Galuega fa'atino mo le Telefoni, Eletise ma le Vai ua sili atu le fa'aalu i totonu o le Tausaga Fa'aletupe 2007/2008.
3. Sa tu'uina i le Matagaluega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Matagaluega:
 - O tupemaua sa aoina mo le Vaega o Tina ma Tamaitai i Savai'i e patino i tupe lesitala mo polokalame e a'oa'o ai tomali. O ia polokalame e masani ona fa'atino mo se vaiaso i tua i nu'u. O le tinoitupe e aoina mai ai e fa'atoa fa'ao'o i Apia pe a mae'a le a'oa'oga po'o le fa'atali foi se'i i ai se isi o le aufaigaluega e malaga i Apia. O le fa'atinoga atoa o le galuega lenei sa gafa ma le aufaigaluega o Auaunaga Tau Atinae o Nu'u i Savai'i ma o latou foi ia e feagai ma le momoliga o tupe i Apia. O lenei la ua fofo le mataupu i le fa'ase'e lea o lenei matafaioi i le Vaega o Auaunaga Lautele;
 - O aitalafu tuua mai le 1996 i le 2003 i le aofa'iga e \$399,986.06 ua mae'a nei ona tusi esea tusa ai ma le FK(10)47 o le aso 9 Novema 2010. O lo'o matou

tu'uina atu pea tusi fa'amanatu o aitalafu i le mamalu o le au aitalafu e aofia ai ma isi Matagaluega a le Malo. Ua mae'a foi ona matou sailia le fesoasoani a le Matagaluega o Tupe mo ni vaega a tupe e fa'atatau mo le totogiga o aitalafu a Matagaluega. I le taumafai ai e fo'ia lenei fa'afitauli ua fa'atula'i ai nei se tagata ofisa fa'apitoa mo le va'aiga o aitalafu. O le Vaega o Lomiga ua mafai nei ona fa'afeso'ota'i sa'o i le polokalamae a le Matagaluega o Tupe o le Finance One ma o le fa'alisitia o tupe maua o le a mafai lava ona faia i le Ofisa i Matautu Tai i le lumana'i;

- O le maoa'e o le si'itia i le tulaga o tupe fa'aalu mo taliga malo sa patino lea i fa'aaloaloga sa ma'au i ai le Minisita ma le Ofisa Sili i le tele o Malo mai Fafu. E le gata i lea o ni i si o tupe fa'aalu mo mea taumafa e aofia ai fonotaga fa'alotoifale e pei o Fono a le Pulega, Fono a Soa Komiti o le Tutoatasi, Komiti o le Ie Samoa, tapenaga o fuafuaga alualu mamao ma fa'atalanoaga o avanoa faigaluega a le Matagaluega;
- O le lesitala o aseta o se mataupu ua leva ona fa'aletonu mai tausaga ua tuana'i ma fa'aauau ai lava. Ua i ai nei se suiga lelei aemaise lava i fa'amaumauga o aseta fou pe a fa'atau i tausaga lata mai;
- O le mataupu i aseta leiloloa, o ni i si o nei aseta sa fese'eta'i lava mai lea vaega o le aufaigaluega i lea vaega e aunoa ma se fa'amaumauina, ma ua tupu ai le fa'afitauli o le le mafai ona tuliloaina o ia aseta;
- O le atugaluga i telefoni feavea'i ua fofu nei i le aveesea lea o le mafai ona vili i telefoni feavea'i i telefoni uma se'i vagana ai laina telefoni a le Ofisa Sili ma Ofisa Sili Lagolago. O lenei suiga ua tula'i mai ai se fa'aleleiga i lea vaega;
- O le fa'asiliga o tupe fa'aalu i luga atu o tupe fa'atatau mo pili o telefoni, moli ma le eletise e afua mai lea i le si'itia o pili i le iunite o le vai ma le eletise. Aemaise ai foi pe a silasila i le fa'atupulaia o le aufaigaluega o le Matagaluega e tusa ma le 110, ua si'itia ai foi le fa'aaogaina o le telefoni, eletise ma le vai.

Ofisa o le Loia Sili

Vaitau e Aofia i le Su'ega:

1 Iulai 2007 tau 30 Iuni 2008

Oototoga o Mataupu Na Maua i le Su'ega:

1. Sa taofiofia tupe fa'aalu i lalo o tupe fa'atatau i le 11% po'o le \$260,275.
2. E le i ausia tupe maua na fuafuaina.
3. O mataupu o lo'o taua i lalo sa matauina i puipuiga fa'atausi tusi ma puipuiga fa'alotoifale:
 - E leai se Tusi-fa'amau o Tupemaua o saunia ma tausia e le Ofisa ona ua fa'alagolago tele i Lipoti Fa'atusatusa o le Paketi a le Matagaluega o Tupe, ma o le mea lea ua leai ai ni fefa'apalenia'iga e mafai ona fai i tupemaua e le Ofisa ma fa'amaumauga a le Matagaluega o Tupe mo le tausaga 2007/2008;
 - Sa i ai fo'i fa'atuai i le fa'alisitiga autu o lisiti ma le teuga o tupe i le faletupe e le Ofisa. O le fa'atuai e mafua mai i le ituaiga faiga-fa'atino o lo'o fa'aaogaina,

lea e fa'apea o lisiti e totogi i le Ofisa o le Loia Sili ona toe ave lea i le Matagaluega o Tupe e fa'alisiti ai ma ave e teu i le faletupe. E tatau ona toe iloilo e le Loia Sili ma le Matagaluega o Tupe lea ituaiga o faiga-fa'atino o le aoina o tupe, ina ia fo'ia ai le fa'atuai ona teu;

- E le i atoatoa lava le fa'atumuga o le api-saini ma pepa o aso malolo, fa'apei o le tele o le aufaigaluega e le i fa'atumua o latou taimi faigaluega ma aso malolo i totonu o le api-saini;
 - O tupe moni na fa'aalu mo telefoni e \$22,678 mo le 2007/2008 ma e \$10,295 ua si'itia ai tupe fa'aalu;
 - O aitalafu tu'ua o telefoni mai le 2006/2007 e \$4,716 na totogi i le tausaga o lenei su'ega.
4. Sa tu'uina i le Ofisa le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Ofisa.
- O le mafai ona taofiofi o tupe fa'aalu i le 11% i lalo mai o tupe fa'atatau o le pine lea o le lelei fa'afae o tupe fa'aalu a le Ofisa;
 - O le tele o tupe maua e afua mai i fa'amasinoga o mataupu savili ma le tusia o tulafono mo Fa'alapotopotoga Tumaoti. O ia galuega e tele lava ina lomina pili i le tausaga e fai ai, peitai e fa'atoa totogiina mai e i latou i vaitau mulimuli ane ai;
 - Ua tausia nei e le Ofisa o le Loia Sili tusi fa'amau lagolago mo tupe maua ma tupe fa'aalu;
 - Ua si'itia le tulaga o le galulue fa'atasi a le Matagaluega o Tupe ma le Ofisa o le Loia Sili i le fa'alisitia ma le teuina o tupe maua;
 - Ua fautuaina le aufaigaluega ina ia fa'atumu taimi faigaluega ma lapataia le usitaia o manaoga mo le fa'amauina o taimi faigaluega;
 - O le si'itia o pili o telefoni sa alu fa'atasi ma le si'itia o fa'amasinoga tau soligatulafono lea sa mo'omia ai le feso'otaiga i telefoni feavea'i ma le Malu o le Malo;
 - O tupe fa'asao o le tausaga sa fa'aaoga lea e totogi ai aitalafu tu'ua o telefoni.

Ofisa o le Komesina o Faiga Palota

Vaitau e Aofia i le Su'ega:

1 Iulai 2007 tau 30 Iuni 2008

Otootoga o Mataupu Na Maua i le Su'ega:

1. E le i ausia e le Ofisa tupe maua na fuafuaina.
2. O mataupu o lo'o taua i lalo sa matauina i puipuiga fa'atausi tusi ma puipuiga fa'alotoifale:
 - O le aitalafu tu'ua talu mai le aso 6 Tesema 2004 i le Pepa-aitalafu Numela 26651 e \$950, e le i totogia lava. Sa lipotia lenei mataupu i le 2004 sei tau mai lava i le 2007, peita'i e leai lava se gaoioiga ua foliga faia mo le toe fa'aolaina;

- E leai ni tauofoga na faia mo le fa'atau o nisi o komepiuta ma lomitusi e sili atu i le ta'i \$5,000 le tau, e tusa ai ma faiga fa'avae a le Malo ina ia mautinoa ai o faleoloa tonu ia e fa'atau oloa i tau lelei mo aseta ua fa'atau mai.
3. Sa tu'uina i le Ofisa le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Ofisa:
- O le le ausia o tupe maua fuafuaina sa mafua mai lea i le leai oni faiga palota laiti e pei ona fuafua i le tala fa'ataua o le tupe;
 - O le aitalafu tuua ua maea nei ona totogiina (Lisiti numela 461732);
 - O komepiuta sa mo'omia e fa'apitoa lava i manaoga o le Ofisa. O le ala lea sa fa'atau tasi mai ai i le Kamupani e tasi aua ua na'o latou e mafai ona fa'atauina lea ituaiga komepiuta (Dell).

Ofisa o le Komesina o Sulufaiga

Vaitau e Aofia i le Su'ega:

1 Iulai 2007 tau 30 Iuni 2008

Oototoga o Mataupu Na Maua i le Su'ega:

1. Sa mafai ona taofiofia i lalo o tupe fa'ataua ia tupe fa'aalu i le \$29,891.
2. O mataupu o lo'o ta'ua i lalo sa matauina i puipuiga fa'atausi tusi ma puipuiga fa'alotoifale:
 - O le api-saini ma pepa o aso malolo e tataua ona fa'aatoatoa. O ni i si o le aufaigaluega e ave aso malolo e tusa ai ma le api-saini, ae le o tusia ia aso malolo i totonu o Pepa o Aso Malolo;
 - O le Komesina o Sulufa'iga ma le Fa'atonu o Su'esu'ega e le'i avea lava ni aso malolo mo le tele o tausaga se'ia o'o mai i le faiga fa'avae fou lea e le mafai ai ona toe totogia aso malolo e le i fa'aaogaina.
 - O le Ofisa o le Komesina o Sulufa'iga o lo'o fa'atino latou galuega i ta'avale e lua, ma o nei ta'avale ua sili atu i le ta'i sefulu tausaga o fa'aaoga, ma o lo'o fa'agaioi ai pea le Ofisa ma e foliga mai lava ua tataua a ona sui.
3. Sa tu'uina i le Komesina o Sulufa'iga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Komesina o Sulufa'iga:
 - O le 8% o le aofa'iga o tupe fa'ataua (\$29,891) ua fa'aailoa mai ai i totonu o le lipoti e le'i fa'aaogaina i totonu o le tausaga fa'aletupe o lo'o su'esu'eina, ma o se tasi o tulaga e le ma'alofia i tua atu o le matou mafai;
 - Ua mae'a fa'aleleia fa'aletonu sa matauina i api saini ma pepa o aso malolo;
 - O fa'amanuiaga tau i le loa o aso o le soifua auauna o le Komesina o Sulufa'iga ua mae'a ona totogi i totonu o le tala fa'ataua o le tupe 2011/2012;
 - Sa fa'atauina se ta'avale Hyundai Tucson (2009) mo le Komesina o Sulufaiga e sui a'i le ta'avale tuai o le Toyota Hilux, o lea na tusiesea i le 2010.

Komisi o Tagata Faigaluega a le Malo

Vaitau e Aofia i le Su'ega:

1 Iulai 2007 tau 30 Iuni 2008

Otootoga o Mataupu Na Maua i le Su'ega

1. O mataupu o lo'o ta'ua i lalo sa matauina i puipuiga fa'atausi tusi ma puipuiga fa'alotoifale:
 - O le Galuega Fa'atino ma Faiga Fa'atino o le Pulega o Fa'amatalaga o Punaoa-Tautagata Faigaluega a le Malo, na sili atu tupe fa'aalu i le \$18,031 nai lo tupe na fuafuaina;
 - E leai ni fa'apalenia'iga o tupe fa'aalu mo le fa'agaoioiga fa'apea ai ma totogi o tagata faigaluega i le va o fa'amaumauga o le Komisi o Tagata Faigaluega o le Malo ma fa'amaumauga a le Matagaluega o Tupe;
 - Na fa'aali mai e le Komiti Fuafuaina Totogi e fa'apea e ese fua o totogi na fa'aaoga i le galuea'iga o lafoga-taofiofi. O nei alauni o tupemaua fa'alua ma e tataua ona lavea i lafoga o tupemaua fa'alua e 27% ae le o le 15% e pei ona totogi ai nei;
 - O Fa'amanuiaga o Aso Malolo na totogiina atu i ni i si o Ofisa Konekalate e le mafai ona fa'amaonia ona o le le atoatoa o le tulaga o i ai le tausiga ma le va'aiga o fa'amaumauga o ni i si o Pepa Aso-malolo. O Paleni tauave mai i pepa aso malolo e le o fa'aalia mai ai le paleni o le aofa'iga tonu o aso malolo e le i avea ma totogia i tagata faigaluega mo latou fa'amanuiaga o le fa'aiuga o le tausaga fa'akonekalate;
 - E i ai Aso Malolo e le totogia e le i galuea'ina lava e le Komisi, ma o nei totogi fa'asili e tataua lava ona toe fa'aola mai;
 - O le lesitala o aseta tumau e le o atoatoa i le tulaga tau fa'amatalaga o le talaaga o aseta ma le tulaga o aseta o i ai nei;
 - Mai pili o telefoni na filifilia mo le vaitau fa'aletupe o lo'o su'esu'eina, na fa'aalia mai ai e tusa ma le 50% po'o le sili atu fo'i e mo telefoni fe'avea'i. O nei vala'au i telefoni fe'avea'i e le mafai ona fa'amaonia pe o ni telefoni mo galuega a le Ofisa;
 - I le su'easu'ega o pili o telefoni, na maua ai e tolu laina o telefoni ma fesi e lua sa fa'aaoga i le Polokalame Fa'amalosia Ofisa (ISP) a le Komisi o lo'o fa'aaupu pea ona totogi e ui lava ina le o toe fa'aaogaina. Na fautuaina le Komisi ina ia fetu'una'i ma le Samoa Tel e ave'ese ai nei laina le fa'aaogaina se'i fa'asao mai ai tupe.
2. Sa tu'uina i le Komisi le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Komisi:
 - O tupe fa'aalu fa'asili sa matauina i lalo o Galuega Fa'atino ma Faiga Fa'atino o le Pulega o Fa'amatalaga o Punaoa-Tautagata Faigaluega a le Malo, na mafua ona o galuega sa le fuafuaina. Ua i ai nei puipuiga fa'alotoifale e mata'ituina ai le fa'aaogaina o le initaneti i le Vaega o Fa'amatalaga Fa'atekonolosi;

- Ua amata nei ona fa'atino e le Vaega Tautupe le fefa'apalenia'iga o a matou fa'amaumauga ma le Matagaluega o Tupe mo le fa'agaoioiga o galuega ma tagata faigaluega;
- O alauni mo le Komiti e Fuafuaina Totogi o lo'o sa'o lava le fa'avasegaina i le fua e 27% o tupemaua fa'alua, ae le o le 15% e pei ona galuea'ina ai i le vaitau o le su'ega;
- Ua fa'afouina nei le faiga fa'atino fa'atekonolosi o aso malolo i le ta'i lua vaiaso mo le aufaigaluega faifeagaiga, aufaigaluega tumau ma le aufaigaluega togi-aso. Ua avea lea ma auala e tausia ai e le Vaega Taupulega fa'amaumauga sa'o mo paleni uma lava o aso malolo;
- Ua mae'a nei ona fa'atinoina e ala i le fa'aolaina o tupe totogi fa'asili mo aso malolo le totogia o le aufaigaluega i le vaitau o le su'ega;
- Ua mae'a ona fausia e le Vaega Tautupe ma le Vaega o Fa'amatalaga Fa'atekonolosi se faiga fa'atino i luga o le polokalame fa'akomepiuta (Microsoft Access) le lesitala e tusia uma ai aseta uma a le Ofisa. O lo'o fa'afouina pea i masina ta'i tasi le lesitala talu mai le fa'atinoga o lea faiga fa'atino;
- O le tele lava o auala o feso'otaiga na tu'uina mai e matou pa'aga tau-auaunaga o lo'o faia i luga o telefoni feavea'i, ma o le ala lena o le tele o vala'au i telefoni feavea'i.
- O le a fa'aauau pea ona taofi e le Komisi laina telefoni le fa'aaogaina, talu ai fuafuaga mo le aga'i i luma lea e moomia ai le toe fa'atele o le ofisa i i si vaega o le foga fale lua (2) o le Fale.

9. Fa'alapotopotoga a le Malo

O tulafono laualuga lava o lo'o puleaina ai lipoti fa'aletupe a Fa'alapotopotoga taitasi a le Malo, o le Tulafono o Fa'alapotopotoga a le Malo (Fa'atinoga o Galuega ma le Mafai ona Tali Atu) 2001. E manaomia e lenei Tulafono le saunia e Fa'alapotopotoga a le Malo fa'amatalaga tautupe fa'aletausaga ma tu'uina atu mo le su'eina i totonu o le fa (4) masina mai le fa'ai'uga o le tausaga talu ai.

E mo'omia le Pule ma Su'etusi Sili ina ia su'eina lipoti fa'aletupe a Fa'alapotopotoga a le Malo ma tu'uina atu manatu fa'asu'etusi mo ia lipoti.

9.1 Mataupu na maua i su'ega ma fautuaga mo Fa'alapotopotoga

I le mae'a ai o le su'ega o tusi, e tu'uina atu e le Ofisa Su'etusi se tusi fa'apulega i le Fa'alapotopotoga e fa'amatala atu ai mataupu sa matauina i le su'ega fa'atasi ai ma fautuaga mo le fa'aleleia.

O lo'o fa'asolo mai lalo oototoga o nei tusi tau-pulega na aveina i Fa'alapotopotoga na su'eina i totonu o le 2009/2010. O lo'o oototo atu ai fo'i ma tali mai Fa'alapotopotoga pe afai na aumai i le Ofisa Su'etusi.

Fa'alapotopotoga o Tau'i Mo Fa'alavelave Fa'afuase'i

Fa'amatalaga tautupe na su'eina: 30 Iuni 2009

Su'etusi: Ofisa Suetusi

Manatu Fa'asu'etusi na Fa'aali: Lelei

Oto'otoga o Mataupu Na Maua i le Su'ega:

1. O le vaaiga lautele i le mafai ona tali mai o le Fa'alapotopotoga i le tulaga tautupe ua fa'alia ai le tausisi i faiga lelei ma le aga'i pea i luma o le tulaga o tupe.
2. Sa tu'uina i le Fa'alapotopotoga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O mataupu sa laga e aofia ai faiga fa'atausi tusi mo foa'i i le Komiti o le Tutoatasi, fa'alauiloaina o tupemaua o lafoga o penisini ma le fa'alauiloaina o aofa'iga o lafoga i luga o oloa ma galuega fa'atino. Sa talia le tele o fautuaga a le Ofisa Su'etusi ma aumai ai fo'i se tu'uallalo i auala ma fa'aleleiga atili o le fa'atinoga o fautuaga.

Fa'alapotopotoga o Faleoloa Tau-Fa'ato'aga

Fa'amatalaga Tautupe na su'eina: 30 Iuni 2009

Su'etusi: Lesa ma Penn

Manatu Fa'asu'etusi na Fa'aali: Lelei

Oototoga o Mataupu Na Maua i le Su'ega:

1. Sa i ai sese i le galuea'iga o totogi o le aufaigaluega ma sa fautuaina ai le Aufai-totogi ina ia fa'atino a latou tiute ma le mata'alia, ina ia alofia ai le faia o tupe-totogi fa'asili po'o le le-atoa o tupe-fa'aalu mo fa'amanuiaga ma totogi.

2. Sa toesea e le Faletupe lafoga mai tului o teugatupe fa'avaitaimi a le Fa'alapotopotoga e ui lava o le Fa'alapotopotoga e le tatau ona totogia se lafoga o tupe maua. Sa fautuaina le Fa'alapotopotoga e talosagaina le toe fa'aola mai o nei tupe ua toesea.
3. E i ai aitalafu tau-atunu'u i fafo e \$106,992 na tau'ave mai tausaga ua tuana'i, ma e foliga mai o nei aitalafu e le toe maua mai. Sa fautuaina le Komiti Fa'atonu ina ia toe iloilo le tulaga ua i ai nei aitalafu mo le tatau ona soloia e ala i se pepa mo le Kapeneta mo sana fa'ai'uga.
4. O oloa tuai i le aofa'iga e \$250,000 o lo'o tauave pea e le Fa'alapotopotoga e ui ina sa fautuaina e soloia.
5. Sa tu'uina i le Fa'alapotopotoga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Fa'alapotopotoga:
 - Ua mae'a nei ona foia le fa'afitauli ina ia fa'aitiitia ai sese o le galuea'iga o totogi o le aufaigaluega. Ua lapataia i latou o lo'o gafa ma ia matafaioi ma ua fautuaina lana supavaisa, o ia foi le Pule Lagolago o le Vaega o Auaunaga Lautele ma Tupe ina ia iloilo lelei le galuea'iga o totogi o le aufaigaluega. Ua taumafai foi e toe fa'aaoga api saina ona e foliga mai o uati fa'amautaimi sa alia'e ai le fa'afitauli;
 - O le a fai se fuafuaga i le toe fa'aola o le lafoga ua totogi i le Matagaluega o Tupe Maua;
 - O le tele o aitalafu tau-atunu'u i fafo e fa'asino tonu i oloa tau fa'atoaga sa auina atu i Niu Sila i le 2005. O esi ma ulu mata sa fa'aofi atu i Niu Sila ina ua uma ona faia ni su'esu'ega fa'asaaienisi e le Vaega o Fuala'au Aina a le Matagaluega o Fa'atoaga ma le Faleoloa Tau Fa'atoaga. O le a saunia se pepa i le Kapeneta e soloia ai loa aitalafu nei:
 - Matagaluega o Fa'atoaga a Niu Sila - \$1,763.70;
 - Mellow Foods - \$66,665.33;
 - CSI - \$21,548.99;
 - T & A Suprette - \$17,014.37.
 - Sa fa'amaonia e le Komiti Fa'atonu i le latou fonotaga o le aso 28 Me 2009 le soloia o oloa i le aofa'iga e \$250,000. O lenei aofa'iga e aofia ai totoga tuai fa'aleoleo mo masini, vailaau tau fa'atoaga, mea fagota ma mea'ai-fagamanu. O le 70% o nei oloa sa foa'i mai e Iapani mo le togafitia o le fa'ama'i o le lega. O nei oloa sa taumafai e fa'aalu i faleoloa i Fugalei ma Vaitele i le tau e \$5.

Pulega o Petipetiga ma Tu'uga

Fa'amatalaga tautupe na su'eina: 30 Iuni 2009

Su'etusi: Ofisa Su'etusi

Manatu Fa'asu'etusi na Fa'aali: Lelei

Otootoga o Mataupu Na Maua i le Su'ega:

1. Na fautuaina le toe fa'aleleia atili le fa'ata'atiaga o Fa'amatalaga o Tupe ina ia mafai ona atoatoa le tausisia o manaoga o Ai'aiga Fa'avaomalo i le Fa'alauiloaina o Lipoti Fa'aletupe (IFRS) aemaise ai le vaega 24 (IAS 24) o ia manaoga.
2. Sa tu'uina i le Pulega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. Sa toe fa'amalamalama atili ma toe fa'amautu mai e le Pulega lona tiute ma le matafaioi e fa'atino galuega fa'atausi tusi ma fa'aleleia ai le saunia o Fa'amatalaga o Tupe ina ia usitaia manaoga o Aiaiga Fa'avaomalo i le Fa'alauiloaina o Lipoti Fa'aletupe (IFRS) aemaise ai le vaega 24 (IAS 24) o ia manaoga.

Faletupe o Atina'e o Samoa

Fa'amatalaga tautupe na Su'eina: 30 Iuni 2009

Su'etusi: Betham & Co

Manatu Fa'asu'etusi na Fa'aali: Lelei

Otootoga o Mataupu Na Maua i le Su'ega:

1. Mai se su'esu'ega na faia, na maua ai e fa'apea e i ai nonogatupe na galuea'ina ma tu'uina atu i e nonotupe, o tagata e leaga tala'aga i le totogiga o aitalafu, ma i latou fo'i e le moni latou tupemaua e ono gafatia ai le toe totogiga o tupe-nono.
2. Mo nonogatupe fou, sa maua ai e fa'apea, o nei nonogatupe ua talia ma fa'aalu ae aunoa ma se tapa o se fa'amaoniga mai i si faletupe pe le o faia ai fo'i ni latou nonogatupe. O nei tusi-fa'amaoni o nonogatupe mai i si faletupe, e mautinoa ai e le Faletupe o Atina'e o le au-nonotupe ia, o lo'o latou aumai uma fa'amatalaga e manaomia, e fai ai fa'ai'uga mo le puipuiga o le fa'aaluga o tupe.
3. O le ogaoga o mataupu na laga i le lipoti a le Su'etusi o le lotoifale aemaise ai le fa'auuauina o le alia'i mai pea o fa'aletonu o faiga pi'opi'o, ua matilatila ai lava le mo'omia e le pulega o ni fuafuaga mamao e fo'ia ai ia fa'afitauli. Na fautuaina le Faletupe o Atina'e mo le fa'atuina o se Komiti o Pulega o Fa'afitauli, e mata'ituina ai le fa'asologa o le fa'atauga o meatotino ma nisi mea tutupu e mulimuli mai ai.
4. O le Faletupe o Atina'e o Samoa, o lo'o i ai se faiga fa'atino fa'aleiloga o lo'o fa'aleoleo, peita'i e leai lava se fuafuaga toe fa'aola talafeagai ua saunia. E ui lava ina i ai fa'aleoleo i aso ta'itasi o faiga fa'atino, ae e leai lava se nofoaga o feua'iga o i ai, i le tulaga o se pagatia e a'afia ai le nofoaga o i ai nei.
5. Sa tu'uina i le Faletupe le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Faletupe:

- Ua matauina fautuaga mai su'etusi i le fa'agaoioiga o talosaga mo nonogatupe. O lea ua fa'atinoina e le Pulega a'oa'oga o le fa'afou ma fa'amanatu ai i le aufaigaluega e feagai ma le faiga o nonogatupe i faiga fa'avae mo le tausisia ma le fa'atinoga lelei ina ia mautinoa ai o su'esu'ega po'o aiaiga o lo'o sa'o le iloiloga o talosaga ina ia fa'aitiitia ai fa'afitauli e alia'i mai i le totogiga o nonogatupe;
- O le fautuaga i fa'amaumauga mo nonogatupe ua fa'amauina foi mo le toe fa'aleleia. O le a fa'atino fo'i lea tulaga e ala i aoga fa'amanatu ina ia fa'amautinoa ai le mata'alia i le tausisia o fa'amatalaga ma fa'amaumauga e tatau ona i ai mo iloiloga o talosaga;
- Talu mai le pasiaina o le Tulafono a le Faletupe o Atina'e 2010, ua fa'atu ai se Komiti o Pulega o Fa'afitauli mo le fa'atinoina o ona tiute e ala i le atina'ega ma le fa'agaoioiga o faiga fa'avae mo le fa'amalosia o le pulega o gaoioiga e foia ai fa'afitauli o le Faletupe;
- E fiafia e fa'aailoa atu le i ai nei o se nofoaga fa'aleoleo i Siusega. O lea fale o teuina ai fa'amaumauga taua aemaise fa'amaumauga fa'a komepiuta ma o lo'o feso'ota'i foi i le lala i Savaii. O faiga fa'aleoleo e iloilo ma mata'ituina i aso taitasi e le vaega o loo gafa ma ia fa'amatalaga. O fa'amaumauga tuai ua fa'asee i isi nofoaga ina ia maua se avanoa mo fa'amaumauga fou. O le Vaega o lo'o gafa ma meatotino e i ai lava le latou fuafuaga fa'aola mo le fale ma e faia so'o fo'i a latou fa'ata'ita'iga ma le Ofisa o Tineimu, Leoleo ma le Ofisa o Fa'alavelave Fa'afuase'i (DMO).

Fa'alapotopotoga o le Malosi Fa'aeletise

Fa'amatalaga tautupe na Su'eina:

30 Iuni 2009

Su'etusi:

Betham & Co

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. E leai lava ni fa'amaumauga aloa'ia o gaoioiga o puipuiga fa'alotoifale fa'apei o fa'asologa o lisiti o tinoitupe, totogiga o tupe ma tupe-ono totogi atu, puipuiga o tinoitupe, totogi o le aufaigaluega, oloa, tausiga o tusi-fa'amau lautele ma tusi o ulua'i fa'amau. O lea na taunu'u ai i se tulaga le manuia le mata'ituina ma le iloiloga tuto'atasi o feuaiga ma puipuiga fa'alotoifale atoa ai ma le malupuipua o ana meatotino.
2. E fa'aopoopo atu i ai, sa matauina e fa'apea o le polokolame fa'akomepiuta o le IXP e leai ma ni fa'amaumauga aloa'ia e fa'aailoa mai ai pe fa'apefea i lona aotelega ona feso'ota'i le faiga fa'atino lea ma le lasi o fa'atinoga fa'atausitusi lea e lagolagoina le tusi-fa'amau lautele. O le vaivai o le malamalama pe fa'apefea ona galucaina le faiga fa'atino lea aemaise ai lava pe fa'apefea i soa-faiga fa'atino eseese ona feso'ota'i atu o le tasi i le i si ma le tusi fa'amau lautele, lea e ono fa'afaigata ai le fefa'apalenia'iga ma fa'atuai ai le tausiga o tusi ma le saunia o tala tautupe.
3. O Aseta o Galuega fa'atino Tau-eletise a le Fa'alapotopotoga, aemaise ai lava aseta tau-afi ma aseta-fa'asoasoa, o lo'o foliga mai i fa'amatalaga tautupe o lo'o tusia i le tau na fa'atau a'i e aofia ai le tau toe-fetu'una'i na faia pe ua sefulu tausaga talu ai. O le tau na fa'atau mai ai, lea e tusia ai nei aseta i totonu o fa'amatalaga tautupe a le Fa'alapotopotoga, ua le talafeagai ai nei ona atagia tonu ai le tau moni o nei aseta. Sa fautuaina e le Su'etusi ina ia

toe-fetu'una'i pea tau o nei aseta pe ta'itolu tausaga ma fai, ae ia fai e se tagata poto fa'apitoa tutoatasi i fetu'una'iga o tau o aseta.

4. O afi suau'u o i totonu o fa'amatalaga tautupe a le Fa'alapotopotoga, sa fua le ola fa'aaogaina mo le luasefulu (20) tausaga. A fua atu i le tele o fa'aletonu o afi talu ai nei ma le maualuga o le galuea'iga tau-fa'aola so'o o afi, o le 20 tausaga aoga o nei afi ua le talafeagai. O se ola aoga pu'upu'u pe (sefulu) 10 i le sefululua (12) tausaga e ono talafeagai. O le 20 tausaga ola galue o afi suau'u lea o lo'o fa'aalu ai nei, ua le talafeagai pe a va'ai i le fa'atupula'ia o le tau fa'aola ma pepe so'o o nei afi. O le a mautinoa ai o le tau o aseta e le o tusi fa'asilia, pe a fa'atusatusa i le tau o le galuea'iga tau-fa'aola o nei afi.
5. Mai le iloiloga o fa'aopoopoga o aseta, o le aofa'iga itiiti e \$166,000 o fa'atauga o mea e le tu'u umi fa'apei o mea'ai, a'oa'oga o le aufaigaluega, ma togi pau o auunaga ua loa ona tu'ua e le i totogia, ua tusi-fa'ameatotino i le fa'aulu mai o le faiga fa'atino tau i le tausiga o tusi o le Daffron, lea e \$1.022 miliona tala le tau. Sa fautuaina le Fa'alapotopotoga e fa'apea, o tupe fa'aalu tau meatotino ma tupe fa'aalu tau tupemaua, e tatau lava ona manino ona fa'amaioio, ina ia fa'amalosia ma tausisia ai Aiaia Fa'atausitusi Fa'avaomalo (IAS 38).
6. I lipoti o le toe fetu'una'iga o tau o oloa mai lea faiga fa'atino, na aliali mai ai ni sese e le mafai e le Fa'alapotopotoga ona fa'amatala pe na fa'apefea ona tutupu. O oloa ta'itasi ua i ai le tau i Tala ae leai ni aofa'iga po'o paleni, po'o oloa fo'i ua i ai aofa'iga ae leai ni tau i Tala. O sese ua matauina, e ono tata'i atu ai i ni sese matuia i le sa'o o paleni o fa'atulagaga o tau o oloa, o lo'o lipotia i totonu o fa'amatalaga tautupe a le Fa'alapotopotoga, atoa ai ma lipoti fa'ale-tupe i fonotaga fa'alemasina a le Komiti Fa'atonu.
7. O le tuai ona saunia o fa'apaleniga o tupe e lala o le Kamupani Lafo Meli a Samoa lea sa aoina pili, ua tu'uina atu ai se tupe tele e taofia e nei lala i taimi e le talafeagai, ma e ono fa'aosofia ai le avanoa mo amioga pi'opi'o ma taunu'u ai i tupe e gau ai le Fa'alapotopotoga. Na fautuaina le vave faia o fa'apaleniga o tupe a talitupe a Lala o le Kamupani Lafo Meli i aso taitasi, e tau fai saina ai le Taiulu o Talitupe ma le Talitupe.
8. E i ai eseesega i paleni tau'ave ma paleni fa'ai'u o Talatautupe o Tupe Ono Totogi mai BL0077 e \$73,000.93, i le fa'ai'uga o Iuni 2009. E le mafai e le Fa'alapotopotoga ona fa'amalamalama pe na fa'apefea ona maua ia eseesega i le va o le paleni tauave i le amataga ma le paleni fa'ai'u. O i, e ono ta'u mai ai se fa'afitauli i le faiga fa'atino o lo'o saunia mai ai nei lipoti. Ua fautuaina e le Su'etusi le Fa'alapotopotoga ina ia saili mai se fesoasoani mai fafo, pe mai le kamupani lea na aumaia le faiga fa'atino lea, sei toe siaki le mafua'aga o nei fe'esee'esea'iga ma fo'ia ai le fa'afitauli, a leai, ia o le a fa'aauau ai pea nei sese o lipoti, ma o ni tupe gau e ono taunu'u i ai.
9. O se paleni tu'ua e \$15,497.20 mai se talitupe na fa'amatapotoina tinoitupe a le Fa'alapotopotoga mai tausaga ua tuana'i, o lo'o fa'alia e lei totogia lava ma e foliga mai e leai ma se galuega o faia i ai.
10. Sa tu'uina i le Fa'alapotopotoga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Fa'alapotopotoga:
 - O lo'o tausia pea e le Fa'alapotopotoga lana Taiala mo le Tausiga o Tusi lea e limata'ita'ina ai le tausiga o tusi, gaoioiga tau tupe, puipuiga fa'alotoifale, faiga fa'avae ma faiga masani, peita'i e tatau ona toe iloilo ma fa'afou. O le fa'atuina o se vaega fou Tau tulafono, Faiga fa'avae, Fuafuaga ma le Mata'ituga, o le a fesoasoani i le fa'amae'aina, lauliliuina ma le fa'afouina o le taiala, fa'atasi ai

ma le lagolago a le vaega o tupe ma auaunaga lautele. O le faiga lenei, o le a fa'amautinoa ai le tausisia o faiga pito sili ona lelei i puipuiga fa'alotoifale, faiga fa'avae ma fa'asologa i vaega uma o le Fa'alapotopotoga i gaioiga tautupe ma le tausiga o tusi;

- O fa'amaumauga mo le Polokalame o le Daffron sa i ai lava mai i le taimi na amata ai ona fa'aaoga ma sa teuina ma faila lea i le vaega o Fa'amatalaga Fa'atekonolosi. Sa toe fa'afouina i le isi la'asaga fou ia Novema 2008. O taiala sa i ai pea lea i totonu o le polokalame fa'akomepiuta. O le polokalame lenei o le Daffron IXP:
 - O se Faiga fa'atino mo le pulega o tupe lea e aofia ai le tusi fa'amaui lautele mo tala tautupe, tala tautupe o tupe e ono totogi atu, auivi o tala tautupe, lipoti tautupe ma i si;
 - O se faiga fa'atino o le pulega o meatotino mo oloa, aseta tumau, tusiga o galuega ma i si;
 - O faiga fa'atino o Fa'amatalaga mo e Fa'aaogaina eletise i le faiga fa'atino mo le faiga o pili o eletise, fa'alisitiga o finoi tupe, tala tautupe o tupe e ono totogi mai, ma i si.
- O le fautuaga mo aseta fa'aeletise ua matauina. O lo'o fuafua le toe fuaina o le aoga fa'aletupe o aseta i totonu o le tausaga fa'aletupe 2011/2012 fa'alagolago i luga o le fesoasoani mai a Su'etusi i le su'eina o se tagata poto fa'apitoa tutoatasi i fetu'una'iga o tau o aseta. O tu'utu'uga e tua i ai ua fa'agasolo nei mo le valaauina o ni i si e i ai le poto fa'apitoa mo fetu'una'iga o tau o aseta. O lea ua maea ona fa'atalanoaina le mataupu i le va o le Pulega ma le Su'etusi;
- O fautuaga i luga o le fa'aitiitia o aseta ma le toe fetuunaiga o tau o aseta ua matauina. O le a aofia i totonu o Tu'utuuga e Tua i ai le Fa'alapotopotoga mo le iloilo o le ola aoga o afi moli suau'u. Peita'i o ni i si itu tau le fa'aletonu o polokalame tau lipea ma le tausiga e fai sao uma i le fa'aitiitia ai o le ola aoga o ia afi moli e aofia ai ma ituaiga o afi moli ua maua;
- O le fautuaga i luga o le fa'ameatotinoaina o aseta ua matauina. O le faiga masani lava i le fa'agasologa o poloketi e fa'atinoina e le Fa'alapotopotoga, e fa'asoa i ai numera o polokalame o galuega fa'agasolo, ina ia maua uma ai tau o poloketi taitasi i le mae'a ai o ia poloketi taitasi, ona fa'ase'e mai ai lea o tau fa'amauiina mai polokalame o galuega fa'agasolo e avea ma aseta tumau, ona fa'atua fa'asolo ai loa lea o le fa'aitiitia o le aoga o o aseta. O fa'asologa ma taiala ua fa'ata'atia nei e tusa ai ma aiaiga talafeagai mo le fa'amalosia ma le fa'amautinoaina o fa'agasologa o tupe totogi atu mo le fa'aatoatoaina o le fefa'apaleni'iga o tala tautupe o polokalame o galuega fa'agasolo. O lea faiga o le a ma'utinoa ai le sa'o o le fa'atulagaina o tupe fa'aalu i le fa'agaioiga ma tupe fa'avae;
- O fautuaga i luga o oloa ua matauina. O lea eseese e mafua mai ona o le toe fesui'iga o le polokalame a le Daffron ia Novema 2008 (tausaga fa'aletupe 2008/2009), fa'aopopo i ai ma le le atoatoa o le a'oa'oina o le aufaigaluega mo le fa'aaogaina o le polokolame ina ia iloa ai sese. Ae ui i lea, sa mafai lava e le Fa'alapotopotoga o le Malosi Fa'aeletise le fa'amalosia o le fa'agasologa ma faiga fa'avae o fa'atauga, aemaise ai fo'i le atina'eina o le tomai o le aufaigaluega i le fa'agaioiga o faiga fa'atino i le a'oa'oga sa faia e le aufaigaluega a le Daffron ia Me 2011. Sa fa'atino ai fo'i i lenei a'oa'oga le

fa'aleleia o le polokolame fa'akomepiuta o le Daffron IXP mai le faiga tuai 191 i le faiga lata mai o le 3.11.1 ina ia faigofie ai ona fa'aaoga. O lipoti uma tau-faiga fa'atino o lo'o maua uma i le komepiuta e aofia ai lipoti o oloa mo le fa'amoemoe i le lauliliuina ma le fefa'apalenia'iga fa'alemasina;

- O le taliaina e le Fa'alapotopotoga o le Malosi Fa'aeletise (EPC) o le talosaga a le Kamupani Lafo Meli a Samoa e avea ma lala sa faia mo le fa'afaigofieina mo le Mamalu o le Atunuu totogi pili e totogi ai pili mo le eletise i le taimi o le totogiga o pili o telefoni i le Ofisa autu i Matafele. Sa i ai le maliliega a le EPC ma le Kamupani Lafo Meli a Samoa e tatau ai ona pasi i le Fa'alapotopotoga tupe ua aoina i vaiaso taitasi. Sa i ai foi ma se tu'utu'uga e tu'uina atu ai se Lipoti i tupe ao ma teu i totonu o le teugatupe a le EPC. Peita'i ane sa matauina pea i le tele o taimi le fa'atuai ona auina mai lipoti e le Kamupani Lafo Meli ma ua fa'apena foi ona tuai ai ma le fa'apaleniga o tusi. Sa tele ni taimi na fono ai le pulega a le EPC ma le Kamupani Lafo Meli e toe iloilo ma taga'i i le feagaiga mo le foia o fa'afitauli. I le mae'a ai o ia feutaga'iga sa mafai ai loa ona fa'aleleia le aoina ma le fa'apaleniga o tupe aua le mata'ituina o le sa'o ma le atoatoa o tupe maua. O lenei auunaga sa faia e le Kamupani Lafo Meli mo le Fa'alapotopotoga sa fa'amutaina talu mai le 2009, se'i vagana ai Savai'i o lo'o fa'aauau pea;
- O le faiga fa'atino o le Daffron IXP e aofia ai le tele o vaega taua ma vaega lagolago mo fa'amaumauga ma tala o le tupe e tatau ona paleni i le fa'aiuga o le masina, fa'apea ai foi ma le fa'aiuga o le tausaga. O le eseesega o paleni amata ma paleni fa'aiu na mafua mai ona o se sese i le faiga fa'atino ina ua maea le fa'aleleiga o le Daffron ia Novema 2008. Ae ui i lea o le fa'aleleiga o le Daffron IXP aga'i i le vaega fou 3.11.1 fa'atasi ai ma a'oa'oga uma sa fa'atautaia e le aufaigaluega a le Daffron ia Me 2011 ua maua ai le atamai e fesoasoani i le aufaigaluega e fitoitonu i ai ina ia malamalama ai i faiga o lipoti ma fa'asologa o fa'apaleniaiga e tusa ai ma faiga fa'atausi tusi. O le fa'apaleniga fa'alemasina o fa'amaumauga lautele ma fa'amaumauga lagolago mo aitalafu ua fa'afouina nei ina ia mautinoa le sa'o o paleni o aitalafu i fa'aiuga o masina ma tausaga;
- Ua i ai nei faiga fa'avae ma faiga aloaia mo talitupe e fa'amalosai ai fa'atonutonuga tatau ma mata'itu ai le aoina ma le teuina o tupe a le Fa'alapotopotoga. Peita'i, o talitupe sa a'afia i le fa'atinoina o uiga le fa'amaoni e pei ona taua, sa fa'amutaina le auunaga. O le Fauautua Fa'alelufono i lea taimi, sa tauaveina nei mataupu tau le aufaigaluega i luga o lana feso'otaiga ma le pule o le vaega, ina ia mafai ona toe fa'aolaina tupe mai le aufaigaluega ma tu'uina atu ni lipoti i le Pulega. O le su'etusi fa'alotoifale sa faia le siaki fa'ate'i sa au'au fa'atasi ma latou na faia le sese ua le mafai ai ona tu'uina atu se lipoti i luga o nei faiga pi'opi'o. O le mafuaaga lea na ala ai ona fa'amuta lana auunaga. Mai i lea taimi ua toe fa'aopoopo ai nei e le pulega suiga lelei i le tulaga o siaki e faia pea ma faia fa'ate'ite'i i luga o tupe aoina ae le'i teua i le faletupe. Ua fa'aleleia nei e le Pulega a le Fa'alapotopotoga fa'atasi ma le lagolago a le Vaega o Punaoa Tautagata Faigaluega, le fa'atulagaga o le filifiliga mo le tofiaina o talitupe agava'a, fa'amoemoeina ma fa'atuatua ina ia foia ai le tupu so'o o ia faiga pi'opi'o i le lumana'i. Ua taumafai foi ina ia amata atu i le filiga o tagata faigaluega ia puipuiga e tatau ona iai. Ua tu'uina e le Pulega se alauni i totonu o tala fa'atatau mo le aofa'iga o aitalafu le mautinoa ua leva ona tu'ua.

Fa'alapotopotoga Fa'avae Tau-Fatuga'o a Samoa

Fa'amatalaga tautupe na Su'eina:

30 Iuni 2009

Su'etusi:

Ofisa Su'etusi

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. O le taunuuga o le taula'iga o tupe fa'avae, aseta ma tupe galue a le Fa'alapotopotoga sa lelei e ui sa matauina foi se fa'asiliga laititi i aitalafu.
2. O le taunuuga o le fa'agaoioiga fa'aletupe o le Fa'alapotopotoga sa matauina ai se fa'asiliga i tupe fa'asili e ui foi ona agai i luga ia tupe fa'aalu.
3. Sa matauina ni fa'asiliga i tupe fetafea'i lea sa maua ai le si'itaga o tinoitupe ma paleni tau-tinoitupe a le Fa'alapotopotoga i le fa'aaiuga o le tausaga.
4. O minute o fonotaga a le Komiti Fa'atonu, i aso 22 Iulai 2008, 26 Aokuso 2008, 2 Tesema 2008, 12 Tesema 2008 ma le 7 Apelila 2009, e le'i sainia e le sa ta'ita'ia fonotoga, ma e le o iloa po'o nei minute ua talia pe le talia. O le moni o nei fa'ai'uga e ono fesiligia po'o le le mafai ona fa'atinoa talu ai o le le aloa'ia, ona ua le saini ai le ta'ita'ifono. O se sasi fa'atauva'a, ae ogaoga ona a'afiaga mo le Fa'alapotopotoga pe a fesiligia le tulaga fa'aletulafono o fa'ai'uga.
5. Sa tu'uina i le Fa'alapotopotoga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Fa'alapotopotoga.
 - Sa talia e le Fa'alapotopotoga le lipoti i le tulaga i aseta ma aitalafu, fa'atinoga fa'aletupe ma tupe fetafea'i;
 - O minute e pei ona taua ua ma'ea nei ona sainia e le Taitaifono ma le Failautusi i fonotaga mulimuli ane ai.

Iunivesite Aoao o Samoa

Fa'amatalaga tautupe na Su'eina:

30 Iuni 2009

Su'etusi:

Betham & Co

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. Sa a'afia tele le tulaga o tupe fa'avae ma aseta a le Iunivesite Aoao a Samoa ona o le si'itia o aitalafu i le aofa'iga e \$1.2 miliona tala.
2. O le taunu'uga o galuega a le Iunivesite sa maua ai se fa'aitiitiga i tupe gau fa'atusatusa i le tausaga ua tuana'i. Sa mafai ona ausia lea tulaga ona o se fa'asiliga i tupe maua mai le Malo fa'apea le fa'aitiitia o tupe fa'aalu.
3. Sa taula'i le fetafeaa'iga o tupe i se tulaga lelei ma o'o ai i le fa'aitiitia o aitalafu fa'avaitaimi i le fa'aiuga o le tausaga.
4. Sa tu'uina i le Iunivesite le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti peita'i e o'o mai i le taimi mo le lolomiga o le Lipoti e le'i fa'aogaina lava lea avanoa.

Kamupani Va'alele Polenisia***Fa'amatalaga tautupe na Su'eina:******30 Iuni 2009******Su'etusi:******Lesamapenn******Manatu Fa'asu'etusi na Fa'aali:******Lelei******Otootoga o Mataupu Na Maua i le Su'ega:***

1. O le lipoti lenei, e mo le tolu (3) tausaga talu ona fa'aitiitia mai taualumaga a le kamupani ina ua tau'aveina ana galuega fa'avaomalo e le Polenisia Lanumoana (Polynesian Blue) mai ia Novema 2005.
2. O le Kamupani lenei, a o fa'afeagai ai le lalolagi ma le pagatia tautupe, ae liliu le Kamupani lenei fai a na polofiti lelei e \$2,459,282 i totonu o le tolu tausaga talu mai Novema 2005. E ui a o se fa'aitiitiga e 7.8% talu mai le tupe mama fa'a'sili mao'a e e \$2,666,477 i le tausaga na te'a nei, ae o se taunu'uga lelei tele lea, pe a fua atu i le tulaga sa i ai pisinisi va'alele i le tausaga na te'a nei. O lona tolu (3) ai fo'i lenei o tausaga talu ona alia'i mai tupe mama fa'asili a le kamupani lenei e le itiiti ifo i le \$2.0 miliona tala i le tausaga.
3. O le aofa'iga o tupemaua na fa'aitiitia i le 5% mai le \$13.8 miliona tala o le tausaga na te'a nei i le \$13.2 miliona tala mo le tausaga nei, ae ua fa'apena fo'i le alu o le aofa'iga o tupe fa'aalu, o le auala lava e tasi i le 4% mai le \$11.2 miliona tala i le tausaga na te'a nei i le \$10.7 miliona tala mo le tausaga nei.
4. Sa tu'uina i le Kamupani le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. Sa leai ni i si tali fa'aopoopo a le Kamupani sei vagana ai le fa'aailoa mai o le toe tatalaina o Fagali'i mai le aso (muamua) 1 Iulai 2009 sa toe fa'aopoopo ai se i si malosiaga o le Kamupani i le tulaga tau fa'atinoga fa'aletupe.

Fa'alapotopotoga o Fale o Samoa***Fa'amatalaga tautupe na Su'eina:******30 Iuni 2009******Su'etusi:******Ofisa Su'etusi******Manatu Fa'asu'etusi na Fa'aali:******Lelei******Otootoga o Mataupu Na Maua i le Su'ega:***

1. O le talatautupe i le tasi o Faletupe e le'i atoatoa lona fefa'apalenia'iga i le fa'agasologa o le tausaga. I lenei fefa'apalenia'iga na aliali mai ai se ese'esega sa le mafai ona fa'apalenia e pei o le tupe pa'u mai teugatupe e \$50,151.95 mo le tausaga fa'aletupe e fa'ai'uina i le 30 Iuni 2009. O fa'apogai o ese'esega sa le mafai ona fa'apalenia fa'apei o teugatupe pa'u ma teugatupe fa'asili e tatau ona fa'amautu ma tulituliloaina, ma o le a ni fa'asaoga fa'atausitusi talafeagai e tatau ona fai, ia faia loa. Sa fautuaina e le Ofisa Su'etusi le faia o fefa'apalenia'iga o teugatupe i faletupe, ma ia fai ma iloilo mo le sa'o ma ia fa'amae'a atoatoa.
2. E matilatila lava le matauina o le fa'atuai faifaipaea o teugatupe o lisiti o aso taitasi ma o ni i si o ia teugatupe tuai na mafua ai tupe pa'u mai teugatupe. O le aofa'iga la o teugatupe

pa'u mo le tausaga e \$50,151.95, ma o lo'o fa'amatala auiliili i le su'esu'ega fa'apitoa o lea mataupu tau i le Fa'alapotopotoga e pei ona ta'ua ai i se vaega o lenei lipoti.

3. Na maua e fa'apea o le tapula'a e fa'agata ai le malosi e fa'ataga ai nonogatupe ua le tausisia e nisi o Ofisa, e pei o le nonogatupe e \$40,000 sa fa'amaonia e le Sui Pule Sili i fafo atu o lona tapula'a fa'atagaina. E tatau lava i le Pulega ona tausisia le fa'atulagaga o tapula'a fa'ata'atitia o malosi o fa'atagaga o i ai nei, se'i vagana ua suia i se iloiloga a le Komiti Fa'atonu le tapula'a o malosi e fa'ataga ai.
4. Sa fautuaina e le Ofisa Su'etusi se Ta'iala mo le Tausigaotusi ma se Ta'iala o Feuia'iga ina ia fa'ata'atia mai ai se pepa o fa'amaumauga lelei mo faiga fa'avae e mulimulita'i ai i le faiga o nonogatupe, fa'asologa o le tausiga o tusi, fa'amatalaga o galuega tau pulega ma tulaga i matafaioi.
5. Sa tu'uina i le Fa'alapotopotoga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. Sa talia e le fa'alapotopotoga fautuaga mo le toe fa'aleleia.

Fa'alapotopotoga o Fale o Samoa

Su'ega Fa'apitoa:

1 Aperila 2008 i le 30 Setema 2009

Su'etusi:

Ofisa Su'etusi

Otootoga o Mataupu Na Maua i le Su'ega Fa'apitoa:

1. O se Su'ega Fa'apitoa na fa'agasolo mo mataupu na laga a o faia le su'ega o tusi o fa'amatalaga tautupe mo le tausaga na fa'ai'uina i le aso 30 Iuni 2009. O le aotelega o le Su'ega Fa'apitoa na taula'i muamua lava i lisiti ma teugatupe mo le vaitau mai le aso 1 Aperila 2008 sei tau i le aso 30 Setema 2009.
2. I le fa'agasologa o le iloiloga o fa'amatalaga tautupe mo le tausaga fa'ai'uina i le 30 Iuni 2009, na su'esu'e ai puipuiga fa'alotoifale o lo'o siomia ai tinoitupe, ma matauina ai e fa'apea, e i ai se pa'u i tupe na le teuina i le faletupe e \$9,730 mai lisiti o le aso 1 ma le aso 7 Apelila 2009. O lenei ulua'i tupe pa'u e \$9,730, e i ai le teugatupe mulia'i ai e \$210 (aso 3 Apelila 2009) ua fa'aitiitia ai le pa'u mo aso na e lua i le \$9,520, ae ua aumai fa'atasi pea ina ia mautinoa ai le aofa'i o tupe na fa'amatapotoina e le to'alua (2) o tagata faigaluega a le Fa'alapotopotoga. Matou te fa'amaonia o vaega e pei ona ta'ua i luga o mafua'aga na o tupe na fa'agaoiina e \$63,044.04 mo le vaitau mai le aso 1 Apelila 2008 tau aso 30 Setema 2009.
3. E i ai vaivaiga i faiga fa'avae i le tausiga o tusi ma puipuiga fa'alotoifale e manaomia ia tautalagia ma fa'aleleia, i le a'oa'oina o tomai i le aufaigaluega talafeagai i totonu o le vaega o tupe, ma le fa'amae'aina o se tusi ta'iala i le fa'asologa tau-pulega ma tulaga tautupe. E le gata i lea, e leai se vaega su'etusi fa'alotoifale a le Fa'alapotopotoga o i ai, aemaise ai lava i le fa'atupula'ia o matafaioi i le tele o fa'aunegatupe ua tatala, o le fa'aaogaina o le faiga fa'atino a le pulega i nonogatupe ma le aofa'i o tinoitupe e tagofia.
4. Sa tu'uina i le Fa'alapotopotoga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. Sa talia e le fa'alapotopotoga fautuaga mo le toe fa'aleleia.

Fa'alapotopotoga o Eleele o Samoa***Fa'amatalaga tautupe na Su'eina:******30 Iuni 2009******Su'etusi:******Ofisa Su'etusi******Manatu Fa'asu'etusi na Fa'aali:******Lelei******Otootoga o Mataupu Na Maua i le Su'ega:***

1. Sa le'i ausia e le Fa'alapotopotoga ana fuafuaga o tupemaua. E \$11 miliona tala e le'i ausia o tupe maua na fuafuaina mo le tausaga. Mo tupe fa'aalu, e \$2.4 miliona tala e sili atu ai le fa'aalu nai lo tupe fuafuaina. Ua tele ina tautu le Fa'alapotopotoga i poloketi na te le gafatia ona fa'atupeina. E tatau lava i le Pulega ona va'ai toto'a i le tulaga o i ai tupe fetafea'i a le Fa'alapotopotoga ma lona a'afiaga ona fautua fa'atatau lea i ai a o lei fa'amaonia e le Komiti Fa'atonu se poloketi e le mafai e le Fa'alapotopotoga ona fa'atupe.
2. Na totogi e le Fa'alapotopotoga le \$2,848,340 Tala i se tasi o Kamupani, "e tu i le va" mo le tele o fa'atauga mai fafo. O le Kamupani e i Niu Sila ae fai mai latou pili e totogi atu i tala Amelika ae le o tala Niu Sila. E matua'i taugata lava mo le Fa'alapotopotoga, aemaise ai lava pe a fa'apito i se Kamupani e tasi mo le fa'atauga o so'o se aseta tumau po'o se auaunaga fa'afautua.
3. E le'i mae'a lava le fa'apaleniga o eleele, ma o le fa'apaleniga lea e mafai ai ona fa'aalia le fesoloa'iga o eleele, po'o ua i ai ni eleele fou, po'o ua fesuia'i ia eleele, ia po'o ua fa'atau fo'i ia eleele. O le fa'apaleniga la o Eleele e taua, aua e fa'aali mai ai le feso'ota'iga o le tino mai o eleele ma lo latou tau fa'aletupe e pei ona atagia i fa'amatalaga tautupe.
4. Mai le iloiloga o le au-aitalafu e ala i fefa'ataua'iga, na matauina ai e fa'apea e tusa ma le \$1.5miliona tala (tusa lea ma le 76% o le aofa'i atoa o le au-aitalafu) e i ai paleni o aitalafu e sili atu i le \$10,000. Ma e leai fo'i se fa'avasegaina po'o le a le umi po'o le matua o aitalafu, ina ia mafai ai e le Fa'alapotopotoga ona mautinoa aitalafu tu'ua, ma faia ai se fuafuaga tatau lautele e 2% o aitalafu tu'ua e pei ona fa'amatalaina i otootoga o faiga fa'avae fa'atausitusi.
5. O lo'o fa'atau atu eleele i tagata faigaluga a le Fa'alapotopotoga i le 60% o le tau moni o le eleele. O le fa'atauga lenei, e le o faia i se tulaga o "fefa'ataua'iga masani" aua o le 40% fa'amatu'u e ave mo le taga faigaluega, e le o ave mo se i si tagata fa'atau po'o se i si foi tagata o le atunu'u o fa'atau mai fanua i le Fa'alapotopotoga. Sa fesiligia pe o nei fa'amanuiaga o ni fa'amanuiaga masani e ono talafeagai ona maua e le aufaigaluega pe e le o tele na'ua.
6. Sa tu'uina i le Fa'alapotopotoga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti peita'i e o'o mai i le taimi mo le lolomiga o le Lipoti e le'i fa'aaogaina lava lea avanoa.

Fa'alapotopotoga Inisiua Tau-Soifua a Samoa

Fa'amatalaga tautupe na Su'eina:

30 Iuni 2009

Su'etusi:

Betham & Co

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. Sa matauina le si'itia o le tulaga o aseta ma tupe fa'avae a le Fa'alapotopotoga.
2. Sa fa'amauiina se tupe mama tele a o le'i toesea lafoga a le Fa'alapotopotoga e tusa lea ma 168% le fa'aopoopoga fa'atusatusa i le tausaga 2008. E foliga mai sa lelei ona puipuia e le Fa'alapotopotoga ana tupe fa'aalu e fa'atusatusa atu i le tausaga 2008.
3. E maualalo lava se tupe fetafea'i fa'asili sa maua i tinoitupe ma paleni tau-tupe a le Fa'alapotopotoga fa'atusatusa i le tausaga 2008.
4. Sa tu'uina i le Fa'alapotopotoga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. Sa talia atoatoa ele Fa'alapotopotoga le lipoti ma e leai nisi fa'aopopoga na tu'uina mai.

Fa'aputugatupe Mo Le Lumana'i Manuia o Samoa

Fa'amatalaga tautupe na su'eina:

30 Iuni 2009

Su'etusi:

Lesam Penn

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. Na matauina e fa'apea o tupe toe-fa'afo'i na faia i luga o fanua toe umia, e foliga mai e sese, ona o tului fa'aputupu i luga o talatautupe a i latou e ona fanua, ua sili atu nai lo totogiga na faia. Na fautuaina ai e le Su'etusi ina ia fa'apaleni nei talatautupe o tupe toe-fa'afo'i ina ia mautinoa ai, o paleni i fa'ai'uga o tausaga e sa'o. Ua talia e le Pulega mataupu na maua e le Su'etusi, ma o galuega mo le fa'aleleia ua fuafua nei.
2. Na iloiloaina e le Su'etusi ia nonogatupe fa'aletonu, ma na fa'aalia ai e fa'apea o nisi talatautupe e leai ni tului o tusia ai, ae o nisi talatautupe o lo'o tu'uina pea i ai tului e o'o mai lava i le taimi nei. O faiga fa'avae o lo'o alu ai nei, o le leai o se tului, fa'atoa fai lava i luga o nonogatupe fa'aletonu, i luga o le fautuaga mai le vaega Tau-tulafono ma fa'amaoniga e aumai mai le Komiti Fa'atonu. Na fautuaina fa'apea ina ia taofia loa le tu'uina atu o tului mo nonogatupe ua fa'aletonu pe a uia loa tulaga tau le tulafono. Ua fa'aailoa mai e le Pulega le manatu e sili ona aofia tului i totonu o paleni ae aua le fa'amutaina, i luga o le iloa e tele se taimi e alu i gaoioiga fa'aletulafono mo le totogiga o ia aitalafu, aua o ia aitalafu ua uma ona aofia ai se vaega o tului o tupe maua ia, e pei ona taua ua uma ona i ai i totonu o aiaiga tau-aitalafu le mautinoa.
3. Sa tu'uina i le Fa'aputugatupe le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a'o le i lolomia le Lipoti. O lo'o fa'agasolo atu i lalo tali na tu'uina mai e le Fa'aputugatupe:
 - Sa toe galueaina e le Fa'aputugatupe le talatautupe o tupe toe fa'afo'i e pei ona sa lipotia ma lagolagoina ai le manatu e le Su'etusi e fa'apea o le tele o ni i si o fa'amatalaga tautupe e le tataua ona mauaina se tupe toe fa'afo'i pe a fua atu i tului fa'aputupu ua sili atu nai lo tupe totogi mai. I le maea ai o le toe

galueaina o tupe toe fa'afoi ua maua ai o nei talatautupe toe-fa'afoi tau-fanua ua lelei ona autalaina;

- Ua faia nei e le Faputugatupe se faiga fa'atino fou e taofia ai tului i luga o nonogatupe ua fa'aletonu, ae tumau pea le fa'amauiina o tului uma o tala tautupe tau-nonogatupe e aitalafu i le Fa'aputugatupe. O se fa'auluga i tusi i masina taitasi ia faia ina ia taofia/feliuai ai tului mai tupe maua o talatautupe o nonogatupe fa'aletonu e fa'amaonia e le Ofisa Sili mo tului o lo'o taofia. A fa'apea loa ua toe fa'agaoioi le talatautupe tau nonogatupe ona aveesea loa lea o tului taofia ae ave i tupe maua. Ua fa'amalieina le atugaluga o le Su'etusi i le auala ua uia e le Fa'aputugatupe i le matauina o tului tau tupe maua sa faitauina e le mautinoa i le fa'afeagai ai ma talatautupe o nonogatupe fa'aletonu.

Va'aiga o Fale a le Fa'aputugatupe Mo Le Lumana'i Manuia o Samoa

Fa'amatalaga tautupe na su'eina:

30 Iuni 2009

Su'etusi:

Ofisa Su'etusi

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. O le Fa'amatalaga o loo fa'alia mai ai le aofa'iga o tupe totogi mai e i latou o lo'o lisia avanoa i fale o le Fa'aputugatupe, aofa'iga o tupe totogi e le Fa'aputugatupe ma le aofa'iga o aitalafu a'i latou o lo'o lisia avanoa i fale a le Fa'alapotopotoga i le aso 30 Iuni 2009. O lo'o fa'amauiina ni fa'aitiitiga o nei fa'aילוilo uma e tolu (3) e atagia mai ai le lelei ona pulea tupe fa'alu lautele e fa'asoa i e Lisia Fale.
2. Sa tu'uina i le Fa'aputugatupe le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a o le'i lolomia le lipoti. O le tali mai a le Fa'aputugatupea e fa'apea o le fa'aitiitia o le aofa'iga o tupe fa'aalu mo le tausaga fa'aletupe sa i'u ai ina fa'aitiitia ai tupe aitalafu a latou e Lisia Fale. O tupe fa'aalu e toe fa'asoa atu i a i latou e lisia fale o le a toe iloilo ina fa'aletausaga e le Pulega, ma o se fa'aitiitiga e matauina mai ai i totonu o le fa'amamaina, teuina, auunaga fa'akonekarate ma tau fa'apulega ua mafua mai i taumafaiga a le Fa'aputugatupe mo le fa'aitiitia o tau mo i latou e lisia fale.

Fa'aputugatupe mo le Lumana'i o Sui o le Palemene***Fa'amatalaga tautupe na su'eina:******30 Iuni 2009******Su'etusi:******Ofisa Su'etusi******Manatu Fa'asu'etusi na Fa'aali:******Lelei******Otootoga o Mataupu Na Maua i le Su'ega:***

1. Sa matauina le si'itia lelei o aseta ma tupe fa'avae a le Fa'aputugatupe.
2. Sa matauina le si'itia o galuega fa'atino i le si'itia o tupe fa'asili e ui lava ina agai i luga tupe fa'aalu.
3. Sa matauina le fa'atula'i mai o tupe fetafea'i ma taunuu ai i le si'itaga maoa'e i paleni fa'ai'u o tinoitupe ma tinoitupe feso'otai.
4. Sa tu'uina i le Fa'aputugatupe le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a o le'i lolomia le lipoti. O le tali mai a le Fa'aputugatupe sa fa'amautu ai tulaga si'itia e pei ona lipotia ma fa'amamafa ai mafua'aga e pei o le si'itia o teuga tupe fa'avaitaimi, tului i teugatupe, saofaga a sui, saofaga a le Malo fa'apea ai ma le fa'aitiitia o aitalafu, fa'amanuiaga totogi ma le aofa'iga o tupe fa'aalu.

Fuafuaga Mo Le Manuia o Tagatanu'u Matutua***Fa'amatalaga tautupe na su'eina:******30 Iuni 2009******Su'etusi:******Lesa ma Penn******Manatu Fa'asu'etusi na Fa'aali:******Lelei******Otootoga o Mataupu Na Maua i le Su'ega:***

1. O le aofa'iga o penisione fa'aputupu ma tu'ua mai ia Novema 2001 tau i le aso 30 Iuni 2009 e \$1,928,572, ma o le 96% o le aofa'iga o paleni tu'ua nei na tauave mai i le tausaga 2001 sei tau mai i le 2008. O penisione e le'i talaina na tau'ave mai ma totogiina i totonu o le tausaga fa'aletupe 2009 e \$32,599, totoa mai ai le paleni o penisione e lei talaina e \$1,895,973 i le aso 30 Iuni 2009. Ina ia 'alo'ese mai le tusia fa'asili o aitalafu i le fa'aiuga o le tausaga, ua fautuaina le Komiti Fa'atonu ina ia fuafua lelei ni auala e uia, i le iloa o penisione tu'ua o lo'o tauaveina i tusi o le Fuafuaga ua sili atu i le ono tausaga o i ai i Tusi a le Fuafuaga, ona o nei tupe e ono le toe talaina. O nei penisione tu'ua e ono toe fa'aopoopo i totonu o teugatupe fa'aputupu a le Fuafuaga.
2. Sa tu'uina i le Fuafuaga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a o le'i lolomia le lipoti. Sa ta'ua e le Fuafuaga le faia o se iloilogaga mae'ae'a i penisione tu'ua ma tu'uina atu se fautuaga i le Komiti Fa'atonu mo le toe tusia i totonu o fa'amaumaga a le Fuafuaga. Sa fa'amaonia e le Komiti Fa'atonu le tusia i totonu o tusi o le Fuafuaga mo le Manuia o Tagatanu'u Matutua o le aofa'iga e \$1,876,120 i le aso 27 Iulai 2011, ma o lea sa fa'alauiloa ai i totonu o Fa'amatalaga o Tupe mo le tausaga na fa'aiuina i le aso 30 Iuni 2011. E le gata i lea o le paleni o penisione e le'i talaina o le a toe iloiloaina ma lauliliuina e le Fuafuaga i tausaga taitasi.

Pulega o Uafu ma Taulaga o Samoa***Fa'amatalaga tautupe na su'eina:******30 Iuni 2008******Su'etusi:******Ofisa Su'etusi******Manatu Fa'asu'etusi na Fa'aali:******Lelei******Otootoga o Mataupu Na Maua i le Su'ega:***

1. O le Talatautupe Tausiaki Fa'aaitalafu (Numela 2000398236) i se tasi o Faletupe i le paleni e \$13,048.66 e pei ona i ai i le aso 30 Iuni 2008, e lei fa'apalenia. O se vaivaiga ogaoga lea tulaga. Ina ia i ai se aoga o lipoti fa'aletupe e fa'auala mai le faiga fa'atino fa'atausitusi o i ai, e tatau i le Pulega ona fa'apaleni le talatautupe tausakiaki fa'aaitalafu aga'i i fa'amaumaga ma le tusi fa'amau lautele i se fa'avae e ta'i masina ma fai.
2. Sa fa'atuatuai mo le lua (2) aso le teuina o tupe maua i aofa'iga o le \$10,590 ma le \$20,656. E i ai lava le fa'afitauli o le gau mai le fa'amatapoto, talepefale, ma le gaoi pe afai e maoa'e se tinoitupe e taofi i le Ofisa talu ai le fa'atuai o teugatupe. Na fautuaina e le Ofisa Su'etusi le Pulega, ina ia taumafai e mulimulita'i i fa'asologa o puipuiga fa'alotoifale o le faia lea o teugatupe o lisiti i aso taitasi. Ua talia e le Pulega le atugaluga ma fautuaga a le Ofisa Su'etusi.
3. O le paleni o le Talatautupe o Tupe Toe-totogi Mai e pei ona i ai i le aso 30 Iuni 2008 e \$889,105, ma o le 34% o lena aofa'iga e \$302,087 ua sili atu i le 90 aso e le'i totogia.
4. O Aitalafu e Totogi Fa'avaitaimi e \$1,072,298 ua leva ona fa'aalia i le Lautusi o Paleni talu mai le 2005 i lalo o aitalafu i lalo o le sefululua masina. Ua fautuaina e le Ofisa Su'etusi ina ia toe iloilo nei aitalafu ma saili auala e totogi fa'amae'a ai nei aitalafu ua loa ona tu'ua.
5. Ua matua'i maoa'e lava le si'itia o nonogatupe mai le \$9,469,970 sa i ai i le aso 30 Iuni 2007 se'i tau i le \$14,321,655 e pei ona i ai i le aso 30 Iuni 2008, o se si'itaga i le \$4,851,685 po'o le 54%. O lena siitaga i le aofa'iga o aitalafu fou ma le fa'atuga o oloa e fau ai le uafu i Aleipata o le a i ai sona taotaomaga i fuafuaga tautupe a le Pulega i le lumana'i. O lena si'ita'i i nonogatupe ua suia ai le fua fa'atatau o nonogatupe i le Tupe Fa'avae. Ua fautuaina e le Ofisa Su'etusi le Pulega, e tatau ona auiliili fa'avaitau ana fua tautupe e taofia ai ni i si'itu e ono laga mai e i latou ua leva ona aitalafu ai le Pulega, ma ia avea o se au'upega mo le mata'ituina o tulaga tautupe e le pulega.
6. O Faila Fa'apitoa Tau-tagata e le o tausia i le taimi nei, ma e le atoatoa fo'i mo ni i si. Ae fa'apito ai lava, e le'i maua le faila a le Ali'i Pule, ma o lea faila e ono maua ai le Feagaiga o le Konekalate o le Fa'afaigaluegaina, lea e fia iloilo ma fa'amaonia ai ana fa'amanuiaga tau le galuega ua totogi.
7. E pei ona manaomia e le Tulafono Fa'atonutonu o Fa'alapotopotoga a le Malo (Fa'atinoga o Galuega ma le Mafai Ona Tali Atu) 2002, e tatau i le Pulega ona faia sana Komiti Su'etusi. O le Komiti Su'etusi lea e lagolago tele i le Komiti Fa'atonu i le fa'atinoga o ana galuega.
8. Sa tu'uina i le Pulega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a o le'i lolomia le lipoti. O lo'o fa'agasolo atu i lalo tali na tu'uina mai e le Pulega:
 - Sa tatalaina e le Faletupe e pei ona taua i le numela tasi (1) ma le Pulega se teugatupe fa'apitoa, e fa'amau ai tupe fa'aalu mo totogiga tu'u sa'o o nonogatupe. Sa i ai se fa'asiliga o tupe fa'aalu e \$13,048.66 i le fa'aiuga o le

tausaga i le aso 30 Iuni 2008 e pei ona tuuina atu ai i su'etusi le fa'amatalaga ma fa'amaumauga o teugatupe mai le Faletupe. O lenei teugatupe sa fa'agaoioia lava e le Faletupe. O le faiga fa'atino e saunia e le Pulega pepa fa'apitoa e fai ai totogiga o oloa ae o siaki uma lava e saunia e le Faletupe e fa'agasolo ai le totogiga o e fa'atau mai ai oloa a le Pulega;

- E le o toe i ai se fa'atuai i teuga tupe ona o lea ua faia teugatupe i aso taitasi;
- O le fautuaga i le mata'ituina o talatautupe toe totogi mai, ua mae'a fa'atino e pei ona i ai le fa'aitiitiga i le paleni e \$290,444.11 i le aso 30 Iuni 2011;
- O le fonotaga a le Komiti Fa'atonu o le aso 6 Oketopa 2010 sa fa'ai'ugafono ai ina ia fa'amutaina ai le mataupu e fa'asaga i tagata ua loa ona aitalafu i ai le Pulega e ala lea i le tautalagia o aitalafu e le'i lagaina po'o le soloia mai tusi o aitalafu mai i aofa'iga o lo'o aitalafu ai le pulega ia i latou e ou aitalafu tu'ua ia;
- E talia e le Pulega atugaluga i le tulaga o aitalafu ma fua tau-tupe fa'avae ma o le a taumafai e fa'atino lea tulaga e pei ona fautuaina. O le taimi lea sa tele ai atina'e a le Pulega o Uafu e pei o le toso va'a, Uafu Fa'avaomalo i Aleipata, Uafu Fa'avainuu ma le tanuga o fanua. Sa leai ni tupe fa'aleoleo a le Pulega na i ai, peitai na i ai le popolega ona o le tau galuea'ina o nei poloketi. Na o le pau le to'omaga o le tua i nonogatupe fa'aopoopo e fa'amae'aina ai le tele o nei sao taua mo fa'atupulaia o le Tamaoaiga;
- E tataua ona fa'atu se Komiti Su'etusi pe a mae'a ona tofia sui o le Komiti Fa'atonu Fou mo le 2012.

Pulega o Fa'ailoga ma Tusipasi Taulaloa a Samoa

Fa'amatalaga tautupe na su'eina:

30 Iuni 2009

Su'etusi:

Ofisa Su'etusi

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. Sa i ai ni alauni fa'aopoopo mo malaga i fafo sa fa'amaonia e le Komiti Fa'atonu e totogi atu i luga o alauni ua mae'a fa'atonuina e le Kapeneta.
2. Sa fautuaina e le Ofisa Su'etusi le fa'ailoa lelei o tupe fa'alu i meaalofo ma foa'i mo le fa'amaninoina.
3. Sa leai ni feagaiga tau-galuega na faia mo le Ofisa Sili ma Ofisa Sili Lagolago.
4. Sa tu'uina i le Pulega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a o le'i lolomia le lipoti. O lo'o fa'agasolo atu i lalo tali na tu'uina mai e le Pulega;
 - Ua i ai nei se fa'aiuga a le Komiti Fa'atonu e le toe fa'agaoioi ai se totogiga e mo'omia ai se Pepa mo le Kapeneta e aunoa ma sea pepa ua faia, ina ia taofia ai ni i si eseese i le fa'avasegaina o totogi. O le saunia o pepa mo le Kapeneta ua fa'a'malosia fo'i i le Tusi Taiala Fou 2012 ua mae'a ona fa'amaonia e le Kapeneta;

- O meaalofo ma foa'i mo fa'amavaega ma konesale, sui o le Komiti Fa'atonu ua mae'a le tautua ma isi, ua fa'ailoa nei i le talatautupe sa'o mo foa'i mo le fa'amaninoina atili;
- Ua maea nei ona sainia feagaiga tau-galuega mo le Ofisa Sili ma Ofisa Sili Lagolago.

Vili Ma'a ma Oloa Fai Auala a Samoa

Fa'amatalaga tautupe na su'eina:

30 Iuni 2008

Su'etusi:

Ofisa Su'etusi

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. Sa fa'amauiina se fa'aitiitiga i le tulaga tautupe i le aofa'iga o aseta ma tupe fa'avae a le Vili Ma'a ma Oloa Faiuala a Samoa (le Vili Ma'a).
2. Sa fa'amauiina se fa'aopoopoga maoa'e i tupe gau mai galuega fa'atino tautupe a le Vili Ma'a.
3. O manaoga tau tinoitupe fetafea'i ua sili atu nai lo tinoitupe tafemai i totonu, ma ua avea ai lea ma fa'apogai o le fa'aaogaina o le sili atu i le afa o tinoitupe ma paleni o teugatupe sa i ai i le aso 30 Iuni 2007, mo le fa'atupeina o tupe gau.
4. Sa tu'uina i le Vili Ma'a le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo peita'i a'o le i lolomia le Lipoti e o'o mai i le taimi mo le lolomiga o le Lipoti e le'i fa'aaogaina lava lea avanoa.

Fa'alapotopotoga o Su'esu'ega Fa'asaienisi a Samoa (SROS)

Fa'amatalaga tautupe na su'eina:

30 Iuni 2009

Su'etusi:

Ofisa Su'etusi

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. E \$8,480 na totogi ai se tasi o tagata faigaluega mai se i si Matagaluega a le Malo, na fa'afaigaluegaina i lalo o le faitalia a le Ali'i Pule, na te tagofia tulaga Tau-Fa'amatalaga Fa'atekonolosi (IT) mo le Fa'alapotopotoga, e aunoai ma se fa'atagaga a le Komiti Fa'atonu e tusa ai ma le Vaega 12 palakalafa (5) o le Tulafono o le Matata o Atina'e ma Su'esu'ega Fa'asaienisi o Samoa 2006. Ua talia e le Fa'alapotopotoga le atugaluga o le Ofisa Su'etusi ma o le a le toe tupu i le lumana'i.
2. E leai ni lafoga na toesea mai alauni o sui o le Komiti Fa'atonu o le Fa'alapotopotoga ina ia tausisia ai tu'utu'uga o Tulafono o Lafoga.
3. Sa tu'uina i le Fa'alapotopotoga le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a o le'i lolomia le lipoti. O lo'o fa'agasolo atu i lalo tali na tu'uina mai e le Fa'alapotopotoga:
 - Talu ai ona e le'i i ai se tagata faigaluega fa'apitoa i fa'amatalaga fa'atekonolosi a'o taumafai ai le Fa'alapotopotoga e tausisia le faiga fa'avae a le Malo mo le

fausia o upega tafa'ilagi, o lea sa fa'aaoga ai loa e le Pule lana fa'autautaga tatau e fa'aaoga ai le sa tofia ona o le tuliloaina o le taimi fa'atapula'a mo lea fa'ai'uga, peitai ua talia e le Fa'alapotopotoga ma o le a fa'aaoga loa e pei ona fautuaina;

- Ua fa'amaonia e le Fa'alapotopotoga e fa'apea, ua mae'a ona totogi ia lafoga taofiofi i luga o totogi fuapau a Komiti Fa'atonu e pei ona laga, ma o se taimi muamua foi lea ua fa'alia ai lenei manatu, ma o lea mataupu ua fa'amaonia e le Fa'alapotopotoga e tatau lava ona fa'apito i Alauni o Fa'atonu. Ua fa'amaonia e le Fa'alapotopotoga o le a totogi lafoga e tatau i se taimi o i luma.

Kamupani o Auaunaga Tau Va'a o Samoa

Fa'amatalaga tautupe na su'eina:

30 Iuni 2009

Su'etusi:

Betham & Co

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. O le tulaga tautupe a le Kamupani sa fa'amauiina ai se fa'aitiitiga o le aofa'iga o aseta peita'i sa agai i luga tupe fa'avae. O le fa'apogai o le si'itia o tupe fa'avae sa mafua mai i le fa'aitiitia o le gau mai fefa'ataua'iga ma fesuia'iga o tupe mai fafo.
2. O le taunuuga o galuega fa'atino tautupe a le Kamupani sa fa'amauiina ai se tupe gau fa'atusatusa i se tupe-mama fa'asili e \$544,066 i le 2008.
3. O tupe fetafea'i mautinoa sa lelei ona fa'agaoioia, lea sa taunuu ai i se fa'aitiitiga maoa'e i aitalafu le tumau i le faletupe i le fa'aiuga.
4. Sa tu'uina i le Kamupani le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a o le'i lolomia le lipoti. O lo'o fa'agasolo atu i lalo tali na tu'uina mai e le Kamupani:-
 - O le fa'aitiitiga i le aofa'iga o aseta ma le tupe gau i le tausaga 2009 ua mafua ona mamafa tele ona o le lagolago a le Malo i le 2008 lea sa tulaga ese ai lea tausaga i aseta ma tupe maua;
 - O le toe fa'atulagaga o aitalafu ma nonogatupe na fesoasoani lea i le fa'aleleia o tinoitupe fetafea'i e pei ona taua i le Lipoti.

Pulega o Fale ma Malae Ta'aalo a Samoa

Fa'amatalaga tautupe na su'eina:

30 Iuni 2008

Su'etusi:

Ofisa Su'etusi

Manatu Fa'asu'etusi na Fa'aali:

Lelei

Otootoga o Mataupu Na Maua i le Su'ega:

1. O Fa'amatalaga Fa'aletupe muamua lenei a le Pulega mo le iva (9) masina na fa'ai'uina i le aso 30 Iuni 2008.
2. O galuega fa'atino tautupe a le Pulega sa taunuu i se tupe gau mai le fa'agaoioiga e \$1.4 miliona tala.
3. O tupe fetafea'i mautinoa sa lelei ona fa'agaoioia, lea sa taunuu ai i se fa'aitiitiga maoa'e i aitalafu le tumau i le faletupe i le fa'aiuga.
4. Sa i ai ni vaivaiga i fa'asologa o puipuiga fa'alotoifale sa matauina i le taimi o le su'ega. O lea e aofia ai le:
 - Pepa o totogi o oloa e le o lagolagoina e ni fa'amaumauga;
 - Leai se gaoioiga mo le toe totogiga mai o aitalafu mai ia i latou o lo'o aitalafu i le Pulega;
 - Sa le lelei ona tausia le lesitala o aseta ma fa'aatoatoa le fa'atumuina i fa'amatalaga talafeagai o aseta;
 - Leai se lisi o fa'amatalaga e lagolago ai aitalafu i lafoga taofiofi;
 - Na ona fa'alisiti o tupe maua ae le teuina ona o le fa'aogaina mo le totogiga o fa'atauga a le ofisa.
5. Sa tu'uina i le Pulega le avanoa e aumai ai ni fa'amalamalamaga atili ma ni fa'aopoopoga e tusa ai ma galuega fa'aleleia fa'agasolo a o le'i lolomia le lipoti. O lo'o fa'agasolo atu i lalo tali na tu'uina mai e le Pulega.
 - E talia e le Pulega fautuaga a le Ofisa Su'etusi i luga o pepa totogi ma o se faiga fa'atino fou ua fa'ata'atia mo le puipua o le fa'agasologa ma le tufatufaina o totogiga uma. O lo'o faila uma pepa totogi i totonu o latou faila fa'apitoa, ma ua i ai se Ofisa Tausitusi e fitoitonu mo le saunia o pepa totogi ina ia mautinoa ai ua i ai uma pepa lagolago e ono fa'apipi'i i pepa totogi uma;
 - Ua fa'amamafa nei e le Pulega mataupu o le aoia o aitalafu ma le toe fa'aolaina vave o aitalafu tuua. O le Vaega Tautupe o lo'o mata'ituina lea mataupu, ma o ni fa'atinoga malolosi ua tatou nei ona fai mo le fa'ama'apeina vave ma le toe fa'aolaina o aitalafu tu'ua uma. O le faiga masani o le tulituliloaina o aitalafu i aso taitasi ua toe amata fa'agasolo, fa'aopoopo i ai ma le iloilo faifaipea o aitalafu. O le tele o aitalafu tuua i le vaitau o lo'o su'eina ua mae'a ona fa'amaonia e le Komiti Fa'atonu mo le soloia i lana fonotaga o Oketopa 2010;
 - Ua matauina ma talia e le Pulega le fautuaga mai le Ofisa Su'etusi i luga o aseta tumau ma ua tausia ma fa'aleleia le lesitala o aseta tumau.
 - O le aitalafu o lafoga taofiofi sa tauave mai i le Talatautupe i le Pulega o Ta'aloga a le Pasefika, peitai o le lisi e lagolagoina ai lea aitalafu e le'i maua mai i le Pule-Tautupe sa i ai o le Pulega o Ta'aloga a le Pasefika.

- Ia matauina fa'amolemole e fa'apea o tupe e lei teuina sa fa'aoga e totogi ai tupe fa'aalu mo le ofisa ma isi fa'atauga ma sa fa'amaonia e le Pule-Tautupe sa i ai. O lea fa'atinoga e le taliaina ma o lea ua fa'atinoina nei e le Pulega faiga o fua malolosi ina ia teuina ai tupe e aunoa ma se tagofia. O lenei faiga e tatau ona ogatasi ma le Tulafono o Pulega o Fale ma Malae Ta'alo a Samoa (SSFA) ma le Tulafono o Pulega o Tupe a le Malo. Ua i ai nei se tusi lisiti autu e fo'ia ai ni i si teugatupe fa'asili po'o teugatupe pa'u po'o ni fe'ese'esea'iga, ma o fua tau-puipuga mata'alia ua fa'atino nei.

Pulega o Tulisi i Samoa

Fa'amatalaga tautupe na su'eina:

30 Iuni 2009

Su'etusi:

Lesam Penn

Manatu Fa'asu'etusi na Fa'aali:

Lelei

Ootootoga o Mataupu Na Maua i le Su'ega:

1. O se tasi o le aufaigaluega sa faigaluega muamua ai e i ai sana aitalafu tu'ua e \$4,394 mo se vaitau umi, e aunoa ma se totogiga ua faia e tau fa'aola ai. Na tali mai le Pulega o le a taumafai e fa'aola vave mai.
2. Sa valaaulia le Pulega mo fa'amalamalamaga atili ma ni fa'aopopoga e tusa ai ma galuega fa'aleleia fa'agasolo a o le'i lolomia le lipoti. O le tali mai a le Pulega o le aitalafu tu'ua na totoe mai i tupe sa totogi mai fafo e se tagata sa faigaluega mumua i le Pulega. O taumafaiga e feso'ota'i pea i lenei tagata sa le manuia ma o le mae'a ai o se taimi po'o le lua tausaga na fa'amaonia ai loa e le Komiti Fa'atonu le fautuaga mo le soloia o lenei aitalafu.

Pulega o Tulisi i Samoa— Lala i Aukilani

Fa'amatalaga Tautupe Na su'eina:

30 Iuni 2009

Su'etusi:

Ofisa Su'etusi

Ootootoga o Mataupu Na Maua i le su'ega:

1. E leai se Lesitala o Tusi o Fa'amaumauga o tausia e le Lala. O le Lesitala lea e tatau ona fa'amaumau ai uma ia tusi lisiti, tusi mo le saunia o pili, ma tusi oka oloa. Na fautuaina e fa'apea ia faia se Lesitala e tusia uma ai Tusi o Fa'amaumauga o lo'o fa'aoga e le Ofisa.
2. E leai fo'i se Lesitala o tausia e fa'amau ai aseta ua maua ma aseta ua ave'ese ma fa'atau e le Ofisa. Sa fautuaina fo'i le faia o lea tulaga.
3. Sa valaaulia le Pulega mo fa'amalamalamaga atili ma ni fa'aopopoga e tusa ai ma le vaega lenei o le Lipoti a o le'i lolomia le lipoti peita'i sa le maua mai se tali i lea vaega.

Fa'alapotopotoga Esetete Tausi a Samoa***Fa'amatalaga Tautupe Na su'eina:******30 Iuni 2009******Su'etusi:******Lesa ma Penn******Manatu Fa'asu'etusi na Fa'aali:******Lelei******Otootoga o MataupuNa Maua i le Su'ega:***

1. O le aofa'iga o fuafuaga Fa'ataau mo oloa (olua tuai ona alu) i totonu o oloa tu'utasi lea na tau'ave mai tausaga ua tuana'i e \$13,395.85. Na fautuaina e le Su'etusi e fa'apea, ona o nei oloa ua siliga ona le taulia i le lua tausaga talu ai, ua tatau ai loa ona soloia.
2. Na matauina e fa'apea o aitalafu i le aofa'iga e \$46,631 ua loa ona tu'ua mo se taimi umi, ma o le tulaga i le toe fa'aolaina mai e matua'i mamao lava. Ua matauina e fa'apea o nei aitalafu ua uma ona fa'atatauina le le mafai ona toe fa'aola i talatautupe. Ua fautuaina ai fo'i e le Su'etusi ina ia soloia loa.
3. Sa valaaulia le Pulega mo fa'amalamalamaga atili ma ni fa'aopopoga e tusa ai ma galuega fa'aleleia fa'agasolo a o le'i lolomia le lipoti. O le tali mai a le Pulega o lo'o fa'agasolo atu i lalo:
 - O le fa'atatau sa faia mo oloa e pei ona taua i le Lipoti ua soloia nei. Ua mae'a ona fa'amaonia e le Komiti Fa'atonu lea tulaga i luga o le fautuaga a Su'etusi;
 - O aitalafu e pei ona taua ua ma'ea foi ona soloia. Sa fa'amaonia e le Komiti Fa'atonu lea tulaga e pei ona fautuaina e Su'etusi. O le a fa'aaau pea ona faia ele Fa'alapotopotoga la'asaga e tatau ona uia e toe fa'aola ai ana tupe po'o se isi lava gaoioiga mo lona manuia.

Pulega o le Suavai Samoa***Fa'amatalaga Tautupe Na su'eina:******30 Iuni 2009******Su'etusi:******Betham & Co******Manatu Fa'asu'etusi na Fa'aali:******Lelei******Otootoga o Mataupu Na Maua i le Su'ega:***

1. O le iloiloga o aitalafu i Faioloa mo oloa fa'atau mai, na matauina ai le iai o fe'ese'esea'iga mai le lisi a le Pulega ma fa'amaoniga na aumai i faioloa. O esesega i le va o le lisi a le Pulega ma fa'amaoniga na maua mai i Faioloa mo oloa fa'atau mai, na atagia ai e i ai itu i le si'iga o fa'amatalaga, ma le fa'apaleniga o pepa o totonu ia po'o fa'amaumaga a Faioloa. I le faia ai o le fefa'apalenia'iga i masina ta'itasi, o sese o le a mafai ona maua vave ai ao fou lave fefa'ataua'iga i mafauauga o le aufaigaluega ofisa ma faioloa fo'i. Po'o a lava ni faigata e fetaia'i ma le Faioloa i le tau-fa'apaleniga o talatautupe, o le mea taua o le tau faimalilie o le Pulega ma Faioloa i le aofa'iga sa'o e totonu ina ia mautinoa ai tau e fa'amauina i talatautupe ma le pulega o tupe fetafea'i.
2. I se iloiloga o le lafoga o oloa ma galuega fa'atino (VAGST) e ono totonu mai, na matauina ai e fa'apea e tele lava se fetu'una'iga na fai i le VAGST ono totonu mai, ona o le fa'atatau na maua mai le Matagaluega o Tupemaua. O lea fetu'una'iga ua fa'aitiitia ai le VAGST ono totonu mai i le aofa'iga e \$375,057.18. E tu lava le Pulega i lana galuea'iga e sa'o, ona e tusa ai ma le fa'aliliuga o le tulafono o le VAGST. Na fautuaina e le Su'etusi le

Pulega ina ia tulituliloaina ma i latou e i ai le malosī ma le pule ina ia vave fa'i ai se i'uga o lenei mataupu.

3. Sa valaaulia le Pulega mo fa'amalamalamaga atili ma ni fa'aopopoga e tusa ai ma le Lipoti a o le'i lolomia le lipoti peita'i e o'o ifo i le taimi o le lomiga e le'i maua lava se tali.

10. Su'ega o Poloketi fa'atupe mai meaalofo ma nonoga tupe mai fafo.

O le su'ega o Poloketi e faia pe a mana'omia i le maliliega fa'apoloketi ia po'o le talosagaina. O le masani lava o nei su'ega e faia ina ia fa'aalia ai se manatu i luga o mataupu nei:

- O le talitonuina o fa'amatalaga tautupe o le poloketi;
- Tausisia o mana'oga o tu'utu'uga o le maliega o le poloketi, Tulafono Pulega o Tupe a le Malo ma i si tulafono e pulea ai;
- O le moni ma le tonu o fa'amatalaga tautupe ma talatautupe;
- Lipoti i luga o vaega o i ai vaivaiga i totonu o faiga fa'atino tau puipuiga fa'alotoifale.

O su'ega o Poloketi i le vaitaimi o le lipoti sa atagia se lelei i le aotelega. O lo'o ta'atia atu i lalo le lisi o poloketi sa su'eina fa'amatalaga o tupe fa'atasi ai ma manatu fa'asu'etusi na tu'uina atu iai i le vaitaimi o le Lipoti – Iulai 2009 – Iuni 2010. O se Lipoti auilili o le fa'agasologa o polokalame po'o poloketi o le a aafia i le isi Lipoti e soso'o ai mo le vaitaimi Iulai 2010 – Iuni 2011.

POLOKETI	FA'ATUPEGA	VAITAU SU'ESU'EINA	SA MANATU FA'ASU'ETUSI SA TU'UINA ATU
Fa'alauteleina o le Malosi Fa'aletise	Faletupe Atina'e o Asia	Iulai 2008 – Iuni 2009	Manatu le tautaulia
Alavai ma Fa'amama	Faletupe Atina'e o Asia	Iulai 2008 – Iuni 2009	Manatu le tautaulia
Atina'e o Aoaoga	Malo Ausetalia, Niu Sila ma le Faletupe Atina'e o Asia	Iulai 2008 – Iuni 2009	Manatu le tautaulia
Atina'e o Soifua Maloloina	Faletupe o le Lalolagi	Iulai 2008 – Iuni 2009	Manatu le tautaulia
Pulega o aseta ma meatotino tetele	Faletupe o le Lalolagi	Iulai 2008 – Iuni 2009	Manatu le tautaulia
Aoaoga i totonu o le Atunuu	Malo o Ausetalia ma Niu Sila	Iulai 2008 – Iuni 2009	Manatu le tautaulia
Atina'e o Meli ma Fesootiaga	Faletupe o le Lalolagi	Iulai 2008 – Iuni 2009	Manatu le tautaulia
Atina'e o le Vaega Tumaoti	Malo o Niu Sila ma Malo Aua'atasi	Iulai 2008 – Iuni 2009	Manatu le tautaulia
Atina'e o Itutino o le Malo	Malo Ausetalia, Niu Sila ma Samoa	Iulai 2008 – Iuni 2009	Manatu le tautaulia

11. Ofisa o le Malo i Atunu'u i Fafo

Ofisa Haikomisi o Samoa, Kanepera

Vaitau o le Su'ega:

1 Iulai 2008 tau 30 Iuni 2009

Oto'otoga o Mataupu Na Maua i le su'ega:

E leai se vaivaiga matuia i totonu o faiga fa'atino o puipuiga fa'alotoifale ma fa'asologa na maua, peita'i o nai itu laiti na talanoaina ma fa'ama'ape ai ma le aufaigaluega. E ui i lea, o nai itu ia na talanoaina, ua toe aumai mo le fa'amanatu i le pulega.

1. E leai se Lesitala sa faia e fa'ama'u ai tusi lisiti uma i le taimi o le su'ega, ma sa laga fo'i lenei mataupu i su'ega talu ai, ae o'o mai i le taimi o lenei su'ega, e leai lava se Lesitala o tusi lisiti ua faia.
2. Ua uma ona fa'atumu le Lesitala o Aseta Tumau ae aunoa ma le lesitalaina o le fa ((4) meatotino taua - (i) o le Fale ma le fanua i 30 Kareelah Vista O'Malley; (ii) o le fanua i Deakin; (iii) ta'avale afi o le BMW ma le (iv) t'avale afi o le Holden Commodore;
3. E toe fia fa'amanatu pea e le Ofisa Su'etusi i le Haikomisi ma le Matagaluega o le Va i Fafo ma Fefa'ataua'iga tupe fa'aalu e fitoitonu i togi-pau o fanua (land rates) mo fanua nei o Deakin 11-13 Baele Crescent Deakin, ma le lisi o le Ofisa o le Hai Komisi i 13 Culgoa Circuit, O'Malley, a tu'u fa'atasi totogi o fanua nei e latalata i le AUD\$100,000 tala Ausetalia i le tausaga. E le gata i lea, o le tau lenei ua leva ona tauave mai pe ua ova i le sefulu tausaga o totogi lava. O le fautuaga a le Ofisa Su'etusi, ia fausia loa se Ofisa o le Hai Komisi i le fanua i Deakin, ina ia fa'aititia ai le tau i tupe fa'aalu mo le lisiina o le Ofisa i 13 Culgoa Circuit.
4. Sa valaaulia le Matagaluega o le Va i Fafo mo fa'amalamalamaga atili ma ni fa'aopopoga e tusa ai ma le Lipoti a o le'i lolomia le lipoti peita'i e o'o ifo i le taimi o le lomiga e le'i maua lava se tali.

Ofisa o le Konesula i Aukilani

Vaitau O Le Su'ega:

Iulai 2008 tau Iuni 2009

Oto'otoga O Mataupu Na Maua I le su'ega

1. E foliga mai e leai lava ma se faila fa'apitoa mo tagata na tausia mo so'o se i si o le au faigaluega a le Konesula.
2. Mai se su'esu'ega o konekalate, o le fa'afaigaluegaina o le aufaigaluega a le Ofisa o le Konesula, na aliali mai ai, o konekalate uma lava na fa'agata i le aso 30 Iuni 2006, vagana le tagata faigaluega e to'atasi. Sa fautuaina ina ia toe iloilo konekalate uma ma fa'aleleia vave loa.
3. Sa valaaulia le Matagaluega o le Va i Fafo mo fa'amalamalamaga atili ma ni fa'aopopoga e tusa ai ma le Lipoti a o le'i lolomia le Lipoti peita'i e o'o ifo i le taimi o le lomiga e le'i maua lava se tali.

Hai Komisi – Ueligitone

Vaitau Aofia i le Su'ega: 1 Iulai 2005 tau 30 Iuni 2008

Oto'otoga O Mataupu Na Maua i le su'ega:

1. Sa tulaga lelei le aotelega o puipuiga vagana ai mataupu nei sa laga i le Pulega:
 - Leai se lesitala o Aseta mo le Ofisa;
 - Lelei fa'amaumauga o aso malolo vagana ai se aso malolo ua fa'ataga mo le sefulu aso ae le'i aulia le taimi fa'atulagaina.
2. Sa valaaulia le Matagaluega o le Va i Fafo mo fa'amalamalamaga atili ma ni fa'aopopoga e tusa ai ma le Lipoti a o le'i lolomia le Lipoti peita'i e o'o ifo i le taimi o le lomiga e le'i maua lava se tali.

Ofisa Amapasa o Samoa, Peleseuma

Vaitau Aofia I le Su'ega: 1 Iulai 2005 tau 30 Iuni 2008

Oto'otoga O Mataupu Na Maua I le su'ega:

1. Sa tulaga lelei le aotelega o puipuiga vagana ai mataupu nei sa laga i le Pulega:
 - E foliga mai e le o tausiona aiaiga i le tulaga o le fese'etaiga o le aufaigaluega ma tupe fa'aalu e tatau ona totogi;
 - Sa fa'amaui i fa'amaumauga komepiuta ia aso malolo peit'ai mo le puipuiga mai suiga e aunoa ma se fa'aילו sa fautuaina le taofia pea o fa'amaumauga tusitusia;
 - E i ai le Lesitala o Aseta o lo'o tausia e le Ofisa. Peita'i e le'i aofia a fa'ataga o oloa ma aseta e vave fa'aaoga ma vave mavae .

12. Mataupu Fa'aletonu

O Matagaluega uma lava e manaomia ina ia lipotia mai i le Ofisa Su'etusi so'o se fa'aletonu e tupu i totonu o latou Matagaluega, e a'afia ai tinoitupe, oloa ma i si aseta. O se oto'otoga o fa'aletonu na lipotia mai i le Ofisa Su'etusi mo le 2009/2010 o lo'o fa'aalia i lalo. E mulimuli mai ia le oto'otoga ma fa'amatalaga e fa'ataua i fa'aletonu ta'itasi e pei ona lipotia mai.

Oto'otoga o Fa'aletonu
Lipotia mai i le Ofisa Su'etusi
1 Iulai 2009 tau 30 Iuni 2010

<i>Fa'amatalaga</i>	<i>Aofa'iga Numela Lipotia</i>	<i>Tinoitupe/Tau \$</i>
A – Fa'alavelave Tau Ta'avale (Tau ua mautinoa)	21	\$108,611.95
B – Fa'alavelave Tau Ta'avale (Tau e le'i mautinoa)	3	Le mautinoa
C – Gaoi ma le Leiloa o Meatotino a le Malo (Tau ua mautinoa)	3	\$12,097.49
D – Gaoi ma le Leiloa o Meatotino a le Malo (Tau le mautinoa) Fa'amatapotoina ma le Gau o Tupe a le Malo (Tau le mautinoa)	1	Le mautinoa
E – Fa'amatapotoina ma le Gau o Tupe a le Malo (Tau ua mautinoa)	1	\$2,289.51
F – Fa'amatapotoina ma le Gau o Tupe a le Malo (Tau le mautinoa)	2	Le mautinoa
Aofa'iga	31	\$122,998.95

Fa'amatalaga o Fa'aletonu Na Lipotia i Le Ofisa Su'etusi
1 Iulai 2009 tau 30 Iuni 2010

<i>Numela o le Faila</i>	<i>Aso na Tupu Ai</i>	<i>Aso Lipotia</i>	<i>Tinoitupe / Tau \$</i>	<i>Fa'amatalaga</i>	<i>Galuega Na Faia</i>
<u>Ofisa o le Loia Sili</u>					
IR 1B	19/8/09	24/8/09	Le mautinoa	Fa'alavelave Tauta'avale – Ta'avale numela AG01 O le ta'avale sa tu i fafo i luma o le Ofisa o Leoleo i le aso 19 Aokuso 2009 a o i ai le Loia Sili i le Fale Fa'amasino i le mataupu a le PASS ae solomuli atu ai se ta'avale e le o iloa ma soso'a ai ma mafua ai le ta'e o le moli agavale i tua.	O le ta'avale e inisua e le kamupani a le Pacific Insurance Underwriters ma po'o le a le tau o le fa'aleleia e totogi lava e le Kamuni Inisua.
<u>Ofisa o le Fono Aoao Faitulafono</u>					
IR 2B	Le mautinoa	3/8/09	Le mautinoa	Fa'alavelave Tauta'avale – Ta'avale numela FOF02 O le ave ta'avale a le Sui Fofoga Fetalai sa aveina le ta'avale. O ni i si su'esu'ega sa faia i le fa'alavelave.	Ua manatu le Matagaluega o Tupe, o le ta'avale ua le toe aoga.
IR 3A	3/8/09	4/8/09	\$759.00	Fa'alavelave Tauta'avale – Ta'avale numela LA03 O le fa'alavelave na tupu i le ala-laupapa i Sinamoga ina ua mae'a ona tufaina ni tusi vala'au mo le Semina a Faipule, na tupu ai loa le fa'alavelave, ua le mafai ai ona taofofi le ta'avale ma tifa atu ai taia i le itu o le ala-laupapa ma ma'osi'osia ma leaga ai le itu agavale o le ta'avale.	O le ta'avale sa inisua i le Kamupani o le Progressive Insurance, peitai, na malie le ave ta'avale o le a ia togitogia ta'i \$20 i vaiaso totogi mo le tau o le lipeaina o le ta'avale.

<i>Numela o le Fa'ila</i>	<i>AsoNa Tupu ai</i>	<i>Aso Lipotia</i>	<i>Tinoitupe/ Tau \$</i>	<i>Fa'amatalaga</i>	<i>Galuega Na Fa'ila</i>
Matagaluega o Fa'atoaga ma Faigafaiva					
IR4B	14/8/09	18/9/09	Le iloa	Fa'alavelave Tau-ta'avale –Ta'avale Numela MAF08 O le Ta'avale sa tu i totonu o le paka a le fale a le ACC, ma o le lipoti e fa'apea, e le'i iloa e le Leoleo o le fale pe o le a le taimi ae na fa'apefea fo'i ona tupu. E ma'osi'osia le itu taumatau o le ta'avale i talane o le faitoto'a i luga ifo o le pa'u ta'avale i tua.	Ua fautuaina e le Ofisa o Tupe (MOF) e fa'apca: ▪ Ia totogi e le Inisiua o le Progressive le lipea e \$1,000; ▪ Totogi e le Matagaluega le tau o le fa'asili; ma ▪ Ia feuiaga i ma le ACC mo se fetu'una'iga mo avanoa e paka ai ma ia taofia ai le tupu mai o nei fa'alavelave i le lava o pakaga.
IR 5E	28/08/2009	31/08/2009	\$2,289.51	Tupemaua Fa'aleaso a le Vaega o Fa'aasu i le aofa'iga e \$2,289.51, lea e maua mai le siaki numela 1876854 Faletupe o le Westpac mai le kamupani a Golden Coconut i le aofa'iga e \$376.31, ma le siaki Faletupe o le ANZ numela001056 mai le kamupani a Hyundai Automotive Samoa e \$1,771.00, ma le tinoitupe e \$142.20, na leiloa i totonu o le ta'avale la'u pasese na sau ai mai Matautu i le Matagaluega o Tupe.	O le tagata faigaluega sa leiloa ai le tupe na ia totogia atoa le tupe i le aso lava lea. Na lapata'ia Faletupe uma ina ia taofi ia siaki ua leiloa, ae na toe fai siaki e fa'atunu ai siaki ua leiloa. E fa'amoemoe i luga o siaki toe sui ua maua, o a ni tupe fa'aalu a le tagata faigaluega ia toe fa'aola e le Matagaluega a o ni i si tupe fa'aalu fa'aopoopo ia totogi e le tagata faigaluega. Na fa'amalosia le fautuaga, ina ia fa'avanoa ta'avale a le Matagaluega mo Ofisa e fe'avea'ia tupe ma ia matua fa'aeteete i le taulimaina o tupe a le Malo ina ia fo'ia ai le toe tupu mai o fa'alavelave fa'apenei.

<i>Numela o le Fa'ila</i>	<i>AsoNa Tupu ai</i>	<i>Aso Lipotia</i>	<i>Tinoitupe/ Tau \$</i>	<i>Fa'amatalaga</i>	<i>Galuega Na Fa'ila</i>
IR 6A	6/10/2009	13/10/2009	\$180.00	Fa'alavelave Tau-ta'avale – Ta'avale numela MAF38 Na tupu le fa'alavelave tau ta'avale i Pesega, a o mumu moli o le liliu i le taumatau ae soso'a mai loa e le ta'avale la'u pasese ma fa'aleaga ai le itu taumatau o le talitali. Na fa'aalia e le aveta'avale e fa'apea o ia na alu i le latou aiga e aumai ai se fa'aga'au e fufufu ai ta'avale a le Matagaluega, e ui lava o ia e le tatau ona ia aveina sea ta'avale ona e fou i le galuega.	Na fa'atuaina e le Matagaluega o Tupe a fua i le pogai na mafua ai le fa'alavelave ma lona tula'i mai, sa lapata'ia le aveta'avale, ma tu'u i ai le totogiga o le lipeaina ma nisi tupe fa'aalu i le ta'avale. Na lapata'ia fo'i le Matagaluega e aua le so'ona tu'u ta'avale a le Malo i tagata e le o ni aveta'avale fa'amaonia.
Matagaluega o Pisinisi, Alamanuia ma Leipa					
IR 7A	24/03/2010	24/03/2010	\$1,250.00	Fa'alavelave Tau-ta'avale- Ta'avale numela MCIL03 O le aveta'avale fou a le Matagaluega na alu e momoli tusi i le Fale Fa'amasino Tua ii Tamaligi mai le Ofisa Tutotonu e i le fale o le ACC. Ina ua taunu'u ua fai le fa'aalo e afe i le itu taumatau aga'i i le Fale Fa'amasino ae tu'u avanoa mai le ta'avale o lo'o sau sa'o aga'i mai mo le matou ta'avale ina ia liliu. I le iloa ua avanoa le auala, na matou liliu loa, peita'i ua suia fa'afuase'i le laina na sau ai le tama'i ta'avale (side kick) ma ua le mafai ai ona tu i lea taimi ma sau sa'o ai loa mataia ai le faitoto'a i le itu agavale o le ave ta'avale.	Sa inisua le ta'avale a le Matagaluega, ma ua malie le Kamupani Inisua latou te totogia le lipeaina ta'avale uma. Ae o le aveta'avale na te totogia le fa'asili e \$500 i le tai \$20 i vaiaoso totogi aga'i le Kamupani Inisua. Na fa'atuaina le Matagaluega ina ia va'aia lelei aseta a le Malo. Na lapata'ia fo'i le aveta'avale ina ia 'alo ese mai fa'alavelave tutupu e fa'aleagaina ai aseta a le Malo, e ono taunu'u ai i le fa'asala pe fa'amalolo fo'i mai le galuega.

<i>Numela o le Faila</i>	<i>AsoNa Tupu ai</i>	<i>Aso Lipotia</i>	<i>Tinoitupe/ Tau \$</i>	<i>Fa'amatalaga</i>	<i>Galuega Na Faia</i>
<u>Matagaluega o A'oga, Ta'aloga ma Aganu'u</u>					
IR 8A	05/11/2009	16/11/2009	\$3,936.00	Fa'alavelave Tau-ta'avale-Ta'avale Haea Numela 18344 O le Minisita o A'oga na fa'aogaina le ta'avale haea lea. Sa alu atu le Minisita aga'i i lona aiga i Vaioa, ae fetauti ai ma le ta'avale la'u pasese, ma afaina ai le ta'avale haea i lona itu agavale i luma, ae o le itu taumatau i tua na leaga o le ta'avale la'u pasese.	O le a totogi uma e le Minisita le tau atoa o le toe fa'aleleia atoa o le ta'avale na haea.
IR 9A	8/11/2009	16/11/2009	\$29,500.00 1,900.00 100.00	Fa'alavelave-Tau-ta'avale- Ta'avale Haea Numela 19716 O le Minisita o A'oga sa na tau'aveina le ta'avale haea. O le fa'alavelave na tupu i Fa'ala i Palauli. Na sau mai lona afioaga o Samataitai aga'i le uafu i Salelologa, peita'i i le taunu'u mai i Fa'ala i Palauli, ae ai ua fa'asolomoe le ali'i, ona tifa ese ai lea o le ta'avale ma le ala ma palasi atu ai i le itu agavale o le auala. O le ta'avale ua matua'i le aoga lava.	O le ta'avale ua matua'i soloia lava. O le tau a le Kamupani Haea, mo le fa'afetauia'ia ma le ta'avale Toyota Corolla e fa'apea: (1) Tau e Fa'afetauia'i ai: \$29,500 (2) Ta'avale Toso na toso mai ai : \$1,900 (3) Totogi Fa'aopoopo Ta'i \$100 i le aso O lo'o fa'atali le totogiga atoa mai le Inisua fa'atasi ai ma le totogi fa'asili mo le fa'amae'aina.
<u>Matagaluega o Tupe</u>					
IR 10F	Le mauninoa	19/02/2009	Le mauninoa	O se soliga o le Tapula'a o le Amio e tusa ai ma le vaega 44A, Tulafono o Tagata Faigaluega a le Malo 2004, sa fa'atinoina e le tagata faigaluega a le Matagaluega o Tupe.	Na lipotia e le Matagaluega o Tupe e fa'apea ua fa'amutaina le fa'afaiigaluegaina o le tagata faigaluega, ma fa'atonuina ina ia fa'afu'i uma ifo meatotino a le Matagaluega e aofia ai pepa fa'ailo ma ni i si.

<i>Nimela o le Faila</i>	<i>Aso Na Tupu Ai</i>	<i>Aso Lipotia</i>	<i>Tinoinupe /Tau \$</i>	<i>Fa'amatalaga</i>	<i>Galuega Na Faia</i>
Matagaluega o le Va i Fafo Ma Fefa'ataua'iga					
IR11C	15/07/09	27/08/09	\$5,017.50	O le Laptop Thinkpad ma le ato, na gaoia mai le Faleoloa o le Digicel i le Fale o Caines Janif i Suva, Fiti'a o i ai le Ofisa Sinia - Tau-upufai, Fa'avaomalo ma le Va-fealoa i, i fonotaga e lua e avea ai ma sui o le Malo.	Na fautuaina e le Matagaluega o Tupe e fa'apea o le tau atoa o le toe fa'aolaina o oloa ua leiloa aemaise ai le komepiuta o le laptop thinkpad se'i talia le tagi ua ave e le Ofisa o Tupe, ma o le Ofisa Sinia lava e tatau ona ia tau aveina le totogi fa'asili tau inisua talu ai le le-magafagafa i le mafai e le gaoi ona ave'ese mai meatotino na ia te ia. Sa fautuaina fo'i, o le Ofisa Sinia e tatau lava ona ia totogia le 50% o le tau atoa o le komepiuta pe afai e le manuia le tali mai a le inisua, ona o nei meatotino a le Malo na tu'u atu i lalo o lana va'aiga ma sa tatau ona puipua mai ni gaoiga.
Matagaluega o le Soifua Maloloina					
IR13A	09/09/09	23/09/09	\$3,556.95	Fa'alavelave Tau-ta'avale – Ta'avale numela MOH 02 O le ta'avale sa feagai ma galuega fa'ale-ofisa ae lavea ai. Ua ioeina e le tagata faigaluega lona ave fa'atamala, sa le tatau ona ia faia se liliu tu i lea vaega o le auuala ua mafua ai le fa'alavelave.	Na fautuaina e le Matagaluega o Tupe ina ia totogi uma e le Matagaluega le tau atoa o le lipeaina o le ta'avale, ae o le tagata faigaluega o le a ia toe totogi fa'aola uma mai tupe sa fa'aalu e le Matagaluega le \$20.00 mai lona totogi i le ta'i lua vaiaso.

<i>Numela o le Faila</i>	<i>Aso Na Tupu Ai</i>	<i>Aso Lipotia</i>	<i>Tinoitupe /Tau \$</i>	<i>Fa'anatatalaga</i>	<i>Galuega Na Faia</i>
Matagaluega o Punà'oa Fa'anatula ma le Si'osi'omaga					
IR13A	16/09/2009	24/11/2009	\$150.00	Fa'alavelave Tau-ta'avale – Ta'avale numela MNRE 15 O le Tioata Autafa Ua Ta'e - Ta'avale Numela MNRE 15. O lea fa'amaonia e fa'apea, o le fa'ata'lea e le lelei talu mai Iulai 2009 ona o le leva ona fa'aaoga, ma sa palasi ese foi i le aso 16 Setema 2009 a o aga'i atu le MNRE 15 i Falease'ela ma Solosolo i galuega fai a le Matagaluega.	Na fautuaina e le Matagaluega o Tupe e e fa'apea, ia totogi e le Matagaluega le tau o le fa'ata, ma ia mata'itu e le Matagaluega, o mea o itutino o ta'avale afai e va'ai ua tatau ona sui talu le leva ona fa'aaoga, sui loa mai lo le tu'u sei aliali mai i tulaga e pefi o lea fa'ata.
IR14C	28/08/2009	18/11/2009	\$3,000.00	E fa' (4) pa'u ta'avale na leiloa mai le Potu Oloa i Maota, a le Vaega o le Vaomatua.	Na fautuaina e fa'apea, o le 75% (\$2,500) e tatau ona totogi mai e le Tailu, ae o le 25% (\$750) e totogi mai e le ave-ta'avale o le Matagaluega...
Matagaluega o Leoleo ma Falepuipui					
TR15A	15/12/2009	21/01/2010	\$1,300.00	Fa'alavelave Tau-ta'avale – Ta'avale numela MPAG02 Fa'alavelave Tautavale na a'afia ai le ta'avale numela MPAG02 na aveina e le Minisita Lagolago o Leoleo ma Falepuipui, aga'i i le Falema'i i Tuasivi, ae tupu ai loa le fa'alavelave, ma fa'aleagaina ai le u'amea taumatau so'oga o le foefu (tie rod), pa le pa'u taumatau i luma ma omo ai loa le taliatali (bumper) i le itu-taumatau o le ta'avale.	O le ta'avale na ave i le Fale Enisinia, ma ua mae'a ona lipea uma.

<i>Nimela o le Faiila</i>	<i>Aso Na Tupu Ai</i>	<i>Aso Lipotia</i>	<i>Tinoitupe /Tau \$</i>	<i>Fa'amatalaga</i>	<i>Galuega Na Faia</i>
IR16A	08/03/2009	5/08/2009	\$1,150	Fa'alavelave Tauta'avale—Ta'avale numela POL19 Na fa'alegaina le itu agavale o le ta'avale i le sitepu o le fale o le luni Lakapi o Samoa (SRU) a o taumafai le leoleo e fa'atu le ta'avale i le lotoa.	Sa tatau i le Matagaluega ona tutilulioaina le Pacific Insurance Underwriters Ltd mo le totogi atoa tau- inisua, ae afai ae le talia e le Kamupani Inisua le talosaga mo le totogi o lipea, e tatau i le leoleo na a'afia ona totogi uma le tau-aofa'i o le lipea.
IR17A	20/04/09	05/08/2009	\$862.50	Fa'alavelave Tauta'avale—Ta'avale numela POL19 O le fa'alavelave na tupu i le ta'avale a o ulufale atu i totonu i le Fale o To'oa Salamasina, e tu'u ai leoleo o le Fa'ili mo a latou fa'ata'ita'iga, ae oloia atu ai i le pou u'amea o le lotoa o le fale, lea e ma'osia ai le itu taumatau i le faitotoa fa'asolo.	Sa tatau i le Matagaluega ona tutilulioaina le Pacific Insurance Underwriters Ltd mo le totogi atoa tau- inisua, ae afai ae le talia e le Kamupani Inisua le talosaga mo le totogi o lipea, e tatau i le leoleo na a'afia ona totogi uma le tau-aofa'i o le lipea.
IR18A	03/06/2009	05/08/2009	\$4,659.50	Fa'alavelave Tauta'avale—Ta'avale numela POL19 O le alu atu o le leoleo e tali atu i le vala'au mai mo se fesoasoani mai Tufuiopa i le po o le Aso Lulu 03/06/09 i le 9.00 p.m., ma o le toe fo'i mai o le a o'o i le Ofisa, na mimilo ai le ta'avale ma taia ai i le pou u'amea.	Sa tatau i le Matagaluega ona tutilulioaina le Pacific Insurance Underwriters Ltd mo le totogi atoa tau- inisua, ae afai ae le talia e le Kamupani Inisua le talosaga mo le totogi o lipea, e tatau i le leoleo na a'afia ona totogi uma le tau-aofa'i o le lipea.
IR19A	14/06/2009	05/08/2009	\$4,542.50	Fa'alavelave Tauta'avale : Ta'avale Numela POL19 O le fa'amalama o le faitoto'a fa'asolo o le ta'avale na ta'e ina ua a'e le leoleo, i le la misa ma lona to'atua i Moto'otua.	Sa tatau i le Matagaluega ona tutilulioaina le Pacific Insurance Underwriters Ltd mo le totogi atoa tau- inisua, ae afai ae le talia e le Kamupani Inisua le talosaga mo le totogi o lipea, e tatau i le leoleo na a'afia ona totogi uma le tau-aofa'i o le lipea.
IR 20A	23/07/2009	05/08/2009	\$4,082.50	Fa'alavelave Tauta'avale—Ta'avale numela POL19 O leoleo na o ifo e saisai le pagota mai Solosolo, ae o ifo ai le aiga o le pagota tau'ai le ta'avale i ma'a ma fa'aleaga ma ta'e ai le fioata i tua.	Sa tatau i le Matagaluega ona tutilulioaina le Pacific Insurance Underwriters Ltd mo le totogi atoa tau- inisua, ae afai ae le talia e le Kamupani Inisua le talosaga mo le totogi o lipea, e tatau i le leoleo na a'afia ona totogi uma le tau-aofa'i o le lipea.

<i>Numela o le Faila</i>	<i>Aso Na Tupu Ai</i>	<i>Aso Lipotia</i>	<i>Tinoitupe /Tau \$</i>	<i>Fa'amatalaga</i>	<i>Galuega Na Faia</i>
IR21A	03/08/2009	05/08/2009	\$30,000	Fa'alavelave Tauta'avale- Ta'avale numela POL12527 O le ta'avale na o ai le asiasiga tau-puipuga masani a leoleo aga'i i Lepa, sa'a'afia i se fa'alavelave ina ua o'o atu i se pi'oga i Lotofaga- uta, ae sau sa'o le ta'avale (Gerz lauanoana) i lo ma itu ala ona fa'avaveave ai lea ona seu tu le ta'avale i le itu agavale o le auala ma oso ai loa i le autu ma lavea ai.	E tatau i le Matagaluega o Leoleo ona faia se su'esu'ega i le fa'alavelave lea ma lipoti mai itu na alia'e mo le totogiga o lipea.
IR22A	3/8/09	5/8/09	\$1,800.00	Fa'alavelave Tauta'avale- Ta'avale numela 13312 O le fa'alavelave na fa'aleaga ai le moli tele i luma i le itu taumatau ma malepe ai le talitali (bumper) i luma ina ua tau fa'aoso le ta'avale i luma o le loli ae fetau ai ma tua o le loli.	E tatau i le Matagaluega o Leoleo ona faia se su'esu'ega i le fa'alavelave lea ma lipoti mai itu na alia'e mo le totogiga o lipea.
IR23A	11/07/2009	17/07/2009	\$2,800.00	Fa'alavelave Tauta'avale- Ta'avale numela POL 27 O le fa'alavelave tauta'avale na tupu a o i luga o galuega i Matautu-uta, na omo ai tua o le ta'avale ma le talitali ma ta'e ai le tioata i tua.	Na fauina e le Matagaluega o Tupe ina ia totogi e le Matagaluega le lipeaina o le ta'avale, ae ia toe fa'aola e le leoleo na avea le ta'avale le tupe fa'aalu a le Matagaluega i le ta'i \$50 i le vaiaso totogi. Sa fauina malosi le Matagaluega ina ia fa'ata'atia puipuga malu mo ta'avaleuma se'i foia ai le tupu so'o nei fa'alavelave.

<i>Numela o le Faila</i>	<i>Aso Na Tupu Ai</i>	<i>Aso Lipotia</i>	<i>Tinoitupe /Tau \$</i>	<i>Fa'amatalaga</i>	<i>Galuega Na Faia</i>
Matagaluega o Tina ma Tama'ita'i, Atina'e o Nu'u ma Afio'aga ma Agafeso'ota'i					
IR24D	Le ma'utinoa	26/08/2009	Le ma'utinoa	Tusi Lisiti i lagolago, e lisiti ai tupe togi-pau o le A'oa'oga tau le Atina'eina o le Poto-masani e faia i alalafaga ese'ese, ua leiloa. E toatolu (3) sui o le aufaigaluega a le Matagaluega e fitoitonu ma lenei tusi lisiti.	O le to'atolu o le aufaigaluega na a'afia sa fesiligia ina ia saili le tusi lisiti ma fa'ama'ape ai le aofa'iga ua lesitalaina.
Matagaluega o Galuega, Fela'ua'iga ma Galuega Tetele					
IR25A	08/03/2010	15/03/2010	\$3,900.00	Fa'alavelave Tauta'avale-Ta'avale Numela MWTTI 02 O le aveta'avale na alu i Vaitele-uta e ave le fagu kesi a le Ofisa Sili, ae o le oso ai i luga o le patupatu, na leiloa ai le faleuga-tioata taupikiapu ae na te leiloa pe na fa'apefea ona tupu.	Na fauaina e le Matagaluega o Tupe, ina ia soloia le faleuga-tioata taupikiapu ae ia toe totogi e le Matagaluega se isi faleuga-tioata taupikiapu fou.
IR26F	16/02/2010	05/03/2010	Le ma'utinoa	O le fa'aaliga ina ia taofi le fausia na tu'uina i se tasi o pulega e taofia ai le fausia o le maota i Malua ona o le leai o se pemitia e fausia ai, ae mafua ona o se auuala fa'asolitulafono sa uia.	Sa faia se su'esu'ega fa'apitoa e le Matagaluega o Tupe, Komisi o Galuega a le Malo ma le Ofisa Su'etusi e tusa ai ma le ogaoga o lenei mataupu.
IR27A	04/12/2009	18/12/2009	\$1,705.00	Fa'alavelave Tauta'avale-Ta'avale Numela MWTTI 01 Na fa'ataga e le Ofisa Sili le Ofisa Sili Lagolago i le Vaega o Va'alele Savili e ave le ta'avale e momoli ai latou i le malae va'alele i le aso 5 Tesema 2009 ma paka ai mo le toe fo'i mai. Na fo'i mai i le Aso Gafua, Aso 7 ma ave le ta'avale i le Ofisa i le aouli, e aunoa ma se iloa o lo'o'omo i le itu o le ta'avale.	E totogi e le Ofisa Sili Lagolago i le Vaega o Va'alele Savili mo le vaega o le fa'asili e tusa ma le \$1,000.00, ae o le Kamupani Inisua o le National Pacific na te totogi atoa le tau o le lipea.

<i>Numela o le Fa'ila</i>	<i>Aso Na Tupu Ai</i>	<i>Aso Lipotia</i>	<i>Tinoitupe /Tau \$</i>	<i>Fa'amatalaga</i>	<i>Galuega Na Fa'ila</i>
Auaunaga Fa'a-Soifua Maloloina					
IR28A	26/08/2009	27/08/2009	\$2,500.00	Fa'alavelave Tauta'avale-Ta'avale Numela NHS 34 O le fa'alavelave na tupu i Magiagi i le 11.00 i le po, i le momoliga o le aufaigaluega tiute po, ae fetau ai ma le pikiafu o sau fa'asasa'o mai, seu ai loa i tua le ta'avale. O lea na lavea ai tua i le itu-agavale ma ta'ei ai moli i le itu lava lea.	Na fautuaina le Auaunaga Fa'a-soifua Maloloina ina ia latou totogia uma le lipeaina o le ta'avale.
IR29A	02/09/2009	02/09/2009	\$100.00	Fa'alavelave Tauta'avale-Ta'avale numela NHS 36 O le ta'avale na fa'aaoga e le ave ta'avale mo le momoliga o le vaega tiute po mai le 1.00 i le vaveao e tau 9.00 i le taeao, o le felua'iga o le ta'avale o le a alu e ave le aufaigaluega ae solomuli atu ai le ta'avale fetau ma le ma'a ala ma afaina ai le itu agavale o le talitali i tua.	Na fautuaina le Auaunaga Fa'a-soifua Maloloina, ina ia totogi uma le lipeaina o le ta'avale.
Ofisa Su'etusi					
IR30C	17/09/2009	23/09/2009	\$4,079.99	O le komepiuta Acer Laptop ua gaioia. O le meatotino lea sa i totonu o le ta'avale a se tasi o le aufaigaluega, ma sa gaioia mai ai i totonu o le ta'avale.	Ua uma ona toe totogi e le tagata faigaluega sa feagai ma lea komepiuta ma ua toe fa'aola mo le Ofisa, ae afai ae toe maua le komepiuta tuai lea na gaioia, ona ave lea ma ia.

<i>Numela o le Fa'ila</i>	<i>Aso Na Tupu Ai</i>	<i>Aso Lipotia</i>	<i>Tinoitupe /Tau \$</i>	<i>Fa'amatalaga</i>	<i>Galuega Na Fa'ila</i>
Ofisa o Fuainumera Fa'amauiina					
IR31A	26/11/2009	24/12/2009	\$7,878.00	Fa'alavelave Tauta'avale-Ta'avale Haea Numela 19925 Sa haeaina le ta'avale mo le Tusigaigoa Tau-fa'ato'aga na faia i Savai'i. Sa fealua'i ai le Ali'i Ofisa e ao mai galuega mai le aufaigaluega i afio'aga ese'ese, ma i le 7.30 i le po ina ua tu'ua Aopo, na fetui ai ma se i si ta'avale o sau sa'o lava i le ala o alu atu ai, ma fa'apea loa ona seu ese ai ma pa'u ai i hua mai le auata ma afaina ai le ta'avale.	O le ta'avale sa inisua, ma ua malie le kamupani inisua e totogi le \$2,565.00, ae o le paleni o totoe e totogi e le Matagaluega. O le ta'avale ua manua soloia lava.

